



摘文堂集卷七

制

蕃官羅保與轉一官制

敕具官某爾服勤邊圉克有戰功宜進厥官昭示嘉獎欽予時命尚懋爾忠可

西京左藏庫副使喬伯虎與轉兩官蕃官西京左藏庫副使胡志德與轉一官蕃官文思使羅萬成與轉三官內一官回授與五服內有官親屬蕃官文思副使爾善轉兩官制

敕具官某爾等各以戰多達於朕聽忠勇若此宜有褒嘉擢進厥官益圖稱塞可

策凌博族首領嘉勒幹進補皇城副使奉聖旨特與轉兩官制
敕具官某爾躬冒矢石追襲寇攘誅斬既多仍有俘獲帥師條上
功狀爲優擢進兩官以示甄獎服茲明命無替忠勤可
文思副使董厚與轉一官制

敕具官某惟爾服勤疆場以有戰多朕不弭忘特加甄敘進官一等其往欽承可

開封府捉事使臣韓慶朱渙可各轉一官制

敕具官某以汝捕獲之勞宜有甄獎遷資示寵於汝爲榮無替恪勤務稱恩命可

左藏庫副使莽丹內庭崇班包喜各轉兩官東頭供奉官隆布盤轉一官制

敕具官某等爾等夙以材能服勤疆場河湟之復咸有戰多用加褒升昭示獎激往共乃服尚其勉哉可

右騏驎使張晞如京副使兼閤門通事舍人王子曼共特與轉三官內張晞兩官回授與五服內有官親屬內庭承制陳懷遜苑

苑副使焦用誠供備庫副使郭警東頭供奉官王志各與轉兩官供備庫副使高靖西京左藏庫副使王舜中內庭崇班沈超

東頭供奉官王正臣各轉一官制

敕具官某等爾等擐甲執兵出入行陣河湟之復咸有戰多功狀以聞第加賞擢益思奮勉以副恩章可

蕃官內庭崇班牛伊格與轉一官制

敕具官某爾發於忠誠奮身效順朕所嘉尚宜有褒升序進一官昭示獎激往加勵勉以副恩章可

左藏庫副使奇多遇內庭崇班李士吉各與轉一官制

敕具官某等汝等冒犯矢石以立戰多宜進厥官昭示獎激往圖後效嗣有寵嘉可

如京使趙抃右班殿直王豫可各轉一官制

敕具官某等招諭逋逃爾預宣力進官一等以示褒嘉往承朕恩勿替忠恪可

三班借職鄭貴妃位掌牋奏陳濟可轉一官制

敕具官某惟爾祇事有勞宜加甄獎擢遷位序其往欽承可
舊城裏左廂居養院提轄使臣左班殿直楊盛可轉一官制

敕具官某朕置居養院以處鰥寡孤獨之民法令既備尚慮有司便文自營命官按視惟汝奉行勤恪民得所歸至於歡呼感激朕甚嘉之擢進厥官以爲能吏之勸往加懋勉嗣有寵褒可

將作監李誠提轄兵將官曹滋可各轉一官李誠係右朝議大夫曹滋係朝請郎制

敕具官某等北營崇報既克考成工役不愆勞列可尚爾等預茲典領咸著恪勤以錫恩章以示嘉獎進官一等其往欽承可

內庭崇班李紹與轉三官制

敕具官某爾三立戰多兵無亡矢宜加優獎以勵邊城超進厥官茲爲懋賞往承無替朕不爾忘可

保安軍順寧塞蕃弓箭手指揮覺默特族右侍禁阿穆爾與轉五官制

敕具官某順寧之役爾預有勞斬馘既多仍執強敵進官五等時乃異恩往服寵章無替忠勇可

左侍禁充學士院待詔巡訓爲三次書寫汎使國書特與轉一官制

敕具官某爾以書藝承詔三寫國書列狀自陳朕命甄錄進官一等於爾爲榮可

內庭崇班孟達與轉一官制

敕具官某惟爾奮武邊陲抗賊決勝以推恩典以賞戰多序進厥官往其祗服可

宣德郎閻騃宣義郎舒彥舉可各轉一官制

敕具官某夏人入貢邦有常儀命官刊修書成來上惟爾咸以推舉獲與討論宜錫恩章昭示嘉獎進官一等其往欽承可

西頭供奉官棟智默特與轉四官制

敕具官某惟爾以忠效順獲造班聯克有戰功達於朕聽宜加懋賞往服優恩益思報命可

得功人內殿承制韓庠加四級西京左藏庫副使李介二級西頭

供奉官李壽二級每級轉一官制

敕具官某爾冒犯矢石咸有戰多帥臣以聞按級加賞第遷品秩時乃優恩往服命書益思奮勵可

西頭供奉官睢文約可轉一官制

敕具官某收復鄯鄯爾思置陞祇事無違宜有褒賞進官一等往其欽承可

句當修內司使臣張祐鄧述劉道催促修造使臣李景約晉用宋明可各轉一官制

敕具官某等朕命有司繕飾原廟爾等恪勤厥事工役不愆宜進官榮以示嘉獎往承寵命益懋爾能可

尚衣奉御李鎮可轉一官制

敕具官某爾職在尚衣掌於冕服夙夜祇事勤恪可稱序進厥官惟以示勸欽予時命尚其勉哉可

西頭供奉官折可襄與轉一官制

敕具官某惟爾冒犯矢石抗賊效忠克有戰多達於朕聽進官一等以示獎優往服命書益加勵激可

內殿崇班鄒清與轉兩官梁德與轉一官東頭供奉官楊隆西頭供奉官宋伯威各與轉兩官制

敕具官某某爾等奮武邊陲誅斬強敵視功輕重敘進厥官爰錫命書昭示獎激往其祇服無替爾忠可

朝散郎家安國可轉一官制

敕具官某爾曩膺選掄往按茶事稅課豐裕效勞可稱序進厥官維以示勸祇服恩命無替恪勤可

承制武道紀崇班丁克彥皇城副使楊球入內西京左藏庫副使

陳思溫供奉官周覺盧贄楊安國王昷耿維康陳諤王方徐中

立侍禁秦純吳之紀杜卿張敷樂僖趙士旼殿直孫丹方承約

張顯郭瑋母玉王士亨奉職陳子淵徐昇借職師孟呂師嚴可

各轉一官制

進官一等以示寵嘉往服恩章益思勵勉可

文思使吳元瑜入內供備庫副使張益承制吳永可各轉一官制
敕具官某朕卽英宗舊邸崇建寶坊爾等俱以材力之優協濟厥
事稽其功緒恪勤可嘉宜錫恩章擢升位秩往加勵勉無替前勞
可

入內文思副使胡宗傑入內西京左藏庫使楊茂昌入內文思使
何訢入內左藏庫使榮州刺史陳宥入內東頭供奉官黃訓入
內內庭承制鄧忠臣凌德臣可各轉一官制

敕具官某等朕眷撫庶士錄其勞列雖在疏逖褒賞以時矧惟左
右之臣乎爾等出入禁庭奉勤夙夜恪勤之節久而益彰宜服朕
恩序升品秩尚加勵勉務稱寵榮可

入內西京左藏庫使郭禹臣入內供備庫使張奭入內供備庫副
使張彥明入內東頭供奉官宋侁可各轉一官制

敕具官某等朕追懷恭懿保翊累朝錄其舊人昭示恩紀爾等出
入禁闈咸著恪勤宜膺寵嘉擢升位秩往加勵勉以稱所蒙可

入內文思使舒州刺史楊日言入內左藏庫使黃諶入內文思使
范仔入內文思副使閻祖德入內文思副使楊端入內西京左
藏庫副使鄧繼英入內內殿承制朱輔世入內崇班王允文鄭
諶入內東頭供奉官王褒張令可各轉一官制

敕具官某等朕仰膺孚佑弓鞬告祥爵賞之施邦有常典爾等率
職禁省祇奉勤勞察其恪謹宜加甄獎序升位秩錫以命書往其
懋承益思報稱可

入內內侍省官朱祐之石瑾張補之李雍陳思恭王蕘臣張正夫
賈蒙江諡張欽若許佃容誼趙贄可各特轉一官制

敕具官某等朕賴天眷佑錫羨宮闈慶賞之施厥有常典爾等列
職禁省勤恪恭積有勞能宜加甄獎用錫寵命擢進厥官往務
欽承益思稱職可

入內內庭承制張佑入內左藏庫使王佑可各轉一官制

敕具官某等禁省近臣功緒可攷以時敘進茲謂典常爾等出入禁庭勤恪靡懈會課來上宜錫恩章往其欽承務稱甄獎可

入內左藏庫永州團練使馮鐸可轉一官制
敕具官某稽勞敘進不以遐遺矧吾禁省之臣會課來上褒能之典厥有故常惟爾稟資溫恭迪己勤茲率職有餘閱具存宜進厥官以示甄獎服茲寵命尚加勉哉可

內侍省內殿崇班藍惟信可轉一官制
敕具官某惟爾從子功緒可嘉爰錫恩章許其回授宜遷爾秩以示寵嘉往服命書毋忘勤茲可

入內西京左藏庫副使張瑾可轉兩官制

敕具官某朕推一心以馭羣臣任無內外必稽其功緒而進之爾服采禁省克自抑畏閱歲茲久積勞當遷敘進厥官往其祇服可入內內殿崇班鄧宗仁入內左藏庫使梁昭慶可各轉一官制

敕具官某等宮省之臣出入禁闥恪勤不懈考績維明有司以聞法當敘進宜遷位秩昭示寵嘉往克欽承尚有超擢可

供備庫副使蘇球東頭供奉官蕭恭右侍禁張廉張孝忠梁嘉叟右侍禁華鎮崇班劉震右侍禁錢景寬右班殿直蘇絢可各轉

一官制

敕具官某等浮梁建壘工役不愆爾等咸服事勞協力趣辦宜推恩典以示褒嘉序進厥官往承無斁可

入內內侍省西染院使郝平可特轉一官制

敕具官某朕考覈羣臣錄其功緒爵祿之賞資以勸能惟爾賦材敏明迪己勤茲踐揚事任積有顯勞宜錫命書褒進厥官往加勵勉務稱朕恩可

入內內侍省供備庫副使張禹偁西頭供奉官武昱可各轉一官制

敕具官某等在潛邸時嘗造燕府相與講學爾等實預祇奉念之

不忘宜錫恩章特遷位秩往加勤愆以稱所蒙可
入內右騏驎使裴絢可轉一官制

敕具官某曩築蕭關爾預宣力以時促辦工役不愆勞列之優宜
膺厚賞用申舊命加進厥官褒善錄勤惟以示勸往服朕訓無怠
欽承可

入內文思使董舜臣可轉一官制

敕具官某朕考覈羣臣錄其功緒爵祿之賞資以勸能爾出入禁
庭謹恪可尚軍器建局率職有勞宜錫恩章以示甄獎擢升厥位
其往欽承可

入內西京左藏庫副使黃洙可轉一官制

敕具官某朕考覈羣臣錄其功緒爵祿之賞資以勸能爾材資之
優率職有裕軍器建局宣力爲多宜錫恩章以示甄獎擢升厥位
往其懋哉可

入內西京左藏庫副使張禹偁可轉一官制

敕具官某爾祇事皇府閱歲旣多宜錫恩章以示甄獎進官一等
其克欽承可

入內右騏驎使朱拱之入內左藏庫副使何訢可各轉兩官制

敕具官某等爵祿之賞操柄在予念功簡勞人用胥勸惟爾服職
宮省夙著恪恭茶事告成預有勤績宜加甄獎昭示寵嘉用錫命
書擢升位秩往承無替尚有異恩可

入內內侍省文思使榮州刺史陳宥可轉一官制

敕具官某計其歲月察其行能而後進之此有司考績之政也雖
吾宮省之臣耳目所及亦率是法惟爾出入禁闥勤愆可稱會課
以時旣應遷格序升品秩爰錫命書往服寵榮尚加勵勉可

入內左藏庫副使黃希叟可轉一官制

敕具官某爾祇事宮省勤愆不渝論課有司旣應遷格宜升班秩
以示褒嘉往服恩榮益思懋勉可
入內內殿承制楊軫可轉一官制

敕具官某爾服事內省勤愆可嘉褒進以官往其祗服可

入內內侍省禮賓使及入內內侍省左藏庫副使胡宗傑等並轉
一官制

敕具官某等考績之法以勵庶工褒善錄勤靡閒疏遠矧吾禁省
之臣義豈當後惟爾宣勞夙夜勤愆不愆會課當遷敘進厥位是
雖有司之常法非率職勵行其何以稱此可

入內內侍省左藏庫副使張璩可轉一官制

敕具官某禁省之臣職任親近稽勞敘進時乃舊章惟爾材資之
優濟以勤恪有司會課率職可嘉宜錫恩章俾升位秩往其勵勉
以對寵恩可

入內左藏庫副使何訢可轉一官制

敕具官某宮闈嗣慶爾父預恩祈以寵章屬於子姓惟爾出入禁
闈勤愆不愆宜錫命書進升位秩無忘忠孝乃稱所蒙可

入內西京左藏庫副使劉光祖可轉一官制

敕具官某汝位職恪勤達於朕聽進官一等以示寵嘉往服恩章
勿替厥志可

入內內侍省東頭供奉官熙河路走馬承受公事秦肅之特轉

兩官制

敕具官某汝出入戎行以駿奔承命爲職迺能審度事機率先士
卒奮身鋒鏑之間決戰取勝誅斬首惡閱級旣多幕府以聞朕用
嘉止進官二等以懋汝功服我寵榮愈加勵勉可

朝請大夫尚書省都事呂昭敏韓祥可轉一官制

敕具官某等朕命儒臣編次學制成書來上爾與有勞擢進一官
以示甄獎往承茂渥無替恪勤可

手分借職邵淵左安仁廉公謹可轉一官制

敕具官某等爾奉行文書勞勩宜賞進官一等其往欽哉可

宣政使深州防禦使賈祥可使額上轉行一官制

敕朕親御翰墨刊定學校之政令命官編次旣獻成書應奉之臣

宜膺慶賞具官某持身祇肅涖職恪勤揚歷既多休有譽處惟茲
建局承命不愆宜進厥官昭示嘉獎往其欽佩益懋厥修可
西京左藏庫副使邗從善可轉一官制

敕具官某惟爾昔應奉常援例祈恩寵進一官以示甄錄往服朕
命無替恪勤可

皇城副使權發遣本路都監新差權發遣保安軍耿端彥莊宅副
使本路第六將孫廣如京副使本路第六副將梁璋各特與轉
兩官係郵延路制

敕具官某等朕率惟敕功以固封宇西陲招納爾克有勞超進厥
官以示獎激往加勉勵尚有寵榮可

監成都府上供機王隨可轉一官制

敕具官某織紵之工在成都者汝實總之克勤乃職勞列可嘉宜
進厥官俾乃舊服體予甄獎尚加懋哉可
宣德郎魏當可轉一官制

敕具官某朕重建琳宮修嚴像設爾預供億宜錫恩章擢進一官
往其祇服可

朝請郎集賢殿修撰知荆南軍府董必特轉三官制

敕具官某朕操八柄以馭羣臣爵賞之施非迪有功未嘗虛授爾
以書殿華貫作帥荆湖經理封疆既克就緒進官三等以懋爾勞
圖稱所蒙尚有顯秩可

通直郎提舉夔州路常平等事張杲與轉一官制

敕具官某朕祇適先猷恢崇學校庶幾道德一風俗同汝爲部使
者能糾察異論助朝廷所以訓迪多士之意朕甚嘉之進官一等
爲汝寵榮往其欽承益勵治行可

通直郎李亘可轉兩官御批鰥寡孤獨王政所先條令雖具施行
在人溧陽縣分爲八室男女異處各得其所宜在褒勸其知縣
特轉兩官候任滿日與堂除差遣制

敕具官某朕憫鰥寡孤獨之民困窮無告廣建居養所以安集之

有司供億事爲之制朕之撫綏斯民亦已勤矣顧條令雖具而施行在人惟爾究宣德意分治室廬男女異處各得其所設施之美達於朕聞不有褒升何以示勸進官三等時乃異恩俟其終更別加除擢往服朕命無替恪勤可

權貨務監官朝奉大夫宋康年吳薦朝請郎丁維買鈔所監官文思副使左厚之奉議郎周中可各轉一官制

敕具官某等鈔法之行爾實推奉會課饒羨良見恪勤宜錫寵章擢升品秩往加勵激務稱所蒙可

承務郎知鄭州管城縣范世修奉議郎通判永興軍王直臣奉議郎僉書陝州節度判官廳公事王觀國可各轉一官制

敕具官某某爾等招諭逋逃俾還戶籍效實可尚達於朕聞褒進厥官維以示勸往思報稱無替恪勤可

朝奉郎張伯昌宣議郎王萬承議郎徐宅供備庫副使魏伯成李彭年皇城使京畿提舉保甲兼提刑劉戒朝奉大夫趙士宇朝

奉郎提舉京畿常平王仲原承議郎孫奎周廷堅奉議郎向濤宣德郎樓光翟敦仁宣奉郎向滌應安道入內侍省供備庫副使黃希叟左藏庫副使王朗皇城使河東第六將開德府駐劄劉永德可各轉一官制

敕具官某某爾等預修比輔各迪有功宜錫寵章以示甄獎進官一等時乃茂恩往其欽承益圖稱塞可

涇原路定戎鹽池提舉措置官夏偃句管種收給納劉雄陳開並各轉一官制

敕具官某某等鹽池奏課歲額遞增經畫於茲惟爾勞動宜推恩嘉序進一官往其祗服可

朝請郎知北外都水丞公事葛仲良朝奉郎權發遣通利軍句仲甫可各轉一官制

敕具官某某等營建新壘役不愆期惟爾供億之勞宜加甄賞用錫寵命擢進厥官務往欽承無替勤恪可

通直郎河北路運判張暈可轉一官制

敕具官某爾以才選往佐漕臺工役造成與有勞勩擢升位秩維以勸能往服恩章尚加懋勉可

朝散郎同管句成都府利州陝西等路茶事兼提舉陝西等路買馬監牧公事廳龐寅孫轉一官制

敕具官某爾比擢使輶監權監牧鬻馬三萬差擇惟良勞列之優宜示甄獎用錫明命寵進厥官往其欽承愈加勵勉可

知岷州降授左藏庫使威州刺史馮瓘通判岷州奉議郎石緝岷州都州監供備庫使魏允中可各轉一官制

敕具官某等爾效職外邦預吾馬政鬻數登足功緒可嘉宜進厥官昭示甄獎往加勵勉以稱茂恩可

太常博士單暉可轉兩官兩浙提舉學事路瓘可轉兩官制

敕具官某等朕親定學校政令付之儒臣俾加編次爾等俱以文行被選披閱於茲書成敘恩擢升位秩往服寵命益懋厥修可

朝散大夫直龍圖閣提舉成都府利州陝西等路茶事兼陝西等

路買馬監牧事孫鼈并可與轉一官制

敕具官某惟爾心術疏通濟以勤恪市茲萬馬差擇惟良稽勞敘恩擢升品秩體予嘉獎其懋承之可

朝散郎權發遣陝府兩路轉運判官公事孫琦朝奉郎權知解州宋表微承事郎權通判河中府李釜可各轉一官制

敕具官某爵祿之柄在予一人褒善錄勤夫豈虛授爾等協力懋事各迪有功宜錫恩章俾遷位秩往其祗服益懋厥修可

宣德郎通判乾寧軍王雲可轉兩官制

敕具官某朕嘗遣使往撫三韓爾以牋筦從行實紀其事成書來上文理可嘉擢進厥官仍佐軍壘往思勉勵以稱寵褒可

引進副使雄州防禦使姚古可使額上轉一官制

敕具官某爾統吾虎士修築有勞帥臣以言朕所嘉尚特遷品秩爲爾榮寵往服命書益圖顯效可

右監門衛大將軍仲馨可轉一官制

敕具官某屬籍之親領秩環衛能以勤恭達於朕聞序進厥官昭示嘉獎欽承無替往稱所蒙可

左朝議大夫蹇序辰可轉一官制

敕具官某朕既寶藏宸集加惠史臣例進一官汝其祇服可

左侍禁方榮可轉一官制

敕具官某爾以緝捕之勤討獲羣寇部使者來上朕用嘉之擢進厥官往其祇服可

太醫承直翰林醫官局王舜卿可轉一官制

敕具官某爾諸父周道醫診有勞許以恩章屬於從子用遷爾秩往其欽承可

太醫承直翰林醫官局李仲章可轉一官制

敕具官某爾父士爽醫診有勞許以恩章屬於子姓用遷爾秩往其欽承可

司勳員外郎陳噩可轉一官制

敕具官某閣門儀制既獻成書惟爾久與討論宜有甄獎進官一等示不弭忘往其欽承益思所稱可

天文官介王仲孚康永昌可各轉一官制

敕具官某爾等推測之精考驗不爽宜升位秩以示寵嘉往服恩榮益加懋勉可

太史局天文院學生蘇亮可轉兩官制

敕具官某曆書之成爾與祇奉錫茲恩命往其欽承可

醫官潘用中可轉一官制

敕具官某爾服勤醫診藝業惟良調治中宮勞效顯著宜升位秩昭示寵嘉往服恩榮務先謹恪可

皇兄右武衛大將軍保州刺史士曠可轉一官制

敕具官某宗正言爾學問淹通累中優選朕聞而嘉之召試禁林以觀所蘊而程篇來上文理俱通宜進厥官俾爲屬籍之勸可

右監門衛大將軍仲侃仲維可各轉一官制

敕具官某等爾父宗諤受命仁廟敦諭英祖趨定儲極載在信史朕心不忘宜錫恩章以寵厥後擢升位秩其往欽承可

兩朝佑聖太夫人姪孫左侍禁閣門看班祗候張世昌可轉一官制

敕具官某朕追懷恭懿褒錄近親進爾一官錫茲明命往其欽佩務稱寵榮可

郭獻卿男莊宅副使鎮可轉兩官制

敕具官某爾父國之嫵戚淹其淪亡遺奏祈恩以爲爾寵朕用憫惻進爾官榮圖稱所蒙無忘忠孝可

承議郎試戶部尚書劉達翰林學士朝散郎知制誥張康國朝散郎試尚書禮部侍郎王能甫朝奉大夫試尚書工部侍郎管師

仁可各轉一官制

敕朕集神考詔禮既藏之顯謨與詩書並傳垂訓萬世爰推慶典

以惠史臣具官某等學問文章時望所屬雍容爾列載筆汗青宸集備成嘗預典領用加甄獎序進厥官往其欽承無或謙避可

右武衛大將軍吉州防禦使世設可轉一官制

敕朕於羣臣之有功者雖遠不忘錄其世類矧宗室近親恩紀宜厚者乎具官某爾父從古受命仁廟敦諭英祖趨定儲極朕所追懷用錫爾祉大邦禦侮擢正使名服茲寵榮務先謹恪可

知開德府顯謨閣直學士朝奉大夫李孝壽可轉一官制

敕侍從之臣服采於外有勞當錄朕豈弭忘具官某材術之優歷踐煩劇比修北輔供億不愆宜錫恩章褒進厥序體茲異數尚加勉哉可

翰林學士鄭居中可轉兩官制

敕朕親御翰墨刊定學校之政令科條纖悉取成於心編次之臣以書來上爰推慶賞褒敘其勞具官某氣節端方材猷闕廓文章學問望實顯隆雍容禁林與茲典領宜膺寵命擢進品階往體眷

知無忘欽佩可

禮部侍郎劉正夫可轉兩官制

敕朕御翰墨刊定學校之政令科條纖悉取成於心編次之臣以書來上特推慶賞時乃茂恩具官某服在儀曹與茲典領例升位秩朕不汝遺往其欽承無忘稱塞可

起居舍人蔡蕤可轉兩官制

敕朕親御翰墨刊定學校之政令命官編次既獻成書在局之臣宜均慶賞具官某學術辭采嘗冠諸儒論議純明業履維稱服在右史與茲討論擢進厥官以示甄獎往其欽佩益懋厥修可

左藏庫副使楚沙木可轉一官制

敕具官某爾躬冒矢石以有戰多幕府奏功按級序賞進官一等於爾爲榮可

西京左藏庫副使王偉可轉一官制

敕具官某爾奮武疆場以克有功閱級序恩昭示嘉獎服茲明命

尚加勉旃可

西綾錦副使兼翰林醫官副使蓋演醫官副使盧德誠翰林醫官

賜緋丁銳翰林醫學李師老可各轉一官制

敕具官某等爾等祇事衛府醫診有勞宜錫恩章昭示嘉獎進官一等其克欽承可

供備庫副使李庠可轉一官制

敕具官某惟爾率職不愆宜有甄獎用錫明命寵進厥官往務欽承勿替勤恪可

翰林學士鄧洵仁可轉一官制

敕大禮彝制閣門定議比命有司特加編次稽其功緒宜錫恩章具官某操履端方學問純粹文章論議夙有顯名兩獻成書條理該盡擢升品秩以示寵嘉往服邦榮並思報稱可

宣德郎尚書膳部員外郎王澤通直郎尚書職方員外郎李康彥

可各轉一官制

敕具官某等樞筦修書既成來上夙以推擇久與討論宜進厥官昭示寵獎往其欽佩務稱恩榮可

朝奉郎大司成兼侍講薛昂可轉一官制

敕夏人入貢邦有常儀命官刊修以垂永制成書來上功績可嘉具官某學問文辭朕所眷任資其詳定條列該明宜錫恩章昭示寵嘉進官一等往惟欽承可

右藏庫副使柴定官可轉一官制

敕具官某數級塞下爾預有功宜進厥官以勵忠勇錫茲明命其克欽承可

文思副使馮鐸可轉一官制

敕具官某爾父預修貢儀例有褒賞移恩子姓朕所嘉從進爾一官往其祇服可

奉議郎歐陽大椿可轉一官制

敕具官某惟爾弗徇請謁舉發其私吏守若茲氣節可尚擢升官

次副以優恩今命近官特加審察體予甄獎往其懋承可

閤門祇候劉敷可職上轉劉婕好弟劉牧劉敏可轉一官制

敕具官某等宮闈嗣慶恩及外官爾等俱以恪勤之資列於戚里與茲寵典兄弟聯榮或擢進職名或序遷品秩往其欽佩務稱所蒙可

左藏庫副使蘭日政可轉一官制

敕具官某爾服職有勞達於朕聽宜加褒陟示不弭忘序進一官往承無斁可

太醫丞趙宗元翰林醫官趙嗣先可轉一官制

敕具官某等軍器建局爾預有勞擢進厥官以示甄獎往祇乃服無替恪勤可

醫官熊希賢可轉一官制

敕具官某惟爾醫診之良克有勞效宜優常裕序進厥官往務欽承無替勤恪可

醫官王舜康張節可各轉一官制

敕具官某等爾父醫診有勞移恩子姓宜遷爾秩錫以命書往服恩榮益勤世業可

醫官卓遵國可轉一官制

敕具官某惟爾醫診之良克有勞效宜遷位秩以示寵嘉往服命書益勤厥藝可

軍器庫使兼醫官使卓遵國醫官使王處厚軍器庫副使兼醫官

副使張希房蓋演高明之西綾錦副使兼醫官副使趙廣文醫

官副使張漸王舜民太醫承直醫官劉景溫太醫丞張永醫官

任元善可各轉一官制

敕具官某等朕荷天之休後星嗣慶爾等或與祇奉之賞或膺回授之恩均被寵命序升品秩往精厥藝務稱邦榮可

太史局丞袁惟幾可轉一官制

敕具官某新膺成書爾惟推測特蠲常格寵進厥官往承朕恩務

先恪守可

醫官國士英男之實醫官張倚男節可各轉一官制

敕具官某等爾父祇事有勞宜膺慶賞許其回授時乃異恩茲錫命書序進爾秩往精世業以稱所蒙可

權易副使兼翰林醫官副使潘先之可特轉一官制

敕具官某爾以方劑之勤奉事王府閱歲已久宜錫恩章擢進厥官往其祇服可

醫官卓遵國可轉一官制

敕具官某爾父以醫診之良勞列可獎移恩子姓進爾官榮其往欽承益承世業可

東頭供奉官劉選可轉一官制

敕具官某爾出入行陣驍勇有聞稽其戰多宜有優賞進官三等昭示寵嘉圖稱所蒙無忘忠義可

崇班張璠與轉兩官東頭供奉官張瑛與轉一官制

勅具官某等爾等奮武疆場克有戰多幕府以聞朕所嘉尚賜遷品秩以勵遠臣往服新恩益思報稱可

東頭供奉官王世益衛采各轉一官制

勅具官某爾等奮武疆場克有戰多幕府以聞肆遷品秩以勵遠臣往服新恩益思報稱可

三班奉職王崇善左班殿直李弼各轉一官制

勅具官某等宮闈崇封恩加外屬以名來上朕所嘉從往服寵榮勿忘勤愆可

左藏庫副使尹正供備庫使兼通事舍人潘翊可轉一官制

勅具官某等宸閣定儀成書來上爾等與有勞勩宜錫恩章序進厥官往承無斁可

醫官王處厚可轉一官制

勅具官某爾弟師厚宜醫有勞宜錫恩章迺以回授用進爾秩往其欽承可

右侍禁蘭泰舒世亮右班殿直陳絳可各轉一官制

勅具官某等宮闈嗣慶爾等俱以祇奉之勞與升品秩服茲寵命無替恪勤可

降授內殿承制李青鋼可轉一官制

勅具官某爾統率所部擊賊有功宜進厥官以示甄獎往服寵命尚加勉哉可

朝奉郎劉辟疆可轉一官制

勅具官某爾曩奉使軺往按保伍服勤職業克有事勞抗言祈恩朕命甄錄進官一等於爾爲榮可

大理寺捉事使臣朱渙可轉一官制

勅具官某惟爾緝捕之勞宜膺賞典進官一等往務欽承可

西頭供奉官張彥廓可轉一官制

勅具官某祈事宗藩恪勤不懈茲以恩數祇進爾官用錫恩章往其祇服可

內殿崇班劉宗彥可轉一官制

敕具官某惟爾營繕之勤宜有甄獎進官一等往服恩章可承議郎張勗東頭供奉官辛宗可各轉一官制

敕具官某等朕建外宗正於洛師今措置就緒宗子肅戢雖朝廷教養之備爾預有勞序進厥官以示甄獎尚加勉哉可

蕃官皇城副使葉吉特可贈三品制

敕具官某爾效職邊陲沒於王事忠義之節有惻朕心優錫愍書以慰窳窳尚其不昧亦克歆承可

內班殿直閤門祗候殿中省尚贊奉御劉安國可轉一官制

敕具官某爾擢左御府勤愆不愆逮茲終更法有褒賞用錫明命敘進厥官往服朕恩愈加勵勉可

東頭供奉官默特博與轉一官制

敕具官某以驍勇之資遇敵決勝斬馘既多兵無亡矢進官一等以示寵嘉往服恩章愈加激勵可

摘文堂集卷八

制

皇城副使某與轉兩官制

敕具官某清平之使惟爾禦敵追奔克有勞烈進官二等以示寵嘉往其欽承無替忠恪可

皇城副使沈貴與轉兩官西京左藏庫副使何先明供備庫副使

董修古東頭供奉官馬制蕃官左藏庫副使吹忠可轉一官制

敕具官某等惟爾決戰取勝功緒可嘉宜進官榮以示甄獎往承無替嗣有恩章可

前內殿承制董厚與轉三官制

敕具官某爾驍勇過人臨敵用命率先士卒以立戰多宜錫優恩

昭示獎激進官三等其往欽承可

東頭供奉官密桑與轉一官制

敕具官某順盜之役爾預有功宜進厥官以勵忠敢往承無替朕

不弭忘可

蕃官皇城副使旺默星及蕃官左藏庫副使旺密桑各與轉一官制

敕具官某等爾深入寇境決戰立功帥師以聞宜有甄獎遷官示寵於爾爲榮可

東上閣門使楊應詢可轉一官制

敕疆場之臣朕所睠察錄其勞列錫以恩章具官某材藝之優擢在邊要審於備豫斥候惟明不有褒升何以示勸進官一等其往欽承可

東頭供奉官高士侯可轉一官制

敕具官某披堅執銳以立戰多閱級序恩昭示獎激擢升位秩其往欽承可

左班殿直种師閔與轉三官制

敕具官某爾深入決戰驚勇可嘉帥臣奏功閱級第賞進官三等

其往欽承可

蕃官文思副使賽音與轉一官制

敕具官某爾逢賊決戰以克有功驚勇之資良可嘉尚按級序賞其往欽承可

西頭供奉官由稔與轉兩官蕃官東頭供奉官幹明善與轉兩官蕃官供備庫副使香瑪與轉一官制

敕具官某爾等乘勢追襲誅馘強敵稽其功次擢進厥官往服恩章無替忠敢可

右侍禁侯公瑾可轉一官制

敕具官某惟爾祇事恪勤克有勞列宜膺懋賞擢進厥官往服命書尚多後祉可

內殿崇班策喇卜沁與轉一官制

敕具官某爾臨敵驍勇克有戰多擢進厥官以示嘉獎欽予時命尚其勉旃可

東頭供奉官張士廉西頭供奉官馬先賀世安左侍禁南信可各
轉三官制

敕具官某惟爾等逢賊決戰斬獲既多幕府以聞宜加優賞進官
三等往其欽承可

降授西京作坊使孫慶可轉一官制
敕具官某爾馘斬既多仍執強敵帥司條上功狀甚明擢進厥官
往承無斃可

西染院使王元轉兩官制

敕具官某惟爾奮武邊陲誅擊強敵兵無亡矢閱級爲多宜錫命
書昭示嘉獎進官二等其往欽承可

三班借職李通可特轉一官制

敕具官某爾右選小臣而其姓名達於朕聽擢升位秩於爾之所
遇可謂榮也矣往服命書勉思稱塞可
故供備庫副使張吉可贈三官制

敕具官某惟爾效職邊陲死於行陣忠義之節朕心所嘉優進厥
官以示褒卹魂而不昧尚克監茲可

右班殿直王伉可轉一官制

敕具官某惟爾率職有勞宜加甄獎進官一等其往欽承可
東頭供奉官劉振可轉一官制

敕具官某惟爾殺獲凶寇勞力可嘉擢進一官往加勵勉可
魯斯結族蕃官侍禁節幹結斯結可各特與轉一官制

敕具官某等爾等忠義不渝奮身內附捕獲奸細達於朕聞褒進
一官庸示獎激往加勵勉以副恩章可

蕃官東頭供奉官索琳密密保默齋皇城使默實勒奇多伊內殿
承制牛威名東頭供奉官威女篇鼎內殿崇班蒙伽恪各與轉

一官制

敕具官某某爾等奮身內附來造闕廷誠節若茲宜示獎激用加
褒擢序進厥官祇服恩章勉圖忠報可

東頭供奉官王正臣與轉一官制

敕具官某爾出入行陣克有戰多序進一官庸示獎激往圖顯效以稱恩章可

侍禁吳志可與轉三官制

敕具官某惟爾奮武決勝誅擊寇攘闕級既多兵無亡矢宜推優賞以勵遠臣用錫命書擢官三等往加勵勉務稱恩榮可

奉職王谷可轉一官制

敕具官某理寺修書既成來上惟爾預有勞績宜進厥官往承朕恩無替勤恪可

文思使胡德淵供備庫副使耿臨供備庫副使曹歷蕃官西京左

藏庫副使蘇默可各轉兩官東頭供奉官張易文思副使張永

德禮賓使曹修蕃官左藏庫副使將凌蕃官供備庫副使香瑪

可各轉一官制

敕具官某某爾等服在邊陲見謂忠勇斬馘強敵克有戰多帥師

以聞按級第賞進遷位秩昭示寵嘉尚圖後功嗣膺褒擢可

西頭供奉官陳殊可轉一官制

敕具官某爾屢膺賞典引例自陳宜進厥官以勸勞績往慎乃服勿替恪勤可

供備庫副使李珍路璉西頭供奉官李希成右侍禁朱渙可各轉

兩官制

敕具官某等茶場奏課爾預有勞宜進厥官以示甄獎往加勤恪務稱恩章可

供備馮熙與轉一官制

敕具官某惟爾效職邊圉與有戰多抗章自陳朕命甄敘進官一等時乃異恩往懋忠勤以圖報稱可

左班殿直劉湜三班借職朱渙右班殿直陳若拙太醫丞趙宗元

翰林醫官趙嗣先可各轉一官制

敕具官某等軍器建局工用不愆爾率職於茲與有勞勩進官一

等往其欽承可
右侍禁胡誼與轉五官制

敕具官某爾奮武以忠抗賊決勝兵無亡矢闕級爲多帥司奏功朕所嘉懌進官五等時乃異恩往其欽承益思報稱可

東頭供奉官李佐可轉一官制

敕具官某爾統率所部禦敵有勞斬馘旣多兵無亡矢進官一等以示寵嘉尚其勉旃益彰後效可

河東轉運判官王勤可轉一官制

敕具官某爾奉使晉郊經畫議事課額增羨功緒可嘉擢進厥官以示甄獎往服寵命無替恪勤可

奉議郎于彥佐可轉一官制

敕具官某爾出宰百里克以材稱察其設施頗見成效宜膺褒賞擢進品階往承朕恩益思所稱可

皇后閣祇候使臣竇瑛祇應人石君許可各轉一官制

敕具官某等爾以祇事克勤預膺慶典進官一等其往欽承可

左藏庫副使閤門通事舍人劉公輔可轉二官劉慎內殿崇班李

庠東頭供奉官王坪各轉一官制

敕具官某惟爾追獲新冠克有戰多宜進厥官以示褒賞往服恩命尚加勉勵可

內殿承制魏舜臣李彭年供奉官郭彥趙令淘李永年彭汜侍禁

葛鞏王汴張克敞李從古殿直李淑程輓李中正奉職楊幾道

借職李南仲可各轉一官制

敕具官某等比修北輔爾預有勞宜進厥官以示甄獎往承恩命無替恪勤可

承議郎翟師中可轉一官制

敕具官某朕設賞格付之有司凡子大夫趨事赴功利及吾民者不及賞祿以寵之爾經畫渠堰克有成績宜進厥官以爲能吏勸往服恩命無替爾勤可

西頭供奉官張和可轉一官大將康師顏可特轉三班借職制
敕具官某等朕追懷恭懿錄其舊人爾等俱以祇奉之勤錫茲恩
典往加勵勉務稱恩榮可

故淑妃張氏姪張琬張瑾可並補借職制

敕具官某等故妃遺言祈恩近屬錫爾一命往其欽哉可

婕妤張氏姪孫張承可借職制

敕具官某宮闈進位以恩回授命爾官使往其欽承可

故駙馬都尉曹司女夫進士時微可借職制

敕具官某爾為倩于尚主之家獲備官使無忘勤恪以報恩章可

醫官周道隆任景章楊處厚大將耿道淳韓中立書藝局藝學許

成吳成翟易韓奕曹成趙承圖陳德之張友王從志蹇仲恭韓

球圖書局藝學元方卞士端元導尚從吉杜宗範郭惟簡可各

轉一官皇城使榮州刺史宋渙姪男棧皇城使俞隨男儋左藏

庫使杜公才兩姨弟劉渥已上三人各回授補借職制

敕具官某等朕卽英祖舊邸崇建寶坊爾等或與祇奉之勞或膺
回授之典錫茲寵命往其懋承可

景福殿使明州觀察使楊戩親堂姪茂實可借職制

敕具官某姪爾之諸父率職禁廷有勞當遷許其回授用錫爾秩

時乃異恩宜懋忠勤往圖報稱可

程植可三班借職制

敕具官某爾以勇敢效用克有戰功錫茲官榮往加勵勉可

故三班借職紀育弟紀震可三班借職制

敕具官某弟某爾兄奮武戎行委身徇國嘉其忠節悼念不忘錫

爾以官往惟祇服可

兩朝佑聖太夫人重姪孫仲康仲弼可並三班借職制

敕具官某等朕追懷恭懿褒卹其家錫汝恩章列於命秩往服事

任無忘恪勤可

太后殿掌牋奏耿茂直劉豫可並特授三班借職制

敕具官某某爾等職在箋筦預茲慶恩命以官榮往祇乃事可
楚州解發到呈試武藝人劉決可借職制

敕具官某爾試藝殿廷武勇可獎錫之命秩俾服事勞往克懋承
尚可褒擢可

百姪滑永全可三班借職制

敕具官某惟爾敏於筆札祇奉有勞擢自民編錫茲命秩仍加餼
廩併示勸能往懋恪勤以稱恩典可

故右侍禁尚清男均坦可並授三班借職制

敕具官某等朕推恩死事之孤以勸忠義錫爾命秩其往欽承可
左知客押衙兼知進奏事崔通可三班借職制

敕具官某爾以勞能達於朕聽錫茲命秩其往欽承可

故右班殿直馬宣男某可三班借職制

敕具官某爾父死於行陣臣節可嘉優卹其孤維以示勸授之命
秩仍錫美名往服恩章勿忘忠孝可

故內殿承制李仙長男峻次男疇孫忠履可並與三班借職制

敕具官某等爾父效職邊陲死於金革肆推恩典優卹其孤服茲
官榮無忘忠孝可

故太中大夫魏漢津親女夫張清可三班借職制

敕具官某漢津之家祈恩於爾錫茲命秩其往欽承可

皇后三從伯王子約可三班借職制

敕具官某爾以戚屬之良預茲慶典官於武列往卹事功圖稱所
蒙莫忘忠恪可

故右侍禁張安民男思賢思忠可並三班借職制

敕具官某等爾父奮不顧身死於金革推恩子姓惟以勸忠服茲
命書無替厥紹可

故三班借職紀育男塔達克與三班借職制仍賜名紹

按永樂大典原本此
題上有蕃官三班奉職李宗男永謹可三班借職制十七字文
不相屬與制詞亦不相符顯係當時繕寫誤衍今謹刪正附識
於此

敕具官某男某爾父奮身疆場效死戎行有司以聞朕所悼念錄爾命秩併賜美名移孝爲忠茲爲克紹可

潭州都知兵馬使張繼隆可三班借職制

敕具官某帥臣上言爾有勞效命以官使往其欽承可

茶園班殿侍鄭永立可三班借職制

敕具官某爾父監督有勞宜加甄獎以資回授時乃特恩錫爾官榮往思所稱可

虎翼右第一軍都指揮使秀州刺史陳與男寶文御龍直長行李

謹可並三班借職制

敕具官某等朕推恩死事之家以勸忠義命爾官使往其欽承可

三班差使房從壽可三班借職制

敕具官某爾久服事勞宜有褒敘命以品秩往其欽承可

故右侍禁王卞女夫薛安靖可三班借職制

敕具官某爾之外舅以身徇忠推恩其家爾名來上錫茲命秩往

務欽承可

故右侍禁王卞男錫可三班借職制

敕具官某惟爾父奮不顧身死於金革宜推恩典優卹其孤錫爾官榮往圖報稱可

睿思殿御前文字外庫書寫文字郭景倩可三班借職制

敕具官某爾以書札之勞宜加甄獎錫茲命秩其往欽承可

大將軍發運司前行徐楷可三班借職制

敕具官某惟爾久服吏勤克有勞列錫茲命秩其往欽承可

入內內侍省東頭供奉官周莘可入內內侍省內殿崇班魏國

惠和康佑夫人薛氏親姪薛敏政太后親舅女之夫姜天祐可

並三班借職制

敕具官某等天監錫慶國有舊章爾等或祇事內廷或綴名外屬咸預恩典進服官榮圖稱所蒙毋忘勵勉可

皇弟故荆南武寧等軍節度管內觀察處置等使守太師開府儀

同三司荊州牧兼徐州牧蔡王贈太師尚書令兼中書令加冀州牧改封韓王可特追封楚王餘如故制

敕朕賴神考之貽燕承上帝之降康薦獻祠宮奉衣冠而永慕願瞻甲館思居處以如存方深追往之誠爰有因心之感具官某稟資和粹迪己慈祥肅恭克著於朝儀謙讓不愆於侯度毓德雖厚享年弗遐宜加贈卹之章昭示褒崇之意是用相攸大國益侈眞封務極哀榮優加愍飾光靈未泯歆懌在茲可

皇兄故河東山南西道節度觀察處置橋道等使守太師開府儀同三司太原牧兼興元牧陳王賜入朝不趨詔書不名贈尚書

令加徐州牧改封燕王可特加贈侍中追封吳王餘如故制
敕朕永懷孝思念茲皇考瞻衣冠於原廟如奉眸容覩梁楛於寶坊是爲甲館欲申雨露之感用推手足之恩於其淪亡尤所傷惻具官某蘊慮純靜稟質惠和閱義理而無充詘之心循法度而有柔嘉之則積德雖厚享年弗遐宜增褒卹之章昭示友恭之義是

用嘉隆名數錫左省之貂蟬大啟土疆建全吳之茅社再推愍飾務極哀榮尚想光靈亦知歆懌可

皇兄故河東山南西道節度觀察使守太師開府儀同三司太原牧兼興元牧陳王賜入朝不趨詔書不名可贈尚書令兼中書令加徐州牧改封燕王制

敕朕立愛以始基王化因心以敦敘天倫迺睠近親莫如同氣生則體貌盡其禮歿則哀榮稱其情爰錫愍書特優贈典具官某稟資忠孝持己謙恭作德而心日休遜志而學時敏東平爲善高密任眞謂宜壽考之遐永綏福履之茂比云寢疾亟往幸臨方決冀於有瘳胡奄罹於不淑聞音哀慟觸緒感傷非極哀崇曷伸願卹是用峻加異數增煥寵章位冠上公名兼兩令恢土疆於奧壤併牧徐方徙茅社於大邦改疏燕國以示賢賢之義以隆貴貴之恩尚想英靈克知歆懌可
右驍衛將軍有奕可大將軍遙郡刺史制

敕具官某追往撫存務隆恩紀閔予同氣爰卹諸孤惟爾休慶所
鍾夙有令聞宜遷位秩加以郡章仍詔有司優其餼廩併茲異數
昭示眷懷祇服命書永綬祉福可
故燕王第三男賜名有常可右武衛大將軍制
敕具官某追往撫存務隆恩紀閔予同氣爰卹諸孤惟爾休慶所
鍾生有淑質宜加顯秩賜以美名仍詔有司優其餼廩併茲異數
昭示眷懷祇服命書永綬祉福可
故燕王第二女可封郡主制
案封燕王第三女制與此制同茲不並錄
敕具位某氏朕痛念天倫奄其淪謝推恩息女用稱情文惟爾鍾
慶有原夙著婉淑宜疏湯沐主茲大邦仍命有司繼其廩給往綬
祉福以副眷懷可

安康郡主趙氏可封兩郡主制

敕朕謁款祠宮永懷祖烈念濮國之息女實先帝之諸姑申錫寵
章特頒異數具位某氏柔慈純靜淑慎謙恭譽優圖史之傳動協

聲詩之訓宜加爵命增衍郡封是用考茲輿地之名隆其湯沐之
奉庶幾褒揚於懿德豈惟敦睦於近親往對恩榮益綬壽祉可

皇叔右千牛衛將軍仲璵所生母楊氏可封瑞安縣太君叔右千

牛衛將軍仲憲所生母陳氏可封長安縣太君叔嘉州防禦使

世膺所生母永安縣太君李氏可封咸安郡太君制

敕具位某彌月慶辰天畀純嘏均休屬籍時庸展親恩如所生錫
以封爵其綬壽考茂對寵榮可

皇伯故太保節度觀察畱後仲臯可贈開府儀同三司追封榮國

公制

敕朕於屬籍之親哀榮終始務稱情文所以本人倫敦天下也具
官某稟資和粹持己端莊序於內期樂循矩則淹其淪謝有惻朕
心用錫寵章追加愍飾贈官開府仍錫公圭尚其有靈克有歆懌
可

中大夫守尚書右丞梁子美故曾祖任翰林學士右諫議大夫贈

太師中書令兼尚書令周國公顯可贈開府儀同三司追封燕國公制

敕朕登用忠賢與之共政中外交慶僉曰得人因其拜命之初寵以褒親之典具官某文章華國論議佐時官歷諫垣職聯詞禁積德深厚是生曾孫克以才猷位于近弼推原所自宜有追崇開府隆名禮同三事易封燕土增衍舊邦服茲茂恩尚其歆懌可

故曾祖母唐國太夫人閻氏可贈冀國太夫人制

敕仕宦而至近弼其淵源所自豈一日之澤哉故褒崇之恩上及於三世所以慰孝子慈孫之心也具官某曾祖母某氏稟質慈祥宅心敦厚德配君子化行閭門錫祚流光慶鍾後裔擢與大政師言允諧推原厥初宜加寵命相攸大國有此冀方增衍舊封以賁窀穸尚其不昧亦克歆嘉可

故祖任太子太傅致仕贈太師中書令兼尚書令秦國公適可贈開府儀同三司追封鄆國公制

敕朕眷禮大臣恩數優異褒親之典稱其情文所以為在位者之勸也具官某佐佑昭陵實惟先正像列原廟名紀冊書勳德顯庸澤流後裔致位近弼紹休前人宜錫寵章追加愍飾開府顯秩汶陽大邦增衍舊封以慰窀穸英靈雖遠尚其如存可

故祖母越國太夫人任氏可贈曹國太夫人制

敕朕紹隆孝治禮優輔臣追榮其先務極崇顯祿章愍冊國有典常具官某祖母某氏柔順慈祥動循訓則儷德先正慶鍾後人是生慈孫佐佑幾政宜膺寵命增衍舊封濟陰大邦俾為湯沐歿而不昧尚克知歆可

故父任尚書職方員外郎贈光祿大夫彥昌可贈太子少師制

敕朕惟執政大夫臣望實顯隆致位近弼義方之訓自其前人追加表揚用錫休命具官某材猷宏廓器識高明揚歷仕途積有隱德潛於郎秩不滿其能源深流長慶鍾子姓朕所柄用師言允諧東宮之孤名寵秩峻舉茲賁世期稱情文尚想英靈克知歆懌可

故母東平郡太君張氏可贈清河郡太夫人制

敕君子之念其親跬步不忘閱予執政大臣位雖顯矣而親弗見其榮祿雖豐矣而親弗逮其養肆有追崇之典以爲孝思之誠具官某母某氏柔明肅雝雖婉懿沖靜婦道以順母義以慈積厚愛隆鍾于子姓擢在廊廟惟予得人宜錫茂恩加隆封爵清河大郡爲爾相攸尚克欽承永綏厥後可

妻文安郡君宋氏可封文安郡夫人制

敕朕惟卿士大夫其業履顯聞於時者必有內助矧執政大臣勳德之盛乎故疏榮之典及於閨門豈特示朝廷之恩亦以爲室家之勸具官某氏稟資靜專率禮恭恪內行敕備宗姻所賢來嬪慶門克相君子夙夜警戒致位近司婦貴從夫國有彝制文安大郡時汝舊封登崇號名親品爲峻膺茲異數壽祉維寧可昭信軍節度觀察留後駙馬都尉郭獻卿可贈節度使制敕位列駙馬國之姻戚奄茲殂謝有惻朕心宜優哀卹之恩以盡

哀榮之禮具官某宅心純靜操行恪恭自膺選掄允彰譽處謂宜壽祉胡不永年作鎮大邦建旄秉鉞舉以追錫用稱情文尚其有靈亦克知享可

高永翼特贈正任防禦使制

敕具官某疆場之臣奮武行陣朕念其功閱其勞未嘗須臾忘也其或不幸以死則哀卹之儀在所加厚爾忠勇自效積有戰多方膺寵嘉俾虔武服云胡不弔遽以疾終禦侮隆名特優贈典尚其不昧享此顯榮可

正議大夫致仕宋喬年特贈金紫光祿大夫龍圖閣學士制

考終天命享有死生哀榮之隆追錫爵名相其春秋窳窳之事凡今昔往孰盛與夷乃眷賢勞特隆異數具官某名臣之後尚有典型近侍之華鬱爲國器方將顯用以究遠圖曾不有年嚮用茲福然自古有死疾沒世而無稱太上立言惟託名爲不朽其加五命之寵以慰九原之思嗚呼傷哉蔑之命矣反席於寢嘉爾易簣之

言納書於棺副爾乘車之錫可

武勝軍節度觀察留後王厚可贈節度使制

敕疆場之臣朕所睠卹於其淪謝宜示褒崇具官某曩膺選掄往督西旅前人是似於國有勞品秩寢隆寵榮未艾云胡不淑遽以疾終追錫使名俾建旄鉞時惟優典以慰九原尚其有知亦克歆懌可

宮人掌記張氏可封大寧郡夫人制

敕具官某朕念茲恭懿保佑兩朝奄及淪亡夙夜傷惻褒崇賁飾既極情文錄其舊人益彰異數惟爾列於宮案勤愷可稱昔事神考獲與潛邸疏封之典在爾爲宜相攸大寧啟茲湯沐往承恩命務保寵榮可

兩朝佑聖郡太夫人親嫂同安郡太君蔡氏可封郡太夫人制

敕朕永懷恭懿保翊累朝始終忠勤年高德劭自其淪謝虞悼不忘爰舉恩章施於近屬具位某氏閨房毓秀婦德惟優宜膺寵嘉

隆進封爵往其欽佩益介眉壽可

耀州華原縣五臺縣真人廟封妙應真人制

敕某山川勝境仙聖所居其盛德懋功顯聞於世者朕必秩而祀之惟真人生於有唐見謂隱逸應物之迹具載史官廟食平原時乃鄉縣祈禳休貺美利在民肆加褒崇特建崇號尚其歆懌永福此邦可

臨江軍清江縣閣阜山景德觀葛仙翁壇封冲應真人制

敕某山川勝境仙聖所居其盛德懋功顯聞於世者朕必秩而祀之惟真人言行所稱咸造宗極出入無眚與道翱翔壇於琳宮積有年所祈禳休應美利在民肆加褒崇特建崇號尚其歆懌永福此邦可

光州孫叔敖廟祈禱感應擬遺愛侯廣信軍遂城縣班妃廟祈禱

感應擬文惠夫人制

敕某朕稱秩祀事廟食之祥既載諸有司又賁以封爵所以教天

下之恭也惟神有德有功靈貺昭著宜從民欲申錫褒章尚克歆
嘉永福茲土可

摛文堂集卷八

摛文堂集卷九
制

宮正張氏可同知尚書內省公事制

敕朕惟國家建省於內以總女官之職政本所繫蓋與外之中臺
無以異也肆于用人考擇尤慎具官某氏性識疏通材資敏濟持
身端慎澁事恪勤曩膺褒揚位於宮正業履之美聞譽益彰宜服
絲綸之言進聯喉舌之任往加勵勉務稱寵榮可

宮人掌闈蕭氏可封司言制

敕具官某氏後宮二十四司分建寮案協贊內治豈惟示恩以汝
性質柔和容儀端懿恪勤恭慎率禮不愆自列備官欽承無替嘉
其譽處宜有褒升用錫命書擢升位等宣傳啟奏命汝司之往對
寵章益綏祉福可

宮人王氏可特受掌言制

敕某氏宮廷宣奏職在掌言屬於尚宮秩任清美惟爾恪勤自飭

婉靖有儀祗服事勞動遵內則錫茲榮品以示褒優往承欽恩豈
俟多訓可

宮人掌珍韓氏可典記制

敕具官某氏宮廷宣奏職在掌司屬於尚宮秩任清美惟爾服勤
禁掖進列備司恪謹有常咸謂敏濟典記之選以示寵嘉往其懋
承承綬榮祿可

宮人典言喬氏可尚儀制

敕具官某氏後宮六尚之職分總二十四司聯事合治與外廷之
六卿無以異也品秩既崇選授維慎以爾稟資婉靜履德懿柔恪
勤能敏於事爲恭穆動循於禮法宜加明陟以示寵褒惟經籍音
樂凡賓客朝會班序贊拜皆總於尚儀其任可謂隆矣今以命爾
豈不榮哉可

宮人掌綵楊氏可司樂制

敕具官某氏朕閔茲恭懿奄及淪亡哀飭之文恩紀優異肆有寵

獎錄其舊人惟爾夙以專勤進列宮案服職愈勵克著譽言宜錫
命書進擢司樂往安祉福益保顯榮可

婕妤劉氏可特授婉容制

敕國家設案宮闈以聽內治惟九嬪掌教四德名秩隆顯考擇之
慎必惟賢柔具官某氏性資敏明儀矩端靚動遵婦學言協聲詩
夙興詳求擢參顧侍恪恭不懈持久益彰乃茲獻歲之初聿有後
星之慶疏榮示寵厥惟典常其進聯於六儀以登視於一品服茲
茂渥福履宜之可

平昌郡君韋氏可才人制

敕朕顧諟明命以承天休堯寢吉祥在予妃輔裒崇之數茲惟典
常迺形奏章移恩鞠女察其謙德特有嘉從具官某氏志慮柔明
性資和適言容兼穆禮法交修曩膺眷知肇啟湯沐服寵加懋稱
譽日聞宜升五品之封俾爲六宮之勸往安祉福茂對邦榮可
誥

鄭居中除同知樞密院詰

敕朕賴帝博臨中外晏肅思與良弼其承天休乃眷西樞實總兵柄登貳厥職必爲一德之臣具官某方嚴惇大沈靜粹和學全經術之醇識造古今之要曩自瑣闥延賓禁林文章典嚴論議鯁諤閱日滋久聞譽益彰察其公忠國是允賴宜升右府列於近司於戲惟協恭可以謀國惟遠慮可以濟功祇服訓言是爲報稱可
鄧洵仁除翰林學士承旨詰

敕學士視草玉堂極儒臣之寵而承旨專奉密命則又以其久次者爲之祖宗已來士之與此蓋無幾也具官某業履端靖學問醇深揚歷清華進掌內制文章論議聲實顯隆閱日滋多朕所瞻察宜以舊制冠於禁林往其懋承以副寵渥可

殿中少監劉昞可免試除中書舍人詰

敕西掖詞垣與聞幾政討論潤色必惟其人具官某學有淵源文知體要揚歷清貴望實兼隆比自螭坳進直御府率職勤毖朕所

簡知其獨給札之儀擢真代言之列往加勵勉副朕異恩可
楊愿除中書舍人詰

敕中書基宥密之地擇屬維艱舍人演絲綸之言非才莫據取諸已試茲謂得人具官某端厚無華清明不撓有聞當世早著盛名仲舒潛心諸儒之論咸服何蕃正色六館之節自高建歷華途挺然自守頃從柱史兼直禁垣善惡謹於必書文章妙於行遠就升厥次式副僉諧夫大哉王言儻能孚四海之聽則坦然帝制自遠超西漢之風其懋爾猷益稱朕意可

龍圖閣直學士中大夫李南公特除落致仕詰

敕朕治四海以孝御羣臣以恩矧位列從班事經滌滌子爲父請朕所矜從具官某曩嘗廢居游該赦令寢還職秩猶處於家子誠抗言條舉近旨特加甄敘俾復故常往慎厥修以稱朕命可
口宣

賜皇子檢校太保鎮海軍節度使開府儀同三司廣平郡王生日

禮物口宣

卿毓粹皇闈承休霄極當誕生之初且有加賜之彝儀茂對寵光益綬祉福

就驛賜大遼國賀天靈節使副銀鈔鑼唾孟孟子錦被褥等口宣卿等使容有恪享禮無違宜膺頒齎之優昭示眷懷之厚往資服用式奉燕私

開府儀同三司仲爰四月二十八日生日口宣

卿聯上宰之近班總屬籍之重寄德隆宗姓望顯朝倫方誕毓之慶辰有寵頒之彝制用馳使指往諭朕恩

玉津園賜大遼國賀天靈節使副射弓例物口宣

卿等循用賓儀出遊射圃夙閑必中之技深嘉多獲之能爰有寵頒以彰優遇

宣召翰林學士劉嗣明口宣

卿問學之優文詞之美宜續綸言之密仍趣鄰席之嚴其副虛懷

益摠素蘊

賜臣寮口宣

有敕卿出將明命歸奏膚功升聯上宰之班進視貳公之秩用彰優遇其即欽承

賜皇子感德軍節度使檢校少保韓國公捷生日禮物口宣

有敕卿襲慶皇支分輝霄極當迺生之初且有加賜之常儀祗服寵恩益綬壽祉

賜高麗使人相國寺燒香乾果子口宣

有敕卿等虔依象教申祝宸祺載念遠誠宜優禮遇特加寵賜其體眷懷

撫問荆湖南路臣僚口宣

有敕卿汝等俱被選掄外分寄任宜加循拊用示記存茲敕使軫往宣德意

撫問資政殿大學士宣奉大夫大名尹梁子美口宣

有敕卿爲時舊弼守予北門茲履嚴凝諒加葆嗇宜致勞問用彰眷懷

就驛賜大遼國賀天監節使副內中酒果口宣

卿等並飭使輅來修鄰聘致匪頒於御府資燕喜於賓筵示以寵私體茲優眷

班荆館賜大遼國賀天監節使副回程酒果口宣

卿等並將厚幣舉穆賓儀茲旣抗於歸旃已載臨於候館宜膺嘉賜用示異恩

賜陝西河東路臣寮御筆敕書獎諭銀合茶藥對衣金帶鞍轡馬及支賜等口宣

卿以勳德之隆爲予掌武茲巡極塞克奏膚功肆親御於寶附特寵頒於宸札仍加蕃錫併示褒章其體至懷尚膺多祉

賜熙河等賞功諸軍特支併犒設等口宣
汝等奮忠禦侮護塞奏功特有匪頒仍加飫賜茲惟褒寵其體眷

存

撫問廣南東路臣寮口宣

卿汝等俱被選掄各膺委任緬懷勞勩宜示拊循茲敕使人往宣德意

撫問瀘南梓州路臣寮口宣

卿汝等祇奉詔條恪居官次宜加勞免以示記存茲敕使輅往宣朕旨

賜知樞密院事鄧洵武已下罷散天監節道場香酒果口宣

有敕卿誠深享上義切愛君茲原甲觀之祥式效華封之祝有蕃賜予爰示眷懷

天監節尚書省御筵賜知樞密院事鄧洵武已下酒果口宣

有敕卿服在帷幄時爲股肱茲逢紀慶之辰爰錫示慈之宴仍加好賜其體至恩

賜殿前指揮使高侗已下罷散天監節道場香酒果口宣

有敕卿夙膺眷待密侍禁嚴欣逢彌月之辰虔奉萬齡之祝宜加寵錫以示茂恩

賜寧海軍節度使開府儀同三司永嘉郡王向宗良已下罷散天寧節道場香酒果口宣

有敕卿位隆戚晚望竦朝紳屬逢出震之期虔奉後天之祝有嘉忠恪式厚匪頒

賜判大宗正事仲爰已下罷散天寧節道場香酒果口宣

有敕卿德著宗藩任司屬籍茲獻後天之祝載嘉享上之誠宜厚恩頒用彰禮遇

賜駙馬都尉石端禮等罷散天寧節道場香酒果口宣

有敕卿等揚譽朝聯參華戚晚茲逢慶節申祝壽祺宜膺頒齎之優用示眷懷之厚

賜大遼國賀天寧節人使朝見訖歸驛賜酒果口宣

卿等奉幣宸廷弭節賓館迺瞻禮容之飭宜膺好賜之優聊浣途

勤少資燕喜

賜節度使豫章郡王孝參已下罷散天寧節道場香酒果口宣

有敕卿等位顯朝班望隆宗翰慶乘乾之盛節修祝聖之彝儀宜厚匪頒用彰眷遇

賜高麗國進奉人使臘晨風藥口脂酒果口宣

有敕卿等修貢中都適逢蜡日有匪頒之庶品示眷遇之異恩俾奉燕私以介祉福

冬節高麗使人就館御筵賜教坊樂花香藥下酒上醞局白羊御酒酒果兼傳宣勸尚醞局供進御酒口宣

有敕卿等來造明廷適逢令節錫茲燕衍侑以聲文珍劑奇葩上罇嘉果併加存賜用示優恩

宜召翰林學士許光凝入院口宣

有敕卿學問宏深詞章粹美召自益部再直禁林方資潤色之工仍任論思之密其摠素蘊用副虛懷

賜高麗使人到闕朝見酒果口宣

有敕卿汝等俱奉朝恩恪居官次屬茲凝凜宜致拊存爰敕使輶
往宣德意

送判正旦使副沿路與賀北朝生辰并正旦使副相逢傳宣撫問
口宣

有敕卿等選自朝紳肅將使指載念馳驅之久諒多跋涉之勞宜
永記存特加眷撫

撫問成都府利州路臣寮口宣
卿等並膺朝寄克守官箴念忠馭之遠勤當炎威之方熾特加撫

諭以示眷懷

宣召翰林學士承旨鄧洵仁口宣

卿問學深醇文詞粹美夙筮詞林之直仍參經幄之聯茲錫寵章
進承密命其趣官次用副朕心

宣召翰林學士馮熙載口宣

卿術業之優詞章之美擢自學省延寘禁林方資潤色之能仍任
論思之益其趣成命用副虛懷

賜新除宰臣鄭居中劉正夫口宣

延登宰衡翼贊機政擢章屢至深嘉沖守之光成命已行方仰進
爲之美

賜新除知樞密院鄧洵武口宣

擢長樞廷蔽自朕志繼陳遜牘殊拂眷懷趣宜欽承勿勤多訓
賜熙河等路茶藥等口宣

卿等選繇朝著職在方隅有嘉勞列之優當致匪頒之寵欽承眷
撫益勵忠勤

奏狀

應詔舉官奏狀

準尚書吏部牒奉御筆手詔節文令從官各薦人材聞奏者右臣
伏覩從事郎試辟龐博士陳詢術業純明論議堅正前爲常州州

學教授當貢士之初體朝廷德意推行詔令委曲詳盡多士鄉風雖耆艾老儒白首肄業惟恐居後其所升貢能得元豐舊人又伏覩朝奉郎監在京榷貨務虞芹材質敏達濟以恪勤曩知鄆州平陰縣興修水利墾闢民田三千四百餘頃本路監司嘗以功利尤著奏聞臣謂如詢之儒雅芹之吏能皆有趨事赴功之實臣所備知伏望聖慈特賜采錄謹錄奏聞伏候敕旨

辭免召試奏狀

右臣今月二十二日准中書告報奉聖旨召臣試中書舍人者聞命震恐罔知所措伏念臣幸蒙聖慈擢自疏遠承乏諫省進備螭坳夙夜省循非臣犬馬之力所克報稱叨昧寵靈方懼瘵敗給札明試豈臣敢當矧詞垣以討淪潤色爲職獎任尤重選掄尤艱如臣材迂學淺拙於文辭儻不自量豈逃宸鑒伏望聖慈察臣誠懇特寢召旨庶幾微臣獲安分義謹錄奏聞伏候敕旨

除中書舍人舉自代奏狀

蒙恩授前口職準令節文諸侍從官授訖三日內舉官一員自代右臣伏見承議郎守國子司業蔣靜學術精深履行修潔文辭論議咸有本原與臣同鄉備詳所守臣實不如舉以自代謹錄奏聞伏候敕旨

辭免侍讀奏狀

右臣准閣門告命除臣兼侍讀者聞命震恐罔知所裁伏念臣蓬華諸生行能無異誤膺眷察寢歷從班人微塞重儻復叨冒必速悔尤伏望聖慈俯矜誠懇俾安分義特寢贊書所有告命未敢祇受

辭免兼侍讀奏狀

臣聞命震恐不知所措臣頃蒙收召再貳銓曹仰惟天地生成之恩至深至厚夙夜圖報顧未有涓毫自效矧金華進讀所以詳延儒臣而臣曩誤推擇久陪進讀空疏非稱自知甚明豈當復冒寵榮以速官謗伏望聖慈察臣誠懇特寢成命所有告命未敢祇受

辭免太子賓客奏狀

右臣准閣門告報已降誥命除臣太子賓客者聞命震恐不知所裁伏念臣出於寒鄉分安卑冗偶緣搜擇寔冒恩榮自列從班迨今十有四載曾微薄效仰稱萬分獨賴聖慈閔憐孤拙坐縻餼廩默愧於心惟東宮寮案之華以處時望區區自揆敢復叨塵伏望聖慈察臣悃悞特還成命所有誥命臣愚未敢祇受

除兼太子賓客舉自代奏狀

伏見承議郎權發遣夔州路提舉學事惠柔民性資冲粹職守靖共篤學有文邃於經術歷官中外眾所推稱舉以代臣實允公議辭免再除中書奏狀

右臣准常州送到尚書省劄子奉聖旨除中書舍人令乘遞馬疾速發來赴闕供職者聞命震恐罔知所措伏念臣曩冒寵恩備位詞掖才弗克稱默愧於心矧茲艱苦之餘舊學荒廢討論潤色豈分之宜伏望聖慈收還成命別除臣外任差遣臣見爲傷暑不安

依例乘船起發前去只候稍安晝時乘遞馬至國門聽候指揮謹錄奏聞伏候敕旨

辭免除起居郎奏狀

准閣門告報已降告命除臣依前承議郎守起居郎者聖恩深重非臣犬馬之力所能報稱伏念臣材疏學淺聞譽非優誤膺選掄代匱右史夙夜省循實懼叨昧敢圖眷獎復有遷升矧臣載筆螭坳閱日未久儻冒寵榮必速瘵敗伏望聖慈追寢成命俾小臣獲安分義所有告命臣愚未敢祇受

辭免監察御史奏狀

右臣今月初五日准閣門告報已降告命除臣依前官守監察御史者聞命震恐罔知所措伏念臣頃繇學官賜對便殿進說淺陋日候罷斥陛下不求備於臣擢賓東觀已出叨昧就職未幾又蒙聖恩有此除授方陛下紹隆先烈厲精庶政循名責實允釐事功宜得明敏練達之士俾任臺察以肅吏政如臣蠢愚豈當冒處兼

臣之從祖父瓘娶知樞密院事蔣之奇從父兄之女雖臣於之奇非合避親及從祖父從祖母皆已亡歿然終非所安伏望聖慈察臣誠懇特賜追寢成命所有告命未敢祇受謹錄奏聞伏候敕旨
辭免兵部侍郎奏狀

右臣准閣門告報已降告命除試尚書兵部侍郎者聞命震恐罔知所裁伏念臣頃以憂患餘生誤蒙眷錄召自田野再冒詞垣方陛下聖神大有爲之時立政用人皆出宸斷從容裁處言成典謨而臣猥以荒疏掌帝之制雖聖度優假寵以褒稱顧自知甚明日懼瘵曠貳卿之擢豈臣敢當伏望聖慈察臣誠懇收還成命以允師言所有告命臣未敢祇受

除吏部侍郎舉自代奏狀

伏見承議郎新授宗子博士邵楹學術醇明操修端潔口藝紹聖占等甚優舉以自代實允公議
又舉自代奏狀

伏見尚書都官郎中邵濤明於經術議論有餘神考造士之初首應升遷歷踐官次恬靜不渝舉以代臣實允公議

除兵部侍郎舉自代奏狀

右臣伏見辟廡博士陳詢學術純明行義修潔頃爲常州教官當諸路貢士之初能體朝廷德意推行學政郡人悅服雖白首老儒鼓篋就業自以爲晚察其業履可元

辭免除刑部尚書奏狀

右臣准閣門告報已降告命除臣刑部尚書者聞命以還怔營罔措伏念臣出於寒鄉最爲孤進寢緣推擇猥玷使令自筮從班於茲十年心雖許國初乏事勞智昧保身賞嬰罪悔頃頒召札再貳銓曹惟雨露滌滌之私實天地生成之造徒殫於慮曷報萬分敢冒眷憐進膺擢序輒伸危懇上浼聰聞冀追寢於贊書俾獲安於愚分所有告命臣未敢祇受
除刑部尚書舉自代奏狀

伏見宣德郎守左司員外郎曾開學識醇明行能優異翱翔雁類
進歷省曹靖共不渝眾所嘉尚儻擢華要必有可觀舉以代臣實
允公議

乞賜神宗御集奏狀

右某等叨冒寵靈待罪諫列當陛下紹述大有爲之時夙夜黽勉
期效萬一而材識卑下加以聞見不廣不克盡知熙寧元豐謨訓
之詳故期年於茲涓埃無效伏見神宗皇帝御集已成故事嘗賜
兩制以上臣寮臣等出於迫切輒昧萬死欲望聖慈特賜臣等各
一部俾得研精覃思於其閒庶幾備顧問論朝政咸有依據以稱
陛下優假諫臣之意臣等不勝大願謹錄奏聞伏候敕旨

論黃甲擬官奏狀

右臣伏見神宗皇帝既廢明經學究科特設新科明法優爲恩例
至黃甲擬官俾先進士注諸州司法蓋將以變革舊習故其初不
得不然紹聖四年朝議以此法行之既久昔人之爲新科者十消

八九矣恩例之優宜亦少損乃以司法及其餘判司闕袞從上差
注元符三年十二月中因省部勘當遂罷紹聖指揮更不施行臣
契勘新科明法等入徒誦其書未必曉其義若以進士素不習法
難以輕授司法職任其餘判司等官或以治獄或以聽訟亦未嘗
待其學而後授之也朝廷取士患不得實材果得實材何施而不
可伏望聖慈特降睿旨將來吏部注新賜及第進士出身等人並
依紹聖四年四月二十三日指揮施行所貴德澤均被上稱陛下
造士之意謹錄奏聞伏候敕旨

乞殿中省別處置局奏狀

右臣伏爲殿中省見在門下後省權暫置局內殿中丞許似孫見
任執政官之子臣爲言官與之同省慮涉嫌疑伏望聖慈特降睿
旨令殿中省別行踢逐權暫置局去處謹錄奏聞伏候敕旨

國子監舉主奏狀

右臣伏覩陛下追述神考美意自京師下至郡縣恢崇學校以幸

教天下增置諸路教官所選唯經術行義之士三代庠序之盛宜無以加此然諸路教官奉行貢士法事體比昔爲重今員數既眾又皆一時之選而資任多係選人國子監長貳歲舉改官止八人施之大學正錄且猶不給況諸路教官如此其眾耶伏望聖慈特詔有司稍增國子監長貳舉官舊格使凡預師儒之選者益知自重以稱陛下長育人才之意謹錄奏聞伏候敕旨

論武學上舍人奏狀

右臣伏觀神宗皇帝聖謨淵遠思患豫防雖天下治安不忘武備自熙寧中特建西學招徠羣材訓以武志凡考選升補之法皆出宸斷士之游於斯者以程文觀其器識以弓馬閱其藝能以規式察其行義其自上舍免省試者積累歲月速不下十年須程文弓馬數在優等又其行義可稱乃爲應格雖免省試格又從上其不得過三人其教之如此其備養之如此其久擇之如此其精逮其授官歷任與夫取一日之長者無甚輕重其非次進拔缺然不

聞甚未副建學造士之意伏望聖慈因殿試武舉進士唱名內該上舍免省試以上恩例者命執政審其人材稍加獎擢庶幾學者嚮風罔不激勸以作成其才上稱任使謹錄奏聞伏候敕旨

論州縣社稷壇壝不修奏狀

右臣伏觀近降明詔命有司講究禮樂之情文以幸天下可謂太平甚盛之舉臣竊惟禮有五經莫重於祭祭之秩於典者多矣自京師至於郡縣春秋祈報徧於天下者惟社稷爲然今郡守縣令不深推其故以是爲不急之祀壇壝不修甚者民得畜牧種藝於其閒春秋行事取其臨時乃或器用弗備粢盛弗蠲齋戒弛懈裸獻失度甚不稱陛下秩祀典之意臣契勘社稷之祀敕令該載詳悉欲望聖慈特降睿旨戒敕郡縣務在遵承命諸監司巡歷所至察視壇壝其不如儀者具事狀以聞庶幾官肅祀事神用顧享謹錄奏聞伏候敕旨

論州縣學講堂及齋名奏狀

右臣伏觀神宗皇帝恢崇太學以幸教多士製堂及齋名以寓訓迪學者游於斯仰之若日星之麗乎上也陛下緝熙先猷州縣學校咸建師長命以貢士而名堂及齋顧多前日官司隨意建立或怪僻不馴或稽考無據或違背經旨以此揭示多士甚未稱朝廷育材之意臣愚欲乞府界及諸路州縣學應堂及齋名除不許用太學敦化等堂名及論秀烝髦等職事齋名外並須用太學諸齋名卽不得存留舊名及別有創立如蒙聖允乞下有司頒降施行謹錄奏聞伏候敕旨

摘文堂集卷九

摘文堂集卷十
奏疏

論提舉官分巡奏狀

右臣伏觀陛下緝熙先猷增置官吏修水土之政行抵貸之法興山澤之利以幸天下常平事任比昔加重諸路提舉官於所部州軍理當每歲徧巡以周知官吏奉行勤惰之實今諸監司歲以所部州軍更互分巡則提舉官所歷無幾其餘他司於常平職事旣非其所任責則非所檢察特取文具而已雖有二年一徧指揮不唯日月曠遠兼新舊官移易不常甚未稱朝廷考覈事功之意臣愚欲望聖慈特詔有司應諸路所部州軍數多如兩浙東西通爲一路去處更增置提舉官一員并其餘路分並令每歲徧巡更不與他司更互分定仍令諸州軍於次年正月具歲終有無提舉常平官巡到禁中御史臺委本臺彈奏餘依見行條令庶幾職業振舉實惠及民天下幸甚謹錄奏聞伏候敕旨

論諸路弓手奏狀

右臣竊惟諸路弓手是爲鄉兵州縣之武備莫急於此向病紛更官司習玩選補鹵莽訓練希闊迺復以工巧技藝之人充占員額私備役使而承行胥吏又用其所親不問老疾疲弱特取具數歲時按閱類以差出爲名匿其中格者故緩急追捕常患乏人矧今推行茶鹽二法唯能禁絕私販然後商賈易售官課充羨欲絕私販則諸縣弓手宜訓齊武事用以處警有犯必獲然後姦民畏沮私販不行臣愚欲望聖慈特降睿旨命諸路提點刑獄司專委官點檢選留疆壯斥去老疾疲弱者其本縣官以工巧技藝隱占役使並根勘罪具狀以聞庶幾有司遵承詔令武事加飭以壯守備謹錄奏聞伏候敕旨

論諸路坑冶奏狀

右臣伏見諸路坑冶之利所助經費不爲不廣其置場去處有正官無幾餘止係轉運或坑冶司差官權監而逐司又多廢條用例

委本州郡官不惟被差者以其置場皆深山窮谷之中人人規免而官屬稍不闕事卽本州寄辦多不遣行獨老疾不任事畏在長吏目前者方始就職或不過半年又復交替豪民猾吏姦弊百出常以不差正官爲幸公家利源損失不可勝計臣契勘見行敕令該載坑冶條甚備而有司便文僥倖不能悉心遵奉臣愚謂宜降睿旨戒諸路提點刑獄及坑冶司常切體訪苗脈興廢去處嚴切督察多方措置如合差正官卽依條奏舉其轉運及坑冶司差官權監並須選擇能吏不得只要本州郡官仍令本州通判每季躬親點檢庶幾關防始密上下畏守以副陛下理財之義謹錄奏聞伏候敕旨

論府界旅櫬奏狀

伏見神宗皇帝仁心惻隱元豐二年以開封府界寺院旅櫬積多命提舉官專切管幹斂埋惠浹幽明中外感服迨今二十五年乃復充物棟宇以至露積其閒或閱日旣久別無管認或親屬雖存

貧不能舉或藏器已毀棄擲道傍此皆掩葬無期尤可傷閔臣愚
欲望聖慈特詔有司檢會元豐二年指揮及應干措置條件施行
謹錄奏聞伏候敕旨

上檢察病囚疏

伏覩皇帝陛下矜憫庶獄制爲病囚檢察之法蓋謂愚民犯法雖
繫畱訊治邦有常憲於其疾也飲食醫藥視之猶赤子也臣等尙
慮當職官吏不能深體德意欲望聖慈令諸路提點刑獄司歲終
會州縣病囚損失分數除依條科罪外取一路最多最少各一處
保明以聞特降詔旨賞罰庶幾知所勸沮以副陛下好生之德

劄子

乞外任劄子

臣寒鄉孤進望絕顯榮遭遇聖明搜擇疏遠寢膺拔擢備數從班
叨冒寵榮積有歲月欲自勉強圖報萬分而才分所拘初無可紀
乃多罪悔達於聰聞矧茲銓曹職任要劇臣代匱已久曾乏建明

深虞曠瘼上孤眷獎伏望聖慈除臣一外任閒慢差遣庶俾微臣
獲安愚分

服闋乞外任劄子

右臣曩叨眷知進備詞掖雖更時序碌碌無聞尋遭親喪遠去朝
著偷延視息今已服除伏望聖慈以臣艱苦餘生俾安愚分特降
恩告除臣淮浙或京東一閒慢差遣臣見於常州聽候指揮上瀆
宸嚴無任恐懼戰慄之至謹錄奏聞伏候敕旨

理會三禮圖劄子

臣竊惟功成作樂治定制禮方今六府旣修三事旣和燕及皇天
休貺並至功可謂成矣治可謂定矣講明禮樂以幸天下其在
今日伏覩見行三禮圖係國初聶崇義撰集其閒車服器用之制與
元豐頒行經義時有不同自國子監建三禮堂暨州縣學校率繪
其圖以示學者乃至有司所掌名物猶雜用其制未稱陛下統一
道德之意臣愚欲望聖慈特詔儒學之臣考據經義改定舊圖俾

有遵承及付國子監頒行取進止

理會架閣劄子

臣所領中書後省合管五案凡冊禮及朝會應行遣事卽上案主之付受諸案文書及本省雜務卽下案主之編錄制辭及中書省人吏試補比較功過卽制誥案主之在京有司關報改更差除等卽諫官案主之逐月修起居注卽記注案主之已上案分之事務要切兼編修看詳隨事置局及逐名次召試進士武臣換官之類文字名件至多未曾專置架閣拘管每有檢照率多損失不唯申請煩紊兼證據不明前後抵牾臣契勘中書後省見有空閒屋宇欲乞專置架閣庫以本省逐案見管按沓文簿書籍乃至祖宗以來辭冊及敕令續降等並置簿拘收以千字文爲號周而復始應令逐案承受文字已結絕及無行遣限三日發送上簿接續結押仍乞於本省選手分楷書各二名主簿行遣庶幾紀綱整肅以稱元豐建立後省陛下緝熙先猷之誠取進止

理會守令劄子

臣伏見陛下勵精政事比降明詔惠綏庶民教養多士所以訓戒丁寧甚悉真極盛之舉也臣竊謂陛下聖謨高遠迥非臣子所能仰望清光至於推行德意志慮見於事實而與士民尤親者蓋在於守令使守令舉皆得人樂事勸功不以便文自幸則太平之基豈復他求乎朝廷制考課之法殿最賞罰旣詳且備臣愚欲乞守令任滿課入優等者除合得賞格外其未經選擇之人三省審察如人材果可任使隨其資秩特加獎拔或實諸省府寺監要劇之選或委以諸路監司按察之寄若此羣吏聞風莫不激勸各以行治自奮豈唯究宣惠澤上以副陛下惻怛之誠又足以搜揚疏遠以盡爲官擇人之術其效豈小補哉伏望聖慈特詳酌施行取進止

理會守令考課劄子

伏觀元豐立守令考課之法至崇盛大觀隨事緝熙條目完備真

得神考訓迪羣吏之意大觀四年九月因臣寮申請止存元豐舊條餘皆刪廢臣竊謂崇寧大觀緝熙之美務廣德意比舊條加詳初無違戾欲望朝廷詳酌特降指揮檢會施行

理會常平劄子
臣竊惟神考立常平之法加惠元元意旨深遠著令完具而吏或不虔便文自營馴致蠹耗出多入寡近因臣寮建言申嚴約束務絕姦弊惠及細民愚以謂唯納欠多寡最見推行之實使任職者悉心奉法計置及時官無抑勒畱難下無詭冒違法之人則良民輸納自無稽違豈有出多入寡之弊臣欲乞應斂常平錢穀逐歲於令佐印紙內批書納欠分數候三考滿日別立殿最之法庶幾知所勸沮罔或偷惰如蒙聖允卽乞詔有司施行

理會抵當孤幼劄子
臣伏覩州縣孤幼財產官爲檢校不滿五千貫召人借抵當量數借請歲收二分之息贍養候其長立而還之法意慈惻盡於事情

然閒緣形勢戶虛指抵當或高估價直冒法請領不唯虧欠歲息迺至并本不納迨其長立給還之時元檢校錢物並無見在其冒法請領之人或從官遠方或徙居他所或不知存在或妄託事端唯以空文來往因致合給還之人飢寒失所近雖降朝旨添立須有物力戶爲保及限歲錢數足等條然於形勢之家未有徵革臣愚欲乞檢校孤幼財產不許形勢戶借請及作保其所供抵當委官驗實估定價直方許給借餘依見行條令所貴州縣遵守實惠及民如蒙聖允乞詔有司施行

理會居養院劄子
臣伏見陛下若稽古訓自京師至州縣各置居養所以聚鰥寡孤獨之人詔旨丁寧臣下遵奉道無孳瘠咸有所歸發政施仁孰大於此臣竊以爲鰥寡孤獨雖曰困窮而至於被服禮義之化均太平之民臣居田野聞江東溧陽縣以居養所見管屋宇隔截爲八室用發政施仁必先四者爲號使男女異處不相雜擾一方之民

莫不說服臣愚欲望聖慈特詔有司應州縣居養所並依前項體式隔截異室分處男女不惟子惠之澤洋溢中外而禮義之化不廢於困窮之民以副陛下愛民誠意取進止

理會祭祀劄子

臣竊惟國家稱秩祀典交百神而禮之考諸令格唯以齋日多寡爲大中小祀之辨大祀散齋四日致齋三日中祀散齋三日致齋二日小祀散齋二日致齋一日參稽情文各有攸當然祀之通於天下而最顯者社稷釋奠春秋二仲州縣展事四方士民於焉觀禮而皆列於小祀近緣臣僚奏請比附國子監修立外州軍釋奠儀注散齋三日致齋二日則既升爲中祀矣所有外州軍社稷齋日義難獨殺臣愚伏望聖慈特詔禮官討論增定乞以假日特引對付史館劄子

臣備位詞掖幸以權記注職事日侍清光伏覩陛下辨色視朝廷見羣臣雖雪霰風霧凜冽異常辰正奏引上殿十班傳旨特引嘗

近已初乃罷盛寒疇咨玉色無倦十六日入冬至假陛下御延和引上殿十一班十七日又引十班皆人人顧問曲盡事情告戒丁寧切中機會節假內批降臣寮章疏及有他處分差除絡繹不絕臣職在奉行奉讀悚激方是時羣臣賜告偃息於家而陛下夙夜省覽憂國愛民未嘗暇逸陛下以天縱之聖而勤政若此蓋將訓迪有司永垂憲度而日曆之所紀邸報之所傳循舊襲常舉其大略而已自非進得倍侍軒墀退得與聞幾政何以盡知其詳臣愚欲望聖慈以臣所陳降付史館及進奏昭示天下傳之無窮俾中外官吏迺至民庶聞風胥勸罔不克勤上副陛下宵衣旰食之誠取進止

理會學校劄子

臣竊謂諸路學校州有正錄縣有長諭迺至其餘掌事之人皆奉行貢士法令書考升選之詳蓋根本於此而遠方諸生尙循積習之弊迺或持其短長糾率學眾輒興訴訟以至發其舊愆以快私

忝以此職掌類多畏默求全鮮克振職臣愚伏望聖慈特降睿旨編修學制所嚴立法禁不唯整肅學政亦以敦厚士風取進止理會陳訴劄子

契勘命官遇赦恩許訴雪罪犯及用年限舉主除落過名若在降赦二年外投狀陳訴者依條不許受理其諸色人依赦許訴雪過犯或訴用法差誤理與命官事體不異若於赦降後二年外陳訴者亦乞依命官訴理條限施行取進止

理會捕盜捉事劄子

臣竊惟在京及諸路捕盜官捉事使臣雖以捉獲爲職其間有緣一時疑誤將無贓證之人執縛根問多端恐脅致虛有承伏及送所屬官司初憑元解事狀枷訊禁繫文移追會經涉日月直至推究得不係元解情犯方以無罪釋放或招撫一輕罪收坐蓋捕盜捉事之人當有後賞失則無罰伏覩政和赦縣以杖笞及無罪人作徒以上罪送州杖一百臣愚欲望聖慈申詔有司比附上條特

立禁約庶幾盡心緝捕必獲犯人不致汎執無辜枉被囚鞫刑部斷絕獄案劄子七首

恭惟皇帝陛下躬建皇極心澄化源德駿業隆超冠古昔甚盛之舉不可一二數皆章明較著垂休無窮上帝博臨珍祥紹至方將坐陽館而頌治登介邱以告成時和歲豐家給人足薄海內外歡忻交通如在一堂之上宜其民罔犯法而秋官以廷無畱讞稱慶於朝矧天靈密邇蒐講盛儀百辟奉觴異邦款塞於焉刑措孰不歸仁臣等備數典司獲與擊壤之民上祝億萬歲無疆之壽不勝歡忻鼓舞之至謹具進呈

臣等伏覩本部自四月二十日擬斷天下奏案盡絕已具表稱賀仍乞宣付史官訖恭惟皇帝陛下以至德要道纂隆聖緒成功巍巍同符堯禹自中都達於四方萬民樂業家給人足以故獄訟衰息自凡奏讞之在秋官者今已罄絕聞太平刑措實在茲時臣猥司邦憲親逢盛事獲與擊壤之民共陶美化不勝大幸右臣等具

到近五年斷大辟數逐歲遞減比政和上二年計減一半以上此蓋皇帝陛下盛德妙道克配上帝良法美意永祐下民由中及外無有遠邇家給人足化行俗成以故獄訟衰息幾至刑措臣等無任歡欣鼓舞之至謹具進呈

臣等伏覩本部自三月十五日擬斷天下奏案盡絕已具表稱賀仍乞宣付史官訖恭惟皇帝陛下在躬清明翕受眾甫天德地業超冠古初上帝博臨符瑞創見歲豐家給民有愜志遷善遠罪罔或抵冒以故邦刑幾措而秋官讞章罄絕稱慶於朝太平之隆光於載籍臣等實司中典親逢盛際無任歡呼鼓舞之至謹具進呈本部自某月日擬斷天下公案盡絕已具表稱賀仍乞宣付史官訖恭惟皇帝陛下躬蘊道真丕冒九有盛德大業超冠古初格於皇天休貺薦至四民安生樂業家給人足以故遷善遠罪罔或抵冒而秋官屢以時無留讞稱慶於朝凡厥有知孰不歸聖臣等親逢盛事獲與羣倫上祝億萬歲無疆之壽不勝歡忻鼓舞之至謹

具進呈

臣等伏覩本部自九月二十四日擬斷天下奏案盡絕已具表稱賀仍乞宣付史官訖恭惟皇帝陛下盛德妙道高出唐虞制作設施自我作古凡歷世願望而不克舉者今悉有成大功巍巍不可一二數是以天地並貺殊祥異瑞載籍所未見者踵聞於四方時和歲豐閭里之民日用飲食欣欣愉愉咸有愜志方且扶老攜幼瞻望華闕乞詔清蹕登封告成宜其風醇俗厚遷善遠罪而不犯於有司太平若茲孰謂無象矧天寧在邇聿修盛儀百辟奏觴異邦遣使而秋官以讞章罄絕稱慶於朝凡厥有知孰不歸聖臣等親逢盛事無任抃蹈鼓舞之至謹具進呈

臣等伏覩本部自九月九日擬斷天下奏案盡絕已具表稱賀仍乞宣付史官訖恭惟皇帝陛下配天立極執古御今凡法度禮樂所以嘉惠天下者出自獨斷煥然一新由中及外無有遠邇風移俗易民日遷善遠罪以故刑章幾措秋官論報屢以罄絕聞太平

之隆高越前古臣等親逢千載之期不勝歡欣鼓舞之至謹具進
呈
臣某等言伏觀本部自九月一日擬斷天下奏案盡絕已具表稱
賀仍乞宣付史官訖恭惟皇帝陛下躬蘊道真默該眾妙運精神
動心術措諸事業以嘉惠天下太平之隆超越唐虞三代之上茲
者歸德穹昊玉檢推尊極欽崇之精意成禮之日秋官以時無畱
讖稱慶於朝羣倫底豫靈心昭答和同天人使之無閒其在今日
臣等備位攸司親逢盛事獲與擊壤之民上祝億萬歲無疆之壽
不勝歡呼鼓舞之至謹具進呈

表
興龍節賀表

臣某言高禔錫慶肇膺如達之祥華渚呈輝誕著寔昌之證惟神
聖挺生之且迺文明赫盛之朝傾寰海之誠心獻大君之睿算臣
恭惟皇帝陛下承休祖考配德乾坤擁皇極之珍符叶炎靈

之景運九功式敘諸福畢臻屬當彌月之辰敢啟後天之禱奔航
重譯執玉盈庭臣生覲清時仕參通籍一人有慶懽同擊壤之氓
萬壽無疆冀想稱觴之頌

冬至節拜表

朋陽來復圭景加長占瑞靈臺謹書雲之令節拜章宸閣修亞歲
之盛儀恭惟皇帝陛下道與時亨獨包眾甫化如天運咸敘九功
恩浹寰區治高振古爰屬三微之始方孳萬彙之萌保合太和召
嘉祥而有羨緝熙純嘏增睿算於無疆臣獲筮班聯與膺事任重
熙累洽共欣千載之逢歸德謝生知自一人之慶

皇后爲冬祀禮畢賀皇帝表

日涓來復聿修三歲之祠禮迄熙成均錫庶民之慶珍祥丕應協
氣交流凡與見聞敷同慶賴恭惟皇帝陛下與乾合德以道御時
擴至治之規模固太平之基本升禋陽位旣哀對於百神旋蹕端
闡期永膺於多福妾夙緣天幸獲儷宸尊茲欣覩於盛儀實增榮

於柔抱

內中侍御已下賀皇帝禮畢表

妾等言展案國南奉明禋而報本涓辰景至備熙事而慶成百順
應期千齡接統恭惟皇帝陛下德侔覆疇明廣照臨揚欽燎以薦
誠榮光下燭御端闈而肆宥惠澤橫流於赫盛時迴高振古妾等
幸陳禁掖均被宸恩初瞻綵衛之還共獻履長之祝

貴妃已下賀皇帝禮畢表

伏以乘日至之辰順天正之序親祠陽位還御端闈福祿來寧華
夷均慶中賀恭惟皇帝陛下道該衆妙功敘九歌緝振古之彌文
聿修大報罄明禋之精意用迄上儀靈心嘉虞景貺昭格妾等獲
塵清禁夙奉至恩聞詔蹕之甫還悚柔襟而載抃

內中夫人郡君已下賀冬祀禮畢表

伏以欽若禮經聿修禋祀既迄成於熙事用翕受於休祥恭惟皇
帝陛下道協彌綸誠通化育夙駕齊輅罄精意以告虔還御端闈

揚至恩而肆宥澤均動植慶洽華夷妾等祇奉嚴宸獲瞻盛際願
拜萬齡之祝冀伸千載之逢

大長帝姬賀冬祀禮畢表

伏以涓辰展案既奏假於層壇發號施仁用均釐於寰海情文允
穆典冊增華恭惟皇帝陛下以天爲宗於帝其訓道洽政治九功
敘而嘉頌興俗阜時和五臚備而美祥格誕集衆甫協成其儀妾
夙被恩榮實同慶賴聞初還於綵衛輒仰獻於綈函

冬祀禮畢奏謝天尊閣佛閣等處表

親祠陽位祇見昊天靈心嘉虔祥應昭著實絲庇貺獲底備成敢
奉薰修以申報謝

冬祀禮畢奏謝內中玉虛殿三清諸聖等表

親祀泰壇祇見上帝百禮既洽萬福來寧實賴聖真默垂保佑敢
申報謝冀格顧歆

冬祀禮畢奏謝內中玉虛殿上九位等表

率邦彝恭陳禮謝

冬祀禮畢奏謝欽先孝思殿帝后表

展儀陽位克承上帝之休肆宥端闈均錫萬邦之慶茲迄成於盛典實祗適於大猷用罄精誠載嚴報謝仰虔聰鑒永佑昌期

冬祀禮畢奏謝萬壽觀景靈宮諸帝后西京嵩山崇福宮等處祖宗表
伏以薦一純於上帝獲考盛儀均五福於庶民既孚大號實資庇佑克展靈承敢率舊章式陳報禮

謝賜宴表

玉陛疏恩方負非才之愧瓊林頒宴更蒙異數之加凡在叨逾舉深慶忭中謝伏念臣等久安鉛槧素樂簞瓢心徒醉於六經志敢希於五鼎幸千載飛龍之際陪一時振鷺之游名標金榜之中昔稱千佛會列瑤池之上人謂羣仙宮花叢御苑之春帝樂聳鈞天之奏光生韋布榮動縉紳茲蓋恭遇皇帝陛下當饋思賢推食待

下念臣等齋鹽久屢備歷艱難於臣等邊豆有加曲推慈惠時輟大官之奉俯霑一介之微臣等敢不沒齒銜恩終身飽德愛君憂國不忘頃食之間趨事赴功益謹素飡之戒

天監節謝御筵表

三靈效祉聿當彌月之辰百辟稱觴申祝後天之算恭惟皇帝陛下照臨有赫覆幬無私紀流渚之祥虹允符壽節詠零廷之潛露洽被燕慈臣等幸遙近班與陪盛觀糜捐不足以副榮懷之遇鼓舞不足以盡歡欣之誠

摘文堂集卷十

摘文堂集卷十一

賀太陽當虧不虧表

官占底日預陳薄蝕之期聖德動天遂格休祥之應睠至誠之上
達方協氣之橫流凡在照臨敷同慶賴恭惟皇帝陛下福膺百順
祐擁三靈行堯道以兢兢秉文心而翼翼基圖增固治永敘於九
功精禋交通變宜消於十輝允符瑞貺益著亨辰臣等夙被寵恩
過叨榮祿診收內壤心均四海之歡疏奏前旒壽獻萬齡之祝
賀增上神宗徽號表

合宮大饗載修崇祀之儀清廟徽稱誕廣通追之孝人神協贊典
冊用光凡諸含血而有知孰不懽心以胥慶臣中賀國家七葉幅
員萬邦巍乎先帝之隆凜乎三代之上神靈如有熊而成之以敦
敏濬哲如大舜而輔之以溫恭承列聖之寢昌弗有其治跨百王
而高蹈克成厥勳于時率土之臣咸請中天之號禹功不伐湯德

日新方伏闕而未從遽號弓之莫及逮茲累稔申厥舊章深求典
謨博采雅頌爰因配帝之祀聿嚴宗德之名甚盛無前持外王之
土苴其傳罔極著上聖之形容恭惟皇帝陛下剛德有爲達孝善
繼率時昭考燕及皇天卜太室之受釐協羣倫之歸美施諸玉冊
赫爾金聲考治式孚蓋原於復命神功不宰尙出於強名臣獲際
昌辰預聞休蹟退惟簪履之舊淚灑周南遐思圭璋之儀魂馳魏
闕

賀甘露降帝籙表

儀盛漢廷方幸修於元會祥呈夏鼎如克享於天心凡預榮懷敷
同慶賴竊謂湛恩廣被協氣橫流精禋於焉交通符瑞必以類至
睠霄零之甘露稟雲表之清英載在遺編稱爲休貺或受諸草木
而象德或降於宮室以紀年粵若王政之初爰當帝籙之上時乃
創見昔所未聞恭惟皇帝陛下體御至神道兼全於衆甫用揚獨
智世用賴於九功民俗阜康邊陲靜謐雨暘咸若稼穡屢豐藹藹
治馨宜三靈之底豫灑灑和液彰百福之備膺臣等獲際熙神幸
瞻嘉應班趨上閣共傾向日之誠疏奏前旒更祝後天之算
賀改元政和表

燎升陽時既涓饗帝之儀澤沛端闈爰易紀年之號書文所暨民
俗交欣臣中賀臣聞二帝之德雖隆其要不外於稽古二典之文

可考其詳尤在乎命官夫惟無曠於天工是用克和於邦政紹茲
能事屬在聖時恭惟皇帝陛下巍巍成功以丕冒率土業業致孝
以祗通先猷仁洽道豐氣調時豫乃因祀禮更定歲元臣曩備近
聯今從左省莫陪慶列徒緬想於賓傳均浹歡悰竊自同於獸舞
謝賜政和元年曆日表

近日前推先天誕告凡備守邦之吏寵頒紀朔之文俾獲珍藏實
均慶賴臣中謝竊以唐堯之考曆象虞舜之察璣衡豈惟敘授於
人時蓋亦靈承於帝事載在二典訓垂百王恭惟皇帝陛下道體
泰元治高振古五辰兼撫致庶績之威熙九敘可歌方萬世之永

賴茲當改歲申飭攸司課密度於清臺既無差忒錫成書於列郡
冀克聞知臣猥玷隆私與膺嘉會金臺漏永共喜化日之長玉燭
時和預慶豐年之屢

賀紅鹽表

地符薦祉鹽澤效祥方擬凝雪之姿忽示激丹之彩應唯誠格福
以類臻臣中賀自昔牢盆之贏為恃公家之助當章聖之臨御嘗
奏瑞鹽迨政和之紀元再書紀史希世難遇有識交欣恭惟皇帝
陛下德協炎靈功昭烈祖寶源恢復既豐足國之儲珍貺薦臻益
永承祧之祚臣曩由從橐黜領郡章身遠軒墀莫預稱觴之列職
親民社欣聆擊壤之音

代三省以下紫宸殿稱賀太陽不虧表

誠德誕孚嘉祥丕應沚消內壤既虛十輝之占懽浹中區永賴一
人之慶臣中賀恭惟皇帝陛下運乾剛以覆疇居離正以照臨發
政施仁靡匹夫之不獲彰善瘴惡致庶績之咸熙治馨方格於神

明和氣宜通於精禋偉茲穀朔時乃珍符臣等均被恩榮與膺任
使仰瞻天路亶為千載之逢追效嵩呼敢後四方之賀

代宰臣以下賀黃河清表

天心佑德川后薦祥方兩涘羨溢之時有千載澄清之瑞感由誠
格福以類升臣等中賀惟河四瀆之宗惟水五行之首效靈端拱
屬更紀歲之元顯應大中適展親祠之禮考今為備視昔用光矧
當乾寧之邦允協天靈之號恭惟皇帝陛下性堯舜之孝悌躬文
武之憂勤利澤汪洋靡匹夫之不獲和氣充塞宜景貺之自臻簡
牘屢書華夷均慶臣等具膺寵祿與覲闕休俟河之清豈人謀之
可冀如川之至知聖壽之無疆

代三省樞密院請皇帝聽樂表

禮緣羣情聖人必為之節喪從先祖後世靡得而踰恭惟皇帝陛
下仁稟乾元恩隆坤極念朱邸來嬪之舊有紫闈占夢之祥制服
過期輟朝增數去日已遠而慈軫愈劇卹典雖厚而誠感未饜迺

茲公除尚停雅奏臣等考莊穆之故事本正元之舊章既終耐饗
之儀卽允叩闈之請伏望宸寬追悼曲徇虔祈遵景德之詔音禮
由義起御鈞天之法部樂與民同
代賀皇帝御大慶殿大朝會表

律曆三陽咸慶王正之序圭璋百辟聿修元會之儀凡在有生罔
不載躍中賀恭惟皇帝陛下誕隆駿命祗通孫謀甄商陶周凜凜
百王之右參天貳地恢恢上聖之姿九功之敘皆可歌五禋之來
罔不備比奉靈真之恤久虛大慶之朝永言孝思化式孚於下土
錫茲祉福佑克申於羣倫爰當發春赫舉四觀禮文甚盛典冊用
光臣獲際昌辰預聞丕纘周南歎滯莫陪鸞鷲之聯魏闕馳誠徒
切江湖之想

賀康復視朝德音表

法坐天臨曠恩雨施方永膺於遐福用申錫於羣倫凡預見聞敷
同鼓舞臣中賀恭惟皇帝陛下誠贊化育孝通神明以盛德承宗

社之休宜萬壽等乾坤之久臣曩由從橐黜守郡章辨色造廷想
清班而獨阻焚香拜詔覺協氣之橫流

代宰臣以下請皇帝受立圭第二表

盛德茂昭珍符申錫將答帝臨之貺必嚴躬受之儀敢冒威尊再
陳誠悃竊謂立曰純乾之色圭爲重土之文旁連山岳之形中函
雷雨之象偉茲至寶兼備三才維帝堯峻德之明有神禹成功之
告自時厥後歷世靡傳以迄於今蓋天所受恭惟皇帝陛下欽文
格於上下孝弟通於神明親九族以和萬邦釐百工以熙庶績豐
年屢應嘉瑞薦臻肆追美於陶唐用發祥於珍物伏望皇帝陛下
體三靈眷佑之命納羣臣鼓舞之情特降詔音俯從懇請先期涓
吉稱事展儀舉一代之彌文昭有邦之大寶以介無疆之壽以隆
不拔之基

賀中宮受冊表

羣辟造廷陳有司之備物溫詞鏤玉正中壺之隆名凡與見聞胥

同鼓舞中賀竊惟乾坤作配以化育日月相須而照臨故三代之興咸資內德之助而二南之盛實爲王化之基恭惟皇帝陛下聰明憲天濬哲稽古念昔家邦之御必始於徽音矧茲宗廟之承莫親於同體肆求茂德崇建長秋禘燕傳祠將衍多男之慶星軒增耀永符儷極之儀臣職繫左符身遙丹朶瞻母慈之不冒均民俗以交欣

代鄭樞密辭免樞密院表

驟膺綸制升冠樞廷聞命以還撫躬罔措伏念臣事勞無紀問學非優獨荷眷知遂陪機要挈餅之量心常戒於易盈伏櫪之材用豈堪於致遠坐糜廩祿徒閱歲時方積懼於瘵官敢益隆於柄任恭惟皇帝陛下道全衆有對時物以皆昌功敘九歌同天人而無閒齋居決事旰食視朝以聖明述作之資有文武憂勤之志振曠古已墜之典紹先朝丕顯之謨發政施仁靡一夫之不獲命鄉論秀致比屋之可封嘉祥緣類而並臻殊俗款關而來享臣幸當盛

際猥備近司海嶽深崇豈效涓埃之補乾坤神富難酬雨露之私儻冒寵靈將速罪悔仰祈洞察俯徇虔祈特還替書俾安愚分同前准備第二表

愚誠盡布冀寢誤恩睿意未從曲加寵諭顧深慙於公義敢再冒於天威伏念臣出本諸生晚叨清貫自陪樞筦寢閱歲華方上主有爲之時實千載難逢之會裁決機務取成聖心而臣蒙被寵靈無可論之薄效奉揚明命但知仰於清光儻復超升必速瘵曠伏惟皇帝陛下循名責實以總覈於羣能公聽並觀以博通於衆志因念怔營之懇特寬逋慢之誅改擇時材追還綸制中書舍人謝表

臣言伏奉誥命除授臣試中書舍人仍改賜紫章服者試言黃閣請避弗俞視草紫垣疏榮非據仍頒顯服併免常儀賁冒有加怔營滋劇臣誠感懼頓首頓首伏念臣行能淺陋術業荒疏本乏力稱偶階仕進初緣采擇獲對燕閒擢自膠庠任更臺閣諫垣論

事久莫效於涓埃柱史記言近不淹於歲月方虞叨昧將速譴呵
曷意明恩復加寵陟矧神聖述作之御實區宇亨嘉之辰雲漢文
章可觀而不可繪其象雷風號令可聞而不可寫其音是宜潤色
之尤難夫豈孱微之克稱恭惟皇帝陛下以堯舜之孝弟有文武
之憂勤廣延羣材協贊庶績迺茲僥倖亦被褒揚臣敢不激昂懦
衷紉繹舊學典司訓誥雖慙深厚之詞陪侍禁嚴敢忽靖共之節
謝再除中書舍人表

臣言伏奉詔命除授臣試中書舍人者訓辭俯逮誤膺求舊之條
懇款冒聞莫遂由衷之請叨恩愈厚圖報爲難臣誠感誠恐頓首
頓首伏念臣寒素諸生迂疏晚學早玷儒林之選濫陪俊域之游
曩幸聖知擢升諫列獲奉清閒之對數陳固陋之言迺緣優容遂
至超躐掖垣四禁代司綸綍之嚴省戶五花兼與機衡之密曾微
效實徒閱歲時比免苴麻方依邱隴筋骸疲薶偶殘喘之僅存志
氣銷磨豈清塗之敢覬忽蒙收召復冥高華惟內省之甚明宜自

慙於非據此蓋皇帝陛下孝治四海禮優庶臣閔茲艱苦之餘生
粗有樸愚之小諒曲垂眷錄弗忍遐遺風木易搖旣永乖於榮養
涓埃可補顧何憚於捐軀

汝州謝表

叨榮已久宜速顛隳積咎滋多敢逃誅責恩深譴薄感極涕零臣
中謝伏念臣家起寒微望絕榮顯束髮試藝遭時右文偶塵經術
之科復玷辭章之選擢自州縣進聯師儒迨登對於燕朝寢踐揚
於要路初持從橐距今八年兩貳省曹旣書三考侍邇英之史讀
議大觀之禮文眷憐每發於金聲願逮必康於玉色而臣才短難
強器小易盈曾無可紀之勞迺有自貽之戚致形論列終累保全
尚特屈於常刑俾獲臨於便郡此蓋伏遇皇帝陛下體乾在上與
物爲春如日方中容光必照念臣與陪帷幄嘗奉燕閒察臣參掌
銓衡粗勤職業用加寬貸薄示小懲臣撫躬深思刻骨永戒才非
太史敢興歎於周南心類子牟但馳誠於魏闕

謝復修撰表

分符汝海方循省於前愆列職書林俄霑濡於需澤危襟增激感涕交流臣某誠惶誠懼頓首頓首伏念臣系本單微進由孤遠簿書累考安州縣之卑棲靡泮八年甘齋鹽之冷宦偶緣登對寢被使令接鴈鷺之後塵侍槐楓之清燕葑菲之選皆由拔自聖知絲綸之除每特從於中出而臣受材薄賦分奇艱無可紀之勞能有既彰之罪悔誤膺慈惻獲貸嚴誅假以郡章閱茲時序謂當永黜尚不遐遺恭惟皇帝陛下德與日新仁如天覆察臣陪扈滋久樸拙無他閔臣擯斥以來憂兢愈劇用加甄復示不弭忘臣昔冒恩私親承訓敕奉法循理敢自替於前修盡節竭誠誓益堅於素志

謝除兼太子賓客表

臣某言伏奉誥命除臣兼太子賓客者宸豪親灑詔檢中頒卽建禮之舊聯兼承華之顯列仰膺賁冒俯積怔營臣某誠惶誠懼頓

首頓首竊聞自昔宮僚爲時人望蓋毓德於初載必選賢而與居矧當調護之榮尤出搜揚之庠如臣者以蹇淺之學問無卓異之行能奮繇寒鄉最爲孤宦參粉闈之餘論豈稱所蒙奉銅輦之後塵益慙非據恭惟皇帝陛下端本以御家國因能以用人材謂臣久綴從班備聞謨訓察臣幸陪經幄粗識淵源因誤褒嘉遂階擢序臣敢不砥礪素節激昂懦衷念左右前後之人罔非端士陳君臣父子之道敢替前修

謝傳宣入伏早下表

使華俯逮天語驟傳念茲伏暑之臨錫以夙休之寵拜恩優異揣分兢慙伏念臣問學空疏文辭淺拙叨長憲部權直禁林鼇嶺風清豈覺午陰之燠花輒日永初無內務之繁敢冒慈憐俾從暇豫此蓋皇帝陛下招延時俊優假詞臣特蠲退食之期昭示閔勞之意雖殫千慮曷報萬分

兵部侍郎謝表

臣言伏奉制命除臣試尚書兵部侍郎仍賜對衣金帶者備員西掖久玷恩私貳職夏官益踰分願仍有匪頒之寵俾爲服飾之華賁冒併優忝營滋劇臣某誠惶誠懼頓首頓首伏念臣屬辭淺陋承學迂疏猥越稠人寢塵清貫方聖神熙洽之運實文物光亨之辰獨幹機衡孰測乾坤之造親御翰墨共瞻雲漢之章而臣重以非才再司外制曩奉燕閒之對特形褒獎之言揣分未安拜嘉增惕敢圖眷錄復與甄升此蓋皇帝陛下溥博兼容清明旁燭將曲成於萬務靡求備于一夫致茲孱微於焉僥倖臣敢不祇循名節恪赴事功圖報國之涓埃雖難稱塞比向陽之葵藿永勵忠精

謝除刑部尚書仍賜對衣金帶鞍轡馬表

寶跼親御芝檢中頒進冒寵除曾莫伸於懇避薦叨蕃錫顧曷稱於恩榮臣中謝伏念臣家本寒鄉分安末宦偶緣推擇寢備使令自適從班於茲十載心雖許國初乏勞能智昧保身嘗嬰罪悔頃膺召札再貳銓曹惟雨露前滌之私實天地生成之造於焉圖報

豈不知難敢誤眷憐復加擢序矧出笥衣之麗束以兼金仍分廩駟之良傳茲沃轡併深僥倖益重兢慙恭惟皇帝陛下心運道樞躬持慈寶納民軌物旣符堯舜之隆無曠庶官用襲典謨之美顧如孱陋亦與褒揚臣敢不增勵朴忠愈堅素守虔共夙夜靡懷出位之思兢慎簡書期副好生之德

賀刑部斷獄表十三首

民俗可封刑章幾措當春秋發生之且無簡書請讞之文囹圄畢空頌聲交作臣等中賀竊謂平國而用中典亦以教民嘉師而監祥刑於焉止辟惟皆進其獨志迺不犯於有司屬在聖時追隆治古鈞金旣息丹筆何施恭惟皇帝陛下心宅道真汎觀衆妙躬建皇極丕敘九疇高靈格而百順臻美化行而四維舉肆克清於常憲其永祐於多方臣等獲備有官欣逢盛事紀太平之文物願詔史臣頌至治之本原豈知帝力

治定功成風移俗易惟茲臣庶咸自遠於祥刑至於海隅方永清

於庶獄報囚悉下奏讞無畱凡與見聞敷同慶賴臣某等誠歡誠
忭頓首頓首竊以聽兩造之備雖有司存決五辟之疑必從中覆
唯空幽圜乃絕丹書若時閱休屬於盛際恭惟皇帝陛下隆追考
翼默蘊道真集前聖之成以建有極之會體上天之載以澄萬化
之源宜致嘉師罔干常憲臣某等優游退食蔑無任事之勞鼓舞
抗章願奉維祺之祝

甚盛之德既不冒於羣倫幾措之刑遂追隆於振古赅囚云絕丹
筆不施凡與見聞胥同鼓舞臣等中賀竊以幅員至廣獄訟實繁
豈參讞之攸司無一辭之可聽太平之象茲昭示於多方至治之
馨蓋敷聞於在上躋時若此唯聖爲能恭惟皇帝陛下執古御今
體元贊化道包衆有對時物以皆昌功敘九歌同天人而無閒用
永清於縣宇俾不犯於微文臣等位列秋官職司憲牘嘗備聞於
盛事不自意於親逢

道與時升慶爲民賴邦刑幾措廷讞無畱恩浹華夷事光載籍臣
等誠歡誠忭頓首頓首竊以皋陶之美帝舜茲不犯於有司周公
之戒成王其勿誤於庶獄追隆治古屬在聖時草鞠圖扉吏停丹
筆恭惟皇帝陛下躬建皇極心澄化原集前聖之成以欽承乎宗
社體上天之載以不冒乎家邦百度既新九功咸敘用罔干於靈
制期永祐於嘉師臣等叨奉恩書與承德意願上萬齡之祝庶伸
千載之逢

帝德懋昭民風丕變方其陶於美化幾不犯於微文獄靡淹囚廷
無畱讞謂如盛際實邁前聞臣中賀昔在神宗紹隆列聖敬用三
典分建有官凡厥罪疑悉從中覆偉茲率土之衆曾無麗獄之辭
致治若斯維聖時克恭惟皇帝陛下濬哲稽古聰明憲天心運道
樞以澄清於萬化躬持慈寶以拊育於羣倫百度交修九功咸敘
用永綏於縣宇俾自遠於祥刑臣等叨備秋官實司靈制吏停丹
筆共欣不世之逢疏奏前旒願奉無疆之祝

道洽政治風行俗成民未占而有孚刑幾措而不用報論悉下按

鞠無畱自昔鮮逢於今屢奏臣中賀竊以疆理至廣簡書實繁維時嘉師罔干常憲當宣室齋居之暇絕季秋請讞之文矧邇誕辰方蒐盛禮朝紳拱極共上萬年之觴使節造廷聿修重譯之貢於焉止辟孰不歸仁恭惟皇帝陛下高拱穆清適觀昭曠會衆符以建皇極執至要以澄化原無疆之休既昭受於上帝百順之福永敷錫於庶民宜幽囹之一空靡微文之可議臣等叨膺推擇均與榮懷恢太平極治之基孰知帝力紀甚盛無前之蹟願詔史臣民知遠罪冒犯寔希吏有奏疑報論卽下以盛世土疆之廣無攸司簡牘之繁歡心交通和氣充塞臣等中賀竊聞堯舜之治章服異而俗已徵成康太平囹圄空而刑不用雖曰古今之異茲如符節之同恭惟皇帝陛下默蘊至真獨觀衆妙精神運而心術動美化自孚禮樂著而法度彰庶功咸敘用臻丕應克邁前聞臣等叨備秋官與頌中典頌天地之大德難盡形容書帝王之極功願貽筆削

企九清之真境初薦鴻名格四海之歡心遂空幽囹當熙事備成之日訖季秋請讞之章和氣橫流靈心昭答臣等誠歡誠忭頓首頓首竊以箕子之陳皇極用敷錫於庶民周公之告徽言其勿誤於庶獄追隆古訓屬在聖時宜多福之聿懷致五刑之幾措恭惟皇帝陛下獨觀衆妙懋建大中敘巍巍之成功增光列聖揚顯顯之令聞高出百王赫茲太平是爲至治迺歸德於穹昊肆展采於禁廷玉檢推尊竭欽崇之精意丹書告慶息詳覆於微文臣等叨備秋官與頌中典觀天人之無閒孰測神謨紀時物之皆昌願貽信史

民承休德鮮或犯於有司吏絕疑文期永清於庶獄頌聲交作和氣橫流維茲至治之興永謂太平之象臣等誠歡誠忭頓首頓首竊聞好生者天地之大德措刑者帝王之極功於鑠盛時乃彰丕應矧屆就盈之月聿當兆聖之辰百辟稱觴異邦款塞有如天保其歌萬壽之章曾是呂刑亦紀一人之慶恭惟皇帝陛下誠參覆

載功格神明典章文物之隆百度畢正道德仁義之備萬邦咸孚
用格淳風罔干中典臣等獲塵任使祇奉詔條敢抗囊封申獻後
天之祝願貽汗簡具形擊壤之謠

寶祚無疆屆三元之華旦祥刑不貳訖五辟之疑文盛事係傳羣
心交怵臣等誠歡誠怵頓首頓首竊以周官布治紀正月之始和
呂命訓刑美一人之有慶追隆古治屬在聖時恭惟皇帝陛下道
心之微獨該眾妙帝德之運丕敘九功天貺傳臨春祺紹至用敷
錫於黎庶期永措於丹書臣等獲備憲曹敢後四方之賀願貽史
觀時書千載之逢

時靡有爭刑措不用當宣室齋居之暇絕季秋請讞之文歡心交
通協氣充塞臣等中賀惟土宇生齒之眾有獄訟簡書之繁於鑠
嘉師克承休德茲報論之悉下知逮繫之一空矧邇誕辰方蒐慶
禮臣鄰拱極夷裔觀光玉帛駿奔紀虹流於華渚析楊盡委奉草
鞠於園扉凡厥懷生於焉歸聖恭惟皇帝陛下道侔天運與物皆

昌政本日新使民不倦揭太平之備典御假樂之盛時年穀屢豐
珍祥沓至顯顯百順之福巍巍九敘之功方將坐陽館以朝諸侯
登介邱而禮上帝繇一人之有慶敷錫多方致雅俗之無刑適追
治古臣等優游遵職鼓舞抗章竊效嵩聲共獻萬齡之祝願貽史
筆特書千載之逢

福以類升慶爲民賴當三朝之勝會訖五辟之微文盛事係傳茂
恩旁暢臣中謝海宇至廣犴獄實繁唯底時雍乃臻刑措矧正月
布治之始方萬民觀象之初百辟奉觴異邦在列由中及外如皆
樂於一堂以古況今豈太平之無象恭惟皇帝陛下帝德之運乃
聖乃神道心之微惟精惟一懋建皇極永清化原肆丕冒於嘉師
罔或干於中典桁楊不用簡牘何施臣等叨備攸司獲觀丕應奉
萬齡之祝方幸筵於朝紳書千載之逢願特頌於史觀

代宰臣以下賀獄空及大理寺斷絕表
日畿嘉靖四陳囹圄之空棘寺肅清兩奏簡書之絕臣鄰歸美郡

國告成曾未涉於歲時已屢編於史冊謂如盛際實掩前聞臣中
賀竊以治格熙淳教化行而爭訟息俗躋富壽衣食足而廉恥興
迺形止辟之風克副好生之德恭惟皇帝陛下神機獨運聖學兼
該以文武之憂勤有堯舜之孝悌繼志述事動懷明發之心布政
施仁每頒中出之詔民咸遠罪邦用措刑矧當孟冬甫臨誕節北
鄰修慶西敵造朝上奉萬年之觴共申善頌下罔一夫之獄昭示
閔休臣等均被寵恩共膺榮祿願稱燕雀之賀庶殫葵藿之誠

稿文集卷十一

稿文集卷十一

神宗皇帝聖政頌 并序

臣某言臣幼釋耒耜爲諸生學問辱在鄉選遂竊名第紹聖二年
初立宏詞科有司以臣程文奏御蒙先帝誤恩擢備學校於茲七
年矣惟臣質薄材下行能亡異循循默默罔克稱塞獨觀自昔大
有爲之君其宏休偉績必有俊傑之士馳騁翰墨鋪張揚厲以警
動天下傳之無窮恭惟宋興百有餘年神考以天縱之資崛起於
五聖之後內修法度外攘夷狄日月所照生息無極巍巍典謨所
陳奚以尙此陛下踐祚推原太平之自發德音下明詔尊崇廟祀
百世不祧建景靈西宮以顯承爲館御之首其永紹裕陵之言形
於聲詩繼志述事之意揚於訓辭學士大夫宜廣陛下孝思之誠
爲雅爲頌以形容神考之盛德大業如維清執競長發之詩臣是
以不勝惓惓復自念漢永平徼外遠人槃木白狼獻詩歌德譯在

史館矧臣自託於藝文待罪國子雖語言淺陋不足自效夫豈遠人之不若哉謹齋心滌慮撰成神宗皇帝聖政頌一篇願辭不稱事未究萬分之一亦臣之極思也如蒙陛下假清閒之頃特紆睿覽臣退入溝壑死且不朽謹昧死繕寫隨表上進以聞臣無任瞻天望聖激切屏營之至臣誠惶誠懼頓首頓首謹言頌曰
有宋受命十年維億前義後昊配天作極於赫神考紹休五聖篤實輝光剛健中正考古驗今慨然有爲手撓顧指雷厲風飛秦漢以還因陋就寡樂變於淫禮求之野下及五代十有三君朝弗慮夕罔卹典刑爰自建明寢明寢昌一變至道以詔後王神考若曰惟天祖宗旣以命予予曷不從迺收羣策斷以不疑乾旋坤轉咸蹈厥機王政之行越有先務水利土工惟民是裕旣勸相之申以保息懋遷有無平頌興積孰謂民遠如手撫摩遣使宅牧究宣惠和昔在祖宗賦力於下校登夫家以令施舍行之百年民執官功法久必弊惟變乃通神考念茲先定等籍歲均厥輸官爲徼役商

農工賈咸奠爾私毋擾牒訴毋虞鞭笞昔在有周士貴以肆賓興賢能惟德惟藝旣望終魄東極於隋雕蟲取士壯士不爲神考念茲罷黜聲律論秀烝髦選取經術賢關載闢敦學惟醇鋤荒剔蠹統一道真昔在有周六卿分職區區宇文嗣修品秩唐正在位參稽周唐以辨官治若網在綱□□□□小大相維循名責實百工允釐昔在有周稱秩祀事惟郊配天惟饗配帝曲臺失職淪胥異聞或陳九祭或創兼尊神考念茲章別隆殺靈神一天聿嚴專配惟聖饗帝惟孝嚴父發揮禮容以格神佑昔在仁祖作宮永安名曰會聖以游衣冠厥惟京師數奉神御散於羣祠禮若未具神考念茲迺卜景靈陰藏陽耀寶祉萃興像設嚴嚴颯颯降格妥侑孔時裸獻維則昔在寶元元昊陸梁爰暨熙寧交趾亂常惟羌惟蠻乍臣乍叛羈縻涵養習爲驕悍神考念茲迺伐仇方南潰楚越右復河湟河湟旣復羌失右臂揚武橫山往城要地昔在有隋醜爲汴流控引淮泗夙達邗溝濁流千里洶洶電激舠摧艦覆閒不容

息神考念茲迺導洛水釋釋清源來自熊耳盈科而進匪亟匪徐
風航雨楫既安既舒惟昔刑書編次散敕與律並行時損時益凡
目寢廣疏密不論輕重抵牾罪失厥情神考念茲肇修品章科條
金玉以約御詳蒐補闕遺刊正謬誤芟夷潤色制例兼著猗歟偉
歟經始熙寧迄於元豐展也大成鈞衡鍾龠車服旂常軌量以度
物采以彰金石鞅協曆象考證以諧八音以齊七政藥劑有任工
技有程緝熙庶績罔不勵精賞必選勞罰匪作惡播告不既俾克
畏慕俸優公家交屏私室砥礪廉隅以清回適議刑左學訓武西
序博延數塗疇逸銓敘課試任子甄用公族較短較長俱收並蓄
聯民鄉遂寓以伍符爰糾姦慝爰比追胥越井參旂百將分戍前
茅後勁既閒統馭簡稽戎器搜閱材官帑廩備預廢牧阜蕃惟時
惟幾規模宏遠神而化之用藏隱顯於乎神考誠明生知終始典
學道心精微肆筆成書吐辭爲經河洛之瑞雲漢之明明廟謨
出入韜鈴鍾靈神武法天動潛外絕進獻內擯聲色覽奏夜艾聽

斷日昃苑囿弗繕宮室弗營城池龔固府寺增宏迺對草萊裒進
巖谷一藝必庸小善必錄賓禮耆舊省納諫諍以鎮澆浮以激柔
佞追美先正表揚厥勳圖形原廟爲漢麒麟瞻言闕宮義爽同几
升祠四后式燕祖妣明發不寐有懷二宗祇嚴徽冊維極顯崇奉
事東朝恩性天至輦道安居懋昭孝治友睦同氣華萼相輝神禎
匪效羽翼在茲惟功與德儷蹤典墳規重矩疊不可殫論十有九
年休應以類海不揚波遠人慕義惟時臣子薦號中天謙沖退託
詔無復言介邱壇場日月以冀獨觀昭曠抑而弗議惟天祐之聿
生元聖永明孝思答揚光訓迺尊廟祏百世不祧若武之穆若文
之昭迺建西宮列峙中經比隆皇武冠以顯承祖功宗德既克兼
之作聖述明惟其盡之子子孫孫率迪大猷無有後艱永孚於休

記

甘露記

予守汝海以堂宇敝甚徙寢室於訟廳後之涼堂上舊隔舍爲予

書院涼堂之後隔舍之前有竹數十竿予出入廳事日盼此君一夕夢有人告甘露降矣子奚弗省也予次日晚偶記所夢往視竹上露顆圓瑩如珠點綴甚密嘗之味甘如飴時大觀四年十有一月晦也自經晴日或暴風大霧又三雨雪雪既釋露凝如故予初折示郡寮留賓凡案竹葉已瘁而露益明潤既久味若糖霜然至十有二月晦竹閒粲然猶不晞云

香山天竺觀音禪院新塑大阿羅漢記

汝爲州當嵩山之陽縈帶汝水土脈膏腴旁近郡旱潦不登汝輒豐稔以故民力優裕地左許右洛南襄北鄭而非舟車衝道賓旅自遠至視其閭里愉愉舒緩謂之樂郊然僑寓者多晉人習尚儉嗇室宇僅蔽風雨不厭庠陋車馬衣服大率稱是而獨崇信鬼神祭奠獻施無所吝惜其奉佛尤爲勤至雖五代干戈擾攘日不暇給而境內禪刹號古道場者三四其名僧機緣見於載錄者踵相躡也香山寺在郡城南百餘里唐宣律師嘗授之天人以是爲觀

世音菩薩化身之所士民重趼瞻禮罔有虛日竟有祈禱佛光見前或小或大或遠或近或多或寡合散轉移不可測度乃至見於大雨霧風雪之中其靈應顯異蓋如此大觀三年住持比丘法成謂其徒曰茲地殊勝邦人欽奉而像設故壞散列於埃壘之下網絲之閒四方來觀者生慢易不可不易迺命工造夾苧縷金大阿羅漢十有六從侍十有四龕帳供器皆備費凡三百萬出常住贍衆之餘閒有助緣者初未嘗干句也四年秋設齋慶成有光見於塔頂經數日乃散嗚呼色見聲來釋氏以爲邪道至莊嚴布施則又以爲必若是然後爲信心成師有得於宗乘者於此宜辨其說矣然今天下山林勝處皆建道宇佛祠而佛祠尤盛如香山光景效靈又天人顯告見於宣律師傳甚詳非他叢林比也成師方舉揚真諦而不廢土木之飾此非徒然爲演其意而說偈言諸佛之示見如彼水中月影隨露潤生豈復有量數羣生欲見佛亟以聲色求如攬水中影圓明散何有莊嚴具百寶佛子所當知

閔茲迷妄心方逐萬境轉瞻言一念起如土布嘉種因緣能發明
長養至成就香山勝妙地觀音嘗降身精廬聳摩雲神物陰護衛
士民輕千里聞所聞而來佛光應宵矚讚歎世希有復覩像設姿
樂說無窮盡有如展轉間咸發歸依誓不思議功德上以贊宸躬
遐算等乾坤萬邦均慶賴

笏記

集英殿春宴笏記三首

祥風應律茲爲布德之辰滑露零廷爰舉示慈之宴恭惟皇帝陛
下乾坤化育日月照臨有壬有林以序九賓之列如山如阜共稱
萬壽之辭

誠心昭格沴氣消收凡在照臨敷同鼓舞恭惟皇帝陛下如乾獨
運與日並明治功方敘於九歌禋異宜消於十輝臣等夙膺榮祿
寢冒近司獲被休祥實均慶賴

誠格上穹變消內壤凡居覆幬均被榮懷恭惟皇帝陛下丕敘九

功誕膺百福方珍祥之沓至宜沴氣之潛收臣等叨備近司與聞
休應奉千齡之瑞祝肩四海之歡心

序

御製論大道文後序

臣某拜手稽首言曰道若大路然凡麗乎聲色象數孰不由之近
取諸身嘖笑顧指起居食息無非衆妙之所寓惟其由之而不知
故逐物轉徙去本益遠聖人於此立言開明俾聞之者如索塗冥
行廓然見曉隨其性分卽其所安嗚呼非博大真人孰能與此恭
惟皇帝陛下躬蘊道真懋建皇極所以配神明享天地丕冒羣倫
者旣自得之方且深根固蒂長生久視以同乎太古又親御翰墨
敘大道之要昭示訓迪自羲畫禹疇與夫琳札所紀瓊笈所藏於
焉發揮言約理盡萬邦臣庶伏讀睿文迷者斯復窒者斯通是訓
是行同焉皆得將見還淳返樸如太古之時顧不盛歟
邇英閣無逸孝經圖後序

臣竊觀國家承五季之後太祖太宗經綸草昧南收江湘西定蜀漢北翦汾晉盪滌妖祲天步廓清迄於太平厥惟艱哉眞宗繼之中外嘉靖緝熙百度文物粲然仁宗承三聖之後念創業之難與夫持盈守成之不易也業業兢兢常懼一事一物之失宜不足以駿惠前烈其默而爲思言而爲議見施設法度政教所以照臨海島甚盛所以加惠元元甚厚猶以終始爲一者帝王所深慎也於是考先聖人之言尤切於治者以自勵乃命近臣書無逸圖於閣之左又書孝經之天子孝治聖治廣要道四章圖於閣之右朝夕顧瞻若周孔在焉昔周公作無逸陳古先后之盛與夫稼穡之艱難槃樂游田之害政以戒成王而其務以勤爲先孝經之四章稱先王至德要道所以合同天人之際者而其原以孝爲本是二者人主正心修身以御家邦無以尚此夫仰天而天不倦俯地而地不怠則成位乎兩閒者孰過於勤在天有經在地有義則成能乎兩閒者孰大於孝且有天下者非謂以天下奉一人也天下之大

以一人治焉以至衆望至寡則其責備以至靜視至動則其慮深得失在於九重而利害及於四海善惡垂於萬世故人主必金玉其言規矩其行德合天地明並日月然後足以垂無疆之休然則周孔之訓其可須臾忘耶雖然此豈有他哉顧在心術之閒而已誠能處堂陛之廣而思天下之民有不安其居膳膏粱之旨而思天下之民有不飽於粟服綺紈之美而思天下之民有不足於帛臨鐘鼓臺榭之樂而思民之所以憂享宴安優游之逸而思民之所以勞日旦坐朝鷓鴣鷺在列而思賢士或有未進奏章在前聽決可否而思事情或有未通念前之所以託於後萬邦之所以願乎上者夙夜不替曰若是而後爲古先王之勤又若是而後爲天子之孝也惟勤與孝一舉兩得而天下不治風俗不美頌聲不作天瑞不至者未之有也仁宗允蹈之是以盛德成功格於上下詒燕後世比隆唐虞其效豈不彰明較著哉夫上論其人於寥寥千有餘年之前求其遺言置諸左右若朝夕納誨然願治之意深矣

遠矣嗚呼盛哉臣拜手稽首謹序

送吳顯道序

熙寧元豐閒某爲兒童時聞顯道名至會稽始幸交焉其後紹聖某年山陰令闕顯道攝邑事士大夫往觀焉時婚田務開牒訴盈庭吏抱案牘列廡闐溢顯道隨事剖決筆不停綴吏唱判辭燥吻續以他吏辰漏未盡盤錯一空頃刻閒聲譽沸騰顯道先領從事至是猶兼之往來兩閒綽有餘裕大率明而不苛嚴而不暴以意犯法者雖細弗宥過誤者哀矜而出之人被其鞭撻再拜讚謝自以爲不冤也每視事曰某人某日嘗以某事來吾弗直今奚復訟某事某日嘗以某名來吾弗直今奚更名被訊者恐懼首伏吏白事顯道曰某事於法不當治某人於法不當逮輕重緩急吏不得舞弊邑境大說往往圖像以祠之於乎顯道以學問文章爲荆公門人高弟當先帝盛際物望輝赫視青雲與平地等耳而自珍太甚不少降意世變互更晦迹不耀春秋高矣屈佐百里涵蓄深厚

未嘗發泄治山陰數月政績可驚使之得志功烈宜何如哉人知顯道學問文章而弗知從政之才故論次爲送行序云

議

玄圭議

玉質溫潤赤與黑雜眞玄色也以古尺攷之其長尺有二寸唯天子之圭爲然考工記稱鎮圭尺有二寸天子守之是也周之鎮圭以四鎮山爲飾今圭之首其左右刻四鎮山與周制同然周之鎮圭刻上今圭首雖刻而爲椎形椎首乃大圭之制蓋自唐虞至於成周沿革損益大同小異猶登龍於山登火於宗彝也其瑑爲雷雨之文者三代以前禮器類以雷雨爲飾尺有二寸之圭以周制考之爲六瑞之首其瑑雷雨以象天子法天以施澤於天下也其中爲圓空者考工記稱天子圭中必注必讀如鹿車繹之繹其訓則縫也天子之圭中爲穹縫以組約防失墜也三代天子之圭與夫公侯之所執乃至用以禮神者其玉或青未有以玄爲色今圭

色玄則其爲堯圭也明矣蓋天以玄圭授禹而禹以錫堯玄天色也堯以天道治天下故圭之色象堯之治符瑞志稱水泉流通四海會同則玄圭出蓋水泉流通則水得其性水爲五行之首言水得其性以明五行皆得其性也四海會同以言中外嘉靖無一民不被其澤也五行得其性兆民被其澤則行天之道同於帝堯萬邦時雍同於陶唐此玄圭所以出也五行傳以宗廟禱祠祭祀天時爲水潤下之應以謂聖人建宗廟以安祖考春秋祭祀以盡孝道王者郊祀天地禱祀神祇望秩山川懷柔百神罔不宗事致其齋戒鬼神歆鑒以獲福佑以和神人至於發號施令順協天時則陰陽調而終始成如此則水得其性皇帝奉若天道紹述先猷祭祀禱祠吉蠲盡禮政事設施格於上下臣民慶賴遐邇惟一以故大河澄清守臣屢奏遠人效順史不絕書所謂水泉流通四海會同者在於今日此玄圭所以出也

策

治法

問蓋聞法不獨立推而行之存乎其人猶規矩繩墨雖設必有舉而用之者然後方圓曲直物莫能遁古先聖王以道制法御事不以法從人也而人惟法之從不以人擇官也而官惟人之擇官治其職而人足以任之然後以類舉而事功立焉主上念文昌政本自神考肇正官聯大小承式迨今三十有餘載實德在民頃者清蹕俯臨天旋六部又親御翰墨延見庶工而訓迪之亦惟元豐良法美意垂裕乎後而行之在人嘉與在事之臣欽承彝憲以隆太平伏讀明詔曰其慎爾止無載爾僞以制議事以公滅私無瘵厥官無怠忽荒政修舉憲度罔有不孚大哉王言與詩書所載若合符節其丁寔戒敕至誠惻怛播告之文學士大夫其亦與聞之矣今欲有官君子體上之德意志慮虔共夙夜無或便文官修其方法行其意各以行能功實仰稱詔旨若之何其可試爲有司言之人才

問大雅有言濟濟多士文王以寧又曰藹藹王多吉士古先哲王創業受命與夫太平守成未嘗不求端於人才而人才之衆必自人陶冶而成之械樸之作人菁莪之育材此其成之之效也恭惟皇帝若昔大猷恢崇學校以幸教天下烝髦論秀而臣使之豈惟寵榮其意者迪以學術則義理明董以師儒則道德一待以曠日持久學優行敕而命之以官則其才皆足以有為其志皆足以有守夫以禮樂法度之備付之有官而任官者皆陶冶已成之才太平之基所以永永無極也然則上之期於多士蓋若此雖然知自貴而後外物不能挫其恆知自信而後邪說不能干其正苟輕重取予與俗轉徙而欲以所學為天下國家之用一出焉一入焉曾不足以美其身烏在其有為有守也士被教養而從政於此知所安矣不然則援其失祛其惑益其所不能亦必有道願著於篇

史材
問史官之權甚重褒貶所及傳之無窮不可磨滅唯學至博識至

明而文足以形容之然後議論不詭於古人詞采可傳於後世由漢以來言史者稱司馬遷自劉向揚雄許可以後皆稱遷有良史之才諸儒臆之罔有異說而唐蕭穎士獨深罪遷不編年而為本紀書表世家列傳失史之法然自遷合言動為一分史目為五後世因仍不能加損而穎士獨深罪之何也古人有言智者作法賢者更禮隨時制宜不必一道使遷之法誠是何必泥古以為失史之法耶後世不能易何哉諸生試陳之

禮制

問孔子曰安上治民莫善於禮唐虞夏商周之盛禮之損益見於載籍人主美化善俗流澤子孫蓋本於此世衰道微典章隕缺羸秦以降因陋就寡君臣敕戒不過簿書獄訟之閒雖有仁心仁聞不可為法於後世故漢宣帝時詔書每下民若更生而王吉以為可謂至恩未可謂本務也神宗皇帝監積習之弊親策多士命官討論主上不承先志申命有司設局建官講求一代之制惟宮室

之度器服之用冠昏之義祭享之節學者宜所深考願與聞之將以獻於上焉

學術

問勸學以風化四方太平之原也先王之盛時制成均之法合國之子弟而教之下至五黨之州有序以會民而諸侯之教又命於天子所以一道德同風俗作成人材以趨事赴功雅有菁莪既醉其原自此神考勵精庶政求端於學以追隆治古訓經術恢館宇增弟子員其流及於郡國廣建學官以教多士洋洋乎成周之治宜無以進此今太學月書季考升舍限年率舉熙寧元豐之舊士固鄉風承德矣而學之在郡國者防範糾督之疑若未備也夫惇講授之選博延多士供億仰於公家而命之曰學豈徒徇虛名哉惟熙寧元豐成式具在事之未究者嘗許條例以聞將推原美意稍嚴課試選出之法使士知所勸若之何其可願與聞之

宗學

問荀子之於勸學有言曰德操然後能定能定然後能應學者至於能應則其有爲也若決江河沛然孰能禦之古之人或延以三旌之位而弗顧或乘田委吏而安之或享以萬鍾之祿而弗受或簞食瓢飲而樂之彼輕重在我而不在物故進退取舍處之裕如若然者其君用之則安富尊榮其民從之則孝悌忠信蓋存乎中者素定故建之行事若此主上畱神宗學所以訓迪之非止應有司之選而已淵源經籍涵養道義其操術既定則守身從政將無施而不可諸公子仰承聖造其自得於成心宜有可言古之人能定能應者世有其人頌其詩讀其書其志可考以所得於今論所聞於古試爲有司陳之將以觀所學焉

望之不極卽之不測放之不濁靜之不澄酌之不損增之不盈蛟龍聚焉風雲興焉彼潢汗行潦之水朝滿夕涸亦何能自致於此古之大有爲於世者雖才之不可及然必有非常之度伊尹之耕傅說之築太公望之漁非不貧且賤也而不以爲戚一旦舉而用之輔相人主而不以爲泰其所養有大過人者故所建立若此其盛也推而下之凡以德業自進者莫不然西漢賈誼號爲多才一不得志悲憤以死蓋有其才而無其度也閤下負天下名二十有餘年出入中外視後進與同升之在己上者而志不動顧先進與同升之在己下者而志不矜恢然有容毅然自守其讀書見古人若此猶忻慕之況與閤下並時又曩昔南宮奏名出自衡鑑今者以主生之禮求見左右閤下念某之勤恕某之狂一與之進不勝幸甚

又

某曩者天幸屢獲拜見辱下執事接之之顏甚溫誘之之辭甚詳

執事之獎引後進亦已至矣是時某憂制方闕心氣未寧不獲有請於左右某幼好讀書及長益勤不愧蠟等緬想古人之所聞而欲盡得之迺究觀經史諸子百家之言雖貪多務得不間精粗而性質顛蒙過目輒忘獨於古人議論設施之際與夫成敗興衰之由有激於心不能自己或沈吟深思或研味餘意或躍然自喜或惘然自失或可嗟可怨可爲太息或可惡可怒可爲填膺意不自已則發於聲聲之不足則紀之以文故自卅角以來家無兼日之儲而不知以爲貧窮居閤閣而不知以爲賤開卷有得足以自適舉在外者皆無足以累此戊辰年春執事不以某不才備敷奏籍獲齒官學今者爲貧竊祿猥佐一縣乃釋向之所樂以從事乎俗簿領盈几文檄繼踵目覩手握米鹽瑣細進欲自拔於流俗而不能退欲翻然引去而不可檢身自潔與衆異趣則謗誹讒譖不約而會違己從衆與之無迕則枉尋直尺所學非是將求執事一言以破所惑惟執事幸教之將書諸紳以朝夕從事焉僭易之罪伏

某碌碌晚進猥佐下邑沈迷吏役齷齪與轅下駒無以異也迺不自揆獻書下執事夫豈徒然哉竊自惟天下之才天賦之可謂艱矣而天下用之未必盡也夫有周物之智而用之不盡則有餘謀有過人之能而用之不盡則有餘技謀技有餘功業不極此有志之士所以激昂深悼不能自己也蓋士之仕也豈徒干祿而已固將有爲也使之挂冠不出遁逃山林枕石漱流與麋鹿俱彼復肯念此哉既投迹有爲之地欲自見於世迺無路以進求進而恥於自鬻雖甘心於自鬻而時未必售故士之有才者又以獲用於世爲難也猶蠅飛不出牆宇附隼翼可以冲天蟻行不離步武得驥尾可以追風間巷之士勢卑力弱非有所託不能自致於青雲之上古人之於晚進或倒屣以迎或下榻以延或比之古人或自以爲不及嘖笑警歎爲之品題而聲價自定彼豈邀譽於時求德於

所至而然哉蓋惟仁者爲能進所知惟智者爲能知所進仁智君子之所盡心焉觀古之名卿相必有知人進賢之德使當時薦紳瞻望一眄以爲輕重而後世想見風采恨不與之同時中間持祿患失避嫌遠謗無所薦拔自同寒蟬者不獨當時嗤鄙而史官譏貶後人詆訶臧文仲聖人以爲竊位虞邱子婦人以爲不患指議所及百世之下不可磨滅顧不重歟雖然古人之知人大率以言孔子曰不知言無以知人也蓋言心聲也言之所鄉志之所在孔子之門人非不日見之也而謂二三子盍各言爾志雖曰失之宰予猶堯之於鯀子產之於校人非智有所不及顧逆詐之非道也彼少正卯鄧析非不僞而辨蘇秦張儀非不巧於說騶衍公孫龍非不工於誕彼豈不欲文過飾非攘天下之美而有之而下流惡名欲益益著者理義之不可誣也故所謂知言者非多言之爲美亦非寡言之爲貴或以言得之或以默得之可以意會而不可以言傳此古人之妙也某竊觀執事以文學行誼負天下名二十有

餘年回翔所至品題士類甄別精確取信天下某筮仕之初獲備
屬吏瞻望履舄顧不幸歟雖然如某之愚何足以進見於下執事
然竊自惟某幼承義方之訓妄有志於學半塗爲貧竊祿從官進
於深造而不能退顧碌碌者而恥之深念某之所賦尚可進邪抑
不足教也而懵然不能自測今者請命典謁以質所惑閣下以默
知人則不待某言較然判矣如以言則某之書可見矣幸閣下少
畱意焉

謝人書

某頓首再拜某官伏承執事不以某不肖遠貺手筆敘三代以上
君子致身從道之方下及漢唐諸子且勉某以所輕重大率先遠
者大者而近者小者無取焉某性質顛蒙雖不足議此而樂聞之
誠願學之意猶之稚子而遇希世之寶目覩手握不能名之而知
喜之雖知喜之不敢有之夫三代而上天下之士去古爲近離道
未遠君上之所率迪庠序之所教養父子兄弟比閭族黨之相與

言以本勝末重內輕外氣完而不挫是以度量恢廓志操端潔見
識高明後世去古益遠士風衰弱能不待文王而興者謂之豪傑
之士孔孟旣歿微言奧義泯滅幾盡戰國之風操捭闔之術演從
衡之說身委勢權死而後悔故士日趨於詐西漢以奔競相高朝
奏尺牘暮被召命天子歎息恨相見之晚故士日趨於矜東漢以
隱居放言爲高屢聘不就爲廉刻意矯情甘足枯槁故士日趨於
僻兩晉而降質幹戕盡枝葉彫零謂能談諧爲風流外形骸爲曠
達故士以浮華相耀譎怪駭俗唐有天下三百年士風幾類西漢
然文雅醞藉不逮漢遠矣下及五代廉恥道消不足比數嗚呼千
數百年間如董仲舒賈誼揚雄王通韓愈之徒雖卓然自拔於時
然以古義責備猶不得爲完人況夫他哉夫古今殊時名實寢紊
昔孔文子敏而好學不耻下問孔子以爲文顏淵不遷怒不貳過
孔子以爲好學今綜輯辭采則曰吾斯之爲文涉獵載籍則曰吾
斯之謂學豈孔子之所謂文學也哉某雖不敏考古論今有激於

衷而下執事又幸教之敢不夙夜黽勉庶幾小人之棄君子之歸
乎至於古人去就輕重之理皆執事自得於胸中者某恭聞命矣
不宣某再拜

某幼嗜學問稍長以博綜自喜貪多務得欲兼古人之聞而有之
惑於疑似戰於予奪如航大海罔識涯涘然不自以為非也伏承
長丈特貺金玉之音俾先六經孔孟之學後子史傳說之言屏去
異端之害道者某始聞之而懼中得之而喜以謂擇之不慎思之
不精汎濫之學幾不免為陋儒此某之所以懼也然以六經孔孟
為權衡而諸子百家無所逃於輕重以六經孔孟為繩墨而諸子
百家無所逃於曲直故言雖殺辭而折中於聖習雖支離而統
於道夫亦何慊於博乎嗚呼六經孔孟猶日月之明衆星嚙嚙之
光不足觀也為雷霆之聲衆啄冥冥之音不足聽也日月之明而
瞽者不得見雷霆之聲而聾者不得聞彼舍六經孔孟之學而曰

多見多聞將焉用之某自今以往當研精覃思推原六經孔孟之
書以求先聖之用心以之治身以之事親以之事君必有以副執
事諄誨之勤更冀終始成就之

論文書

某欽服高誼請命典謁執事愍茲區區見之甚數接之甚溫又於
廣坐中過譽某之文竊自惟蠢蠢晚進無聞於時何足為下執事
道者而樂善之誠動於顏色形於話言有意羽翼之使騰躍而上
也然則大人君子之所存可知矣某聞之士伸於知己者而屈於
不知己者某雖不足以言文然執事許之試為執事論之夫文章
自古為難非為之難也知之難矣非知之難也得之難矣非得之
難自得之難矣古之人無意於文或以明道或以敘事以為默不
足以自達則宣之以言言必有紀則述之以文故古人之文渾然
天成罔有凝滯猶渾金璞玉不見有追琢之跡後世不然務華者
以侈靡為麗務巧者以雕刻為工務怪者以險僻為高務豪者以

馳騁爲壯各揣所好互相標目其不淪於俗者蓋無幾也故斯文
陵夷無復古人之盛孔子之門人顏回亞聖而文章不少見孟子
著書七篇穿貫古昔上下數千百年而曰距楊墨放淫辭予豈好
辨哉予不得已也故古之人可以無言則文與之俱熄有感於物
而言則文與之從事焉緣督而言因言而文此古君子所以異於
後世也某以爲文之要如此是邪非邪下執事幸教之
請益書

某生長陽羨與執事同里雖門宇相望而前此未有承教之幸每
缺然不饜於心今者不待請見千里獻書非有他求也竊自念某
妄意讀書究觀經史諸子百家之言細大不捐必欲盡得古人之
所聞以故博而寡要雜擾並進方且惑於疑似戰於予奪如立九
達之衢而未知適從輒懷古人愛日之意冀得亟聞緒言以豁蒙
鄙此某區區之懇也某聞之聖人之經有六而性命道德典章法
度乃至天地鬼神萬物之理罔不畢具如大海之水波濤起伏蛟

龍出沒珍怪隱見廣博無涖淵深不測天變地化涵蓄萬狀又如
寶肆望之粲然卽之眩然有循牆而不得者矣有窺見而不能盡
者矣有寘諸掌握而不能名之者矣自孔子孟軻沒後微言旣息
奧義不彰而諸儒人自名家貶黜所異乃至父子有不同之論生
師有相誚之辭中間不移於流俗者蓋無幾也夫三代而上仁義
禮樂之澤日以沾漬士大夫浩然之氣擴於所養世人所謂學者
凡事親守身應物從政遠者近者小者大者無非學也凡立言以
明理爲文以紀言從容自得咸與道會或累千萬言而不爲辨或
終身無所見而不爲訥後世士失所養學棄本真區區口耳之習
務投時好至謂取青紫爲明經術之效豈不誇哉是以士大夫心
與言相違言又與道相戾而古人之大體不復見矣子路曰何必
讀書然後爲學孔子曰有顏回者好學不遷怒不貳過嗚呼彼孔
子之所學何遠耶某雖不敏尚論古之人竊有志焉而未聞承學
之要執事與鄉里甚厚而家貧又忝葭莩之末或蒙不棄賜以諄

誨俾適正審是不迷於多方某之佩德曷有窮已不宣某再拜

啟

謝教官啟

班級雖卑報稱攸重載循譎陋伏積兢慙竊惟先皇帝躬上聖之姿超百王之右體元用妙口明闡幽深惟風化之大原尤以膠庠爲先務崇尚經術尊寵師儒增諸生之員勑三舍之法下逮泮水咸建學官雲漢爲章皇矣作人之運規矩厥步靡然承學之流萬邦作孚一變至道暨今聖總攬之始念神考在宥之隆克監成憲於先王以治建邦之學政支起傾廈遏迴狂瀾聿興斯文駿惠大業凡都雲龍之作復見天地之純豈繫荒疏濫居教導如某學問不足以窺聖賢之奧辭章不足以暢理義之微初非語上之資徒有好高之志特以聖世育才之廣先人教子之勤幼而讀書幾不知弄謬當弱齒偶玷榮科屬試麗詞薦塵異選方仰斗升之給敢辭簿領之勞不圖恩波俾依聖仞祿廩可以奉親養經籍可以味

道腴優游在公顧何殊於吏隱詰屈難困第有愧於師嚴此蓋伏遇某官爲時真儒秉國大政茂贊乾坤之神富赫增日月之光明博求俊良靡問幽賤借齒牙至公之清議欲俎豆不肖於俊游幹寒谷之孤根鼓朝陽之嘉律馴致僥倖獲被寵休某敢不遜志慎思砥節勵行敦學相長竊慕於前聞功名可爲肯忘於異日

改官謝啟

帝闈引籍選部奏名適足華紳欣雲天之在望脫身冗調幸綸綽之親聞豈謂辱微有茲叨昧伏念某奮身寒遠遭時盛明輕尺璧而貴寸陰雖云有志持千金而享敝帚殆不自量惟義命已決於胷中故窮通悉捐於度外爲貧干祿以仕代耕初絲經術之科效官簿領迨玷藝文之選備數類林爰暨更書猥塵薦格偶逃官謗輒與明聞朝著乍趨有小臣違顏之感臚傳驟及如當年唱第之儀仰冒隆恩靡安愚分此蓋伏遇某官廓包荒之度推樂善之誠品題一鄉夙借汝南之月旦模楷多士幸登元禮之龍門實賴譽

言獲階榮路氣回黍谷方資春律之和海接星潢更假秋槎之便
過此以往未知所裁

謝試中宏詞啟

試詞伊肇方搜穎出之才獻藝匪工猥被鼎新之選拜恩優渥揣
分戰兢竊惟斯文盛衰與道升降五帝而上載籍蓋靡詳焉三王
以還典章顧可考矣暨戰國干戈之擾及暴秦煨燼之灾異端並
起如蜂精義不絕如綫操觚之士雕蟲是師景差宋玉唱於前枚
乘鄒陽應於後務豪則摧嵩岱喜怪則窮蛇牛競巧則較錙銖紛
華則繡鞏悅雖賈誼節之以禮揚雄戒夫不為而氣力不足以回
狂瀾故支撐不足以起大廈由漢及魏浸淫迄於六朝更隋與唐
敗壞極於五代中間若建安之稱麗作正始之指名流咸高亢長
之辭無復中和之氣乃有不出月露之習相變宮羽之談或擊鉢
責程或探囊按部或成章於七步或積思以十年率意者流離於
口占湛思者安帖於腹橐宏衍若張衡而以言艱為病敏捷如任

昉而以才盡見譏異轍同奔去本益遠如孤峯絕岸者施之廊廟
則駭如麗服艷妝者類之風雅則乖張葉討源盡掃彝倫之正沈
辭麗藻徒滋誇競之風間有自奮而不移抑亦可數者無幾我朝
鑒積世造士之弊先帝承累聖復古之心登用儒臣緝明教典聿
興經術之學斥去聲病之科煥乎人文一變至道淵然神化百聖
不慙尚念應用之詞乃有設科之意迨今上之總政追神考之作
人爰建新科以述前志昭示古今之體詳求辭理之優創置攸初
勸率甚厚上意所注眾指為榮紛如簪裾粲爾翰墨或握靈珠以
自謂或賤良驥而不珍豈容孱姿濫塵異擢伏念某學惟自信才
不逮人補苴徒勞而少功濩落頗譏於無用檢身慎行初不求於
世知聞禮言詩蓋第遵於家訓青氈惟舊白雲無心亭敞帚以干
金雖非審己漱芳名於六藝聊可怡情謬當弱齡亟玷榮第斗升
既竊於甘旨簿領敢憚於劬勞退食自公開卷有得樂分不競隨
處而安勉試詞場實慰倚門之望爭先俊域退慙應敵之難偶茲

裊甄出於僥倖此蓋伏遇某官命世英輔覺民真儒以道佐王爲時籲俊謂凡馬旣收則良馬必至謂假龍旣好則真龍乃來容茲一日之長備於五人之列某敢不冰蘗勵節葵藿傾心許國之誠拳拳於忠義致君之業勉勉於猷爲上副穆清次酬獎拔過此以往未知所裁

謝中書舍人啟

程篇甫上愧文采之不工恩典驟加驚寵靈之非據伏念某行能卑陋術業空疏預登經籍之科寢被師儒之選曩緣甄錄辱賜燕閒因誤褻嘉獲參讐校旋塵憲府口載筆於螭蚬敢玷高華遂代言於綸掖矧神聖述作之御方天人合同之時五星之軌循行諸福之物類至法良意美吏惟謹於持循民阜俗康邦已臻於熙靖赫茲盛際光於古初是宜深厚之訓詞克副休明之文物於馬循省豈不叨踰此蓋伏遇門下僕射相公業廣功崇道隆德峻峻齒牙餘論必慎擇於正人廊廟除書肆允諧於清議施及寒微之跡猥

深特達之知師席摠衣曾乏趨承之舊相門推轂實居薦引之先假以要途實諸法從積此銘藏之素罔知報稱之方敢不勤恪以赴事爲靖共以安分義退免譴訶之及進惟驅策之從過此以還未知所措

回謝黃學士啟

恭審奉如綍之溫文擢登瀛之華序傾馳有素欣慰交深惟自昔讐校之資乃諸儒涵養之地蟬別簡蠹芸披表香映扣閣之青藜嘗聞往牒詠當階之紅藥多出此塗恭惟某官學逢左右之原文得中和之氣揚芬鬢舍策足俊躋陪藏室之游名已書於藥籍垂置郵之問御初觀於冰條雖高誼之曲敦豈微蹤之敢冀永言欽佩罔喻誠悰

汝州到任謝兩府啟

自貽罪戾宜正典刑尚玷朝恩俾分郡寄退循僥倖愈劇怔營伏念某家本羈單最爲孤進仕安卑冗曾乏能稱遭遇聖明搜揚疏

遠偶預擢序寢階清華自忝從臣迨今八載再其詞掖兩貳省曹
陪經幄之後塵參禮司之末議迄無一得以效萬分自惟庸愚僅
守區區之小諒至於兢慎每懷惴惴之私憂顧智無先見之幾而
器有易盈之誚上辜任使亟致顛濟伏遇門下僕射相公德度有
容仁心不忍念茲寒跡舊出高閎秋賦掄材初備糊名之選晨朝
接武久聯持橐之班深慙慈憐特垂善救終賴保全之力遂寬竄
殛之刑恩比邱山雖銘肌而曷報心非木石豈感涕之無從
又啟

伏遇某官德度有容仁心不忍過私寒跡俾出高閎簞羽鷓鷯之
班初由獎借脫身風波之險每賴保全茲尤惻於慈祥用特垂於
善救屬言章之薦至方公議之弗容終賴緒言得寬遠殛心非木
石豈感涕之無從恩比邱山雖銘肌而曷報

汝州交代郭內翰先啟
右某祇膺明命獲剖左符久勤望履之誠茲假續貂之幸載馳長

道已及近封行遂參承預深欣慶

沿路先狀

右某赴官支郡假道大邦久勤鄉往之誠茲遂參承之幸獲欣預
劇敷敘奚殫

謝先狀

過沐隆私特貽華翰永言欽佩罔喻誠悰

赴關沿路先狀

右某茲馳廣陌將爾高閎敢修竿牘之儀少布腹心之懇瞻依正
劇欣慰預深

復修撰謝兩府啟

右某伏奉告命復集賢殿修撰者省愆夙夜方劇怔營肆宥臣民
與膺滌滌綸言俯逮兩涕交揮伏念某出本衡茅進由靡泮偶承
人乏寢誤聖知陪鵷鷺侍從之班筵帷幄論思之列寵私未整歲
月滋多緬想厥初敢越巢林之分叨承迺爾顧無橫草之勞唯求

退藏冀甘孤拙暨積愆之既著匪公議之可容尚賴廷簽照知本末特寬朝憲俾竊便安茲因解澤之施俄復書林之選洎濡爲渥報稱尤難此蓋伏遇某官本仁恕以翼贊大猷崇忠厚以表率庶俗凡士夫之小善罔或遐遺矧門館之舊遊倍加慈惻肆蒙甄敘出自記存某敢不恪慎官箴虔共吏治失之已往雖永咎以何追收之將來尚不辜於所學

復修撰謝本監司啟

伏念某迹孤地寒材薄能淺猥承人乏寢誤聖知陪鶴鷺侍從之班筮帷幄論思之列稽勞無補閱歲滋多逮積釁之既彰匪常刑之可貸分符汝海已出優恩列職書林復叨甄敘此蓋伏遇某官用心平恕操術慈仁加問辱微曲垂休庇俾脫痲曠獲冒恩榮

回謝新知汝州王大夫啟

飫聞風誼積有歲時比奉更書獲承除命方修簡牘之間庶展腹心之誠豈謂勞謙先詒芳訊撫序良厚感悚交深伏惟某官蘊識高明賦才閎廓任更中外著古人經國之猷事歷險夷挺志士危軀之節用孚賢業自結主知某養拙此邦迨經累月及瓜受代雖屈指而尚遙颺秕居前每捫心而自愧未諧參晤正切傾馳冀順節宣益隆福祉

回謝貢士樂偲樂傳啟

伏審上舍先輩較藝儒林策名貢籍周鄉論秀與聞造士之方漢郡觀能竊有得人之幸辱迂華轡仍貺長牋諒修桑梓之恭豈責瓊瑤之報聊塵謝福并展賀儀伏冀隆私特垂深察

關目

右某迹遠門牆念數更於歲籥誠陳簡牘冀仰答於台纏恭維某官氣稟山川辰逢旦暮奮揚賢業翊贊政機若時鹽梅用克和於鼎實爲國柱石方永弼於邦基比時嚴辰升華秘殿西都守鑰曩顧慙於師瞻中冓賜環行復登於柄任某羈孤寡與樸拙多違自拜車塵已周星紀橫經學省嘗先左右之容接武從班每借齒牙

之論逮有陶鑄尤辱記憐收錄於壠邱待盡之餘保全於風波幾
覆之際雖懷銘感曷報恩私茲假邦廩實居率部坐糜符印阻屬
橐鞬徒頌祝之交深非名言之可既

寄江寧安撫啟

已擇剛辰肇開雄府伏惟慶慰恭以某官道深造而自得氣直養
而至剛謀合唐虞之都俞文追商周之訓誥闡揚六藝時之醇儒
贊翼九重邦之元老比從懇請暨即使安民瞻愈傾公論胥嚮四
牡奕奕伫觀入覲之儀八鸞啣啣將邁遄歸之誦某戴恩素厚圖
報未能祝頌併勤名言曷既

冬至賀啟

氣應律鍾茲謂物生之始晷移星陸共欣日至之長伏惟某官業
履瑞時材猷經國風望顯於中外詠歌流於士民方穀旦之載臨
宜繁禧之並集某坐糜符竹阻造門牆顧敘慶於靡遑在馳情而
曷已

賀新正啟

四氣播時三朝啟朔陽居震而萌動物前寅而亨通伏惟某官重
德鎮浮嘉猷經遠以忠恪享上之實興慈仁澤物之功當品類之
咸亨宜福祥之並集某方糜符印阻望門牆徒虔慶牘之馳莫預
壽觴之薦

賀館職到任啟

右某伏審奉綈檢之溫文進蘭臺之清貫竊惟慶慰恭以某官早
席門望自結眷知映扣閣之青藜慙勞是正詠當階之紅藥行被
詳延特指高軒並攜大軸辱謙沖而過禮顧感悚以交懷
賀曹運判就遷副使啟

恭審就頒恩制擢正使名凡在統臨胥同慶慰伏惟某官深忠許
國遠業映時材適變通顧何施而不可政先豈弟宜所蒞之有聲
用結眷知進膺褒寵乘輶劇部躉資均節之謀筮羽華塗行著論
思之效

賀本路監司到任啟

伏審輶車臨部穀旦視章初奉使移已虔遵於條教坐縻郡紱阻竊望於光儀敢敘悃誠遠馳慶牘伏惟某官風猷華國業履瑞時材兼文武之全無施不可政得中和之樂所蒞有聲用結眷知遂膺臨遣外臺制舉暫爲揚歷之階前席論思別近詳延之寵

代謝向大王轉開府啟

榮荷殊恩寵升峻秩儀均臺輔品冠文階帝詔延敷物情均慶伏惟某官性資淳懿氣宇中和貴列戚藩夙著清通之節賢爲國器居多謙抑之言聲猷愈隆眷禮增渥迺自將旄之重進兼公衮之華某叨備樞廷阻趨賓館偶缺修於慶牘致先辱於占書感悚交深敷陳曷旣

謝錢駙馬加開府啟

清輝絕俗令德映時毓秀儒林早擅藝文之富揚芬戚畹動遵禮法之嚴

跋

跋僧懷素帖

歐陽文忠公稱魏晉法帖初非用意自然可喜後人以學書爲事業如懷素之徒疲敝精神不以爲苦然六藝未有不學而工者魏晉書體皆有師承以意在筆前爲法文忠不喜學書故詆若此懷素行筆頗類羊欣梁武帝亦以欣終不似真云辛卯重九日題

跋李伯時馬

杜工部稱韓幹馬能窮殊相而畫肉不畫骨獨曹將軍爲盡善予觀二人遺蹟信然伯時筆法蓋得於曹韓士大夫寶之爲神品觀於通真西軒丙戌三月

題道錄黃大中書軸

某自崇寧癸未以中書舍人扈蹕迨今十有四年又間緣祠事詣醴泉者不可勝紀雖屢見淵靜冲和師曾不少款政和丙申七月戊午始得造琴軒清談終日慰懌可量

題遺教經後

汝之後圃有山池水竹之勝此刻在圃之西小亭沿灘澗度危約穿叢葦乃至見此默想舊游如在目前云

題青城瑞石文後

政和五年三月癸巳上御集英殿第多士命近臣侍內出青城山瑞石尖圓黑色大如百斤秤錘有白文在石曰呂公天與之道急急呂公之行凡三十有三字分兩行石脈透徹文及旁見字法比王右軍尤加清逸臣某與觀并賜模本得以寶藏豈不榮幸模本口得十之七八蓋石理溫潤字字精采殆若飛動非模刻所能盡也具位臣姓某謹題

題長生妙訣後

政和六年季秋朔大享明堂祀上帝某以刑部尚書攝初獻同亞獻禮部尚書姚伯受奉俎兵部侍郎宇文仲達前一日致齋於祠所仲達語及養生手錄此書示某戒以非人勿傳云

摘文堂集卷十四

祭文

祭葛朝奉文

某罪逆不孝故春三月扶護東下秋七月與丈人相遇於維揚時
丈人氣貌說澤步趨輕捷瞻視有力飲啖倍常咸謂壽祉方未艾
也拜別不半年凶問奄至嗚呼哀哉尚忍言之耶承靈柩毗陵某
方泣血待盡不敢違几筵前詣喪次謹遣弟某往致薄奠伏維尊
魂特垂鑒察

祭壽光太夫人文

某等罪逆不孝酷禍上延俾我慈親奄棄遐壽夏五月自京師扶
侍神柩循汴東下達於淮泗又東濟於江秋七月至於宜興爰得
吉卜以翼日甲申安厝於邑南篠嶺之原嗚呼痛哉自今以往一
之日二之日永千萬年無復見我慈親號呼擗踊心肝摧裂罪逆
深重蒼天蒼天尚饗

三省祭蔡顯謨母金郡君文

惟靈有婉其德有淑其儀閨門之譽協於聲詩厥初告吉夢維熊
羆是生賢子蔚爲庭芝長持從橐仲飭朝綏清窺雅望寵膺眷知
方隆榮養溫清具宜奄其淪謝何痛如之奠有芳醴薦有明粢尚
其未泯監此忱辭尚饗

墓志

宗室故騏驥使贈博州防禦使追封博平侯墓志銘

惟博平侯叔樂字和甫昭化軍節度使觀察畱後彭城郡公克孚
之子深州團練使承訓之孫廣平郡王德隆之曾孫也母曰南康
郡夫人石氏治平元年賜名授右內率府副率兩遷至右千牛衛
將軍改莊宅副使五遷至右騏驥使勳上柱國爵天水郡開國侯
食邑一千五百戶食實封一百戶歷陳州堰閘西京審務汾揚二
州郡監濱州鈐轄崇寧元年十一月十九日終享年五十有三贈
博州防禦使追封博平侯以大觀元年某月某日葬於汝州梁縣

公恩性純至好學自強居官恪勤所至有譽在濱時方歲饑饉公
以招軍爲請繼修城壁樓櫓俾食其力賴是全活者甚衆娶張氏
封壽安縣君子四人輔之左班殿直翼之右班殿直直之得之皆
三班奉職輔之直之早喪女四人長適左侍禁馮澄次適右班殿
直王楫餘尚幼銘曰氣升清明魄降沈翳升與陽俱孰窺其際降
宅在茲銘於新窆

宗室故贈武康軍節度使觀察畱後封洋川郡公墓志銘

公諱叔澹字靖之保康軍節度使畱後南康侯克凝之子虔州觀
察使南康侯承睦之孫宣德軍節度使同中書門下平章事兼侍
中廣陵郡王德難之曾孫也母安平縣太君張氏慶曆八年賜名
授右內率府副率累遷金吾衛大將軍秀州防禦使改宮苑使遷
皇城使歷泰唐二州兵馬鈐轄崇寧二年三月十五日卒於唐州
享年五十有三贈武康軍節度使觀察畱後追封洋川郡公以大
觀元年某月某日葬汝州梁縣娶宋氏封長安縣君子八人千之

右武衛大將軍簡之理之明之鯉之皆左侍禁昇之左班殿直賚
之右班殿直璵之三班奉職女九人長適三班奉職宋宜孫餘在
室孫十一人翊三班借職竝竦餘未名孫女六人長適三班奉
職潘唐餘尚幼公少嗜學問尤工爲詩章事親盡孝居喪盡禮歲
時薦享盡誠治家嚴肅居官廉謹以故姻族莫不賢之銘曰進德
不忘以克有終蔚蔚愍冊洋川之公納銘幽竈永詔無窮

宗室故左侍禁墓志銘

宗室叔恣字傳道廣陵郡王德雍之曾孫虔州觀察使南康侯承
睦之孫保平軍節度使成國公克戒之子母曰同谷夫人李氏所
生母王氏初授右班殿直累遷左侍禁歷監蔡州褒信酒務監在
京倉耀州兵馬監押性剛正喜立事功居官爲當路稱薦崇寧二
年五月三日卒享年三十有六以大觀元年三月二十九日葬汝
州梁縣子三人誨之誼之誦之銘曰窾土爲宮旣寧旣密刻石同
藏始終尚吉

宗室故懷州防禦使河內侯墓志銘

公諱徽之字天和武信軍節度使循國公承慶之曾孫開府儀同
三司建國公克繼之孫開府儀同三司榮國公叔敖之子初授太
子左清道率府副率累遷右監門衛大將軍崇寧二年下闕

宗室右金吾衛大將軍河州防禦使贈保慶軍節度觀察畱後追封

房陵郡公墓志銘

公諱叔尊字應之鎮寧軍節度使濟國公克彰之子相州觀察使
承矩之孫潁川郡王德彝之曾孫也母曰永嘉郡君楊氏嘉祐四
年授太子右內率府副率累遷至右金吾將軍河州防禦使崇寧
二年二月十八日終享年四十有九贈保康軍節度使觀察畱後

追封房陵郡公大觀元年三月二十九日葬汝州梁縣娶潘氏封永唐縣君先公卒子五人祚之故右侍禁襲之左班殿直襄之右班殿直二不及名卒女三人長適左班殿直徐肩餘卒孫五人公明公忠公哲二尚幼公仁厚端謹事親以孝聞善與人交久益親趨平居耽玩經籍口不挂臧否晚得釋氏書說之頗謂有得宗正狀公行實如此銘曰稟質之粹蹈慈祥兮操行之潔好端莊兮學務該綜士自強兮晚誦內典悟津梁兮有賢如公令譽彰兮刻銘幽石永有光兮

宗室故西頭供奉官墓志銘

宗室叔璫字君玉華州觀察使華陰侯克告之子鎮寧軍節度使同中書門下平章事陳國榮禧公承錫之孫頴川安簡王德彝之曾孫也母曰安定縣君杜氏六歲賜名授右班殿直累遷西頭供奉官歷監相州廣濟軍庫權貨務門最後監真定府市易務不赴崇寧二年十二月二十九日卒享年三十有四以大觀元年二月

二十九日葬汝州梁縣娶張氏子三人相之樞之皆業進士某幼未及名卒女五人在室者三人餘早卒君事親以孝蒞官以勤與人交以信壽雖不延位雖不顯其嚮善有足嘉者銘曰質幹之良尚多後祉壽弗克延命也天只

宗室故左班殿直石志

左班殿直叔珪紹聖二年正月十九日生崇寧二年六月八日卒享年九歲大觀元年三月二十九日葬汝州梁縣曾祖德彝故頴川郡王祖承錫故鎮寧軍節度使同中書門下平章事陳國公父克家見任右千牛衛將軍謹志

宗室故右武衛大將軍真州刺史開國公贈密州觀察使追封高密侯墓志銘

公諱叔鄭字季武右領軍衛將軍克省之子武省軍節度使觀察雷後遂寧郡公承衍之孫頴川郡王德彝之曾孫也母曰長壽縣太君王氏治平二年賜名授右內率府副率累遷右武衛大將軍

眞州刺史勳上柱國爵開國公食邑一千六百戶實封五百戶崇
寧三年三月十五日卒享年四十有一贈密州觀察使追封高密
侯大觀元年三月二十九日葬汝州梁縣娶郭氏封永寧縣君公
性孝友善與人交中外姻戚罔不歡睦國有大禮擇宗室執事公
多與焉銘曰德之吉矣受祉維寧天胡嗇之弗永齡刻此幽石揚
芳馨

宗室故右金吾衛大將軍雄州防禦使贈安化軍節度觀察畱後
追封高密郡公墓志銘

公諱叔納字才元曾祖德雍廣陵郡康簡王祖承睦虔州管内觀
察使南康侯父克彙安化軍節度使昌國公皇祐六年賜名授右
內率府副率累遷右武衛大將軍階州刺史改康州團練使進右
金吾衛大將軍雄州防禦使公莊重沈默無聲色嗜好獨喜誦書
尤有得於老莊之言居昌國公喪哀毀盡禮嗣濮王宗晟往弔之
曰若公家父子孝義復何用宗官乎奉朝請三十年未嘗有過崇

寧三年八月三日卒享年五十有二贈安化軍節度使觀察畱後
追封高密郡公以大觀元年三月二十九日葬汝州梁縣娶彭氏
封宣城縣君子二人堅之左侍禁早卒璵之三班奉職女二人長
適右侍禁梁姓次適右侍禁馬慶嗣女一人尚幼銘曰儀儀高密
慎終如初聲色在前委而勿趨開卷有得資以自娛吁其賢矣視
此銘書

宗室故金吾衛大將軍淄州防禦使贈安化軍節度觀察畱後追
封高密郡公墓志銘

公諱叔峙字德澹鎮寧軍節度使濟國公克彰之子相州觀察使
承榘之孫潁川郡王德彝之曾孫也母曰永嘉郡君楊氏公幼莊
重七歲誦書日至數百言長益邃於學事親孝永嘉夫人有疾公
剖股進之遂愈居喪水不入口者三日終制疏素性多巧思自奕
射聲律咸精其能累官至右金吾衛大將軍淄州防禦使勳上柱
國爵開國公食邑三千七百戶食實封七百戶崇寧三年六月十

日卒享年四十有七以大觀元年三月十九日葬汝州梁縣子九人延之左班殿直進之右侍禁縱之承儀郎在之三班奉職緝之靖之竦之竝之翊之皆未仕而縱之中進士第進之在之緝之皆薦于有司女四人長適內殿承制閣門祇候張蓋次適故右班殿直閣門祇候兼尚書局奉御鄭純次在室次早卒孫十有一人公恂公望公佐公防公似公仁公倚公才餘早卒孫女四人銘曰宜泰而莊宜佚而勵操行之純問學之邃以振厥聲以綏厥位刻詞方砥以質幽窆

宗室涇州觀察使第十七子志

歸之元祐七年正月五日生崇寧四年四月二十五日卒享年十四大觀元年三月二十九日葬汝州梁縣曾祖承亮故樂平郡王祖克冲故驍騎大將軍父叔皮見任涇州觀察使謹志

宗室故西頭供奉官墓志銘

宗室昇之字君儀涇州觀察使叔皮之子右驍衛大將軍克冲之

孫成德軍節度使同中書門下平章事追封樂平郡王承亮之曾孫也初授三班奉職書遷西頭供奉官歷潁昌府商稅務在京麥界牧養馬監後授潁川界溝鎮不赴君七歲能誦書見爲敏悟既長益嗜學問所著歌詩雜文甚多居官勤恪數爲當路稱薦又以勞列被賞崇寧四年九月二十四日卒享年三十有四以大觀元年三月二十九日葬汝州梁縣娶張氏子二人公輔嘗薦於有司公輅尚幼女六人長適張天祐餘在室銘曰諏日旣吉卜宅旣寧發揮行實尚監茲銘

宗室故左班殿直石志

左班殿直叔官元祐元年四月二十六日生崇寧四年閏二月二十八日卒享年二十大觀元年三月二十九日葬汝州梁縣曾祖德彝故潁川郡王祖承襲鎮寧軍節度使同中書門下平章事陳國公父克家見任右千牛衛將軍謹志

宗室故右武衛大將軍文州刺史贈同州觀察使追封馮翊侯墓

志銘

馮翊侯爵之字子厚保康軍節度使房國公叔武之子光州團練使克虔之孫青州觀察使樂安侯承遵之曾孫也母曰長安郡君劉氏初授右內率府副率累遷右武衛大將軍文州刺史崇寧四年五月八日卒享年四十有五贈同州觀察使追封馮翊侯娶某氏封永安縣君先公卒子四人公謹三班奉職早卒公倬公侏皆右班殿直公佑三班奉職女三人一卒餘尚幼公事親盡孝待人盡禮而奉己甚約獨喜誦五經諸子之言以大觀元年三月十九日葬汝州梁縣銘曰祿位之寵有暱有華德雖稱之壽弗遐安此吉宅宜其家

宗室故右金吾衛大將軍鳳州防禦使贈安化軍節度觀察畱後追封高密郡公墓志銘

公諱叔耘字勤之宣德軍節度使兼侍中廣陵康簡郡王德雍之曾孫太尉樂平恭靜王承亮之孫定州觀察使博陵侯克暨之子

也母曰壽安縣君王氏所生母曰永福縣太君宋氏嘉祐三年賜名授太子右內率府副率累遷右金吾衛大將軍鳳州防禦使勳上柱國爵天水郡開國公食邑四千五百戶食實封一千戶崇寧五年九月十五日終享年四十有九贈安化軍節度觀察畱後追封高密郡公娶李氏封永康縣君子節之左侍禁理之左班殿監資之右班殿直握之三班奉職恭之翼之和之立之孫公巽公懋公事親孝祖母篤疾齋戒然肌以禱於神幼失所生母歲時愴感揮涕終日天資純厚言不及臧否喜誦道書晨昏不懈大觀元年三月二十九日葬汝州梁縣銘曰事親惟孝守身惟誠本既立矣如木之榮歿而不朽尚監茲銘

宗室故濮州團練使贈潤州觀察使追封丹陽侯墓志銘

丹陽侯叔前字伯先中正軍節度使同中書門下平章事江國公之曾孫青州觀察使樂安侯承遵之孫蔡州觀察使汝南侯克觀之子母曰廣平縣君宋氏公幼喜誦書長益敏於學文詞筆札衆

所歎譽事父母孝汝南侯有病公刲股進之遂愈人以爲誠孝所感崇寧四年三月二十四日卒享年五十有二公初授太子右內率府副率累官至濮州團練使贈潤州觀察使追封丹陽侯以大觀元年三月二十九日葬汝州梁縣娶張氏封和順縣君先公卒子八人孝之左侍禁成之右侍禁禮之匱之皆左班殿直祐之三班奉職尚之漢之餘未名女二十有二人右侍禁曹緩左班殿直黃琬三班借職徐演三班奉職曹澹左班殿直夏儒其壻也一適三班奉職郭才卿先卒餘在室孫公愈公愈公愨公恣餘未名孫女九人銘曰敏學問善文辭事親誠孝身可刲祿豐位顯惟其宜享年勿遐人所悲耀茲潛德有銘詞

宗室故右班殿直墓志銘

宗室翊之字望敬曾祖承亮成德軍節度使同中書門下平章事樂平郡王祖克冲左驍衛大將軍父叔峩右武衛大將軍濱州團練使元祐二年補三班奉職改右班殿直崇寧四年十一月二十

五日卒享年二十有八以大觀元年三月二十九日葬汝州梁縣君幼不喜弄長益孝謹好學問屢試於有司兩娶皆石氏子一人公侃銘曰遵彼汝濱卜窆云吉世次行能考茲芳石

宗室故贈密州觀察使追封高密侯墓志銘

公諱矢之字伯直右金吾衛大將軍汝州防禦使叔縱之子左驍衛大將軍克冲之孫成德軍節度使同中書門下平章事樂平郡王承亮之曾孫也初賜名授右內率府副率累遷右武衛大將軍渝州刺史崇寧四年五月十九日卒享年四十有三贈密州觀察使追封高密侯娶陳氏封永寧縣君先公卒子八人公澤左班殿直公濟右班殿直公潤公漑公泳公淨公湜女二人長適右侍禁楊京次在室孫四人公莊重寡言喜誦書能爲文辭其事親以孝大觀元年三月二十九日葬汝州梁縣銘曰爵祿之盛旣克保之贈禔之優亦克稱之行實可考銘以昭之

宗室故左班殿直墓志銘

宗室叔澧字德源莫州防禦使克施之子河東郡王承衍之孫武昌節度使同中書門下平章事德存之曾孫也母曰壽昌縣君王氏元祐元年賜名補右班殿直改左班殿直崇寧四年授滑州倉草場未赴五年二月二十一日卒享年二十有五娶夏氏繼室郭氏君性敏悟八歲能誦書得升中學長益親翰墨嘗獻崇寧聖德頌其趨尚爲士大夫所稱處家孝友不喜聲色以大觀元年三月二十九日葬汝州梁縣銘曰如蘭之馨方茁其芽忽云悴矣姻族之嗟

宗室故左班殿直石志

左班殿直叔篆元祐二年正月十六日生崇寧五年三月十四日卒享年二十大觀元年三月二十九日葬汝州梁縣曾祖德彝故潁川郡王祖承錫故鎮寧軍節度使同中書門下平章事陳國公父克稟故襄州觀察使襄陽侯謹志
宗室故前右千牛衛將軍墓志銘

宗室田之字耕道深州團練使承訓之曾孫昭化軍節度使馮翊侯克孚之孫安化軍節度使觀察畱後高密郡公叔建之第四子也母曰永安縣君晁氏熙寧二年賜名授太子右內率府副率累官至右千牛衛將軍勳上護國爵開國公崇寧三年坐法廢五年四月十六日卒享年四十有二以大觀元年三月二十九日葬汝州梁縣娶鄭氏封仙源縣君先君一年卒子公式三班奉職三女在室銘曰名秩之寵自其幼時終以無祿嗚呼可悲

宗室丹州防禦使第五子石志

殤子安之元符元年八月二十四日生崇寧五年六月十四日卒年九歲大觀元年三月二十九日葬汝州梁縣曾祖承操故涇州觀察使安定侯祖克勳成德軍節度觀察畱後常山郡公父叔履見任右金吾衛大將軍丹州防禦使謹志

宗室故右監門衛大將軍贈懷州防禦使追封河內侯墓志銘
河內侯諱叔侑字子儀同州觀察使馮翊侯克貺之子寧國軍節

度使原國公承炳之孫宣德軍節度使同中書門下平章事兼侍
中樂平郡王德雍之曾孫也母曰北海縣君王氏熙寧元年賜名
授太子右內率府副率累遷右監門衛大將軍勳上柱國爵開國
公崇寧五年六月一日卒子五人裕之縑之皆三班奉職祚之早
卒餘未名女六人適右班殿直杜彥侯進士郭侏曾允誠一在室
餘早卒公性純孝母疾革刺肌血以禱於神未幾康健幼喪其母
言及必涕泗交下姻族稱之大觀元年三月二十九日葬汝州梁
縣銘曰至矣孝德一言而該公之事親終身之哀刻茲芳石以播
清埃

宗室故左班殿直墓志銘

宗室叔惠字彥直五歲賜名授左班殿直崇寧五年三月二十四
日卒享年二十有二以大觀元年三月二十九日葬汝州梁縣曾
祖德彝潁川郡王祖承錫鎮寧軍節度使同中書門下平章事陳
國公父克躡右千牛衛將軍母曰永春縣君夏氏總角誦書日至

數百言稍長益勤講席上初建宗子學考選之法悉視成均君爲
多訓齋諭以稱職被恩云娶曹氏銘曰質孰賦之壽孰嗇之終以
無子吁其可悲

宗室故贈泉州觀察使追封清源侯墓志銘

公諱叔紺字子春忠正軍節度使開府儀同三司秦國公克愉子
樂平郡王承亮之孫廣陵郡王德雍之曾孫也母曰平陽郡太夫
人于氏所生母曰太寧郡太君郭氏五歲賜名授太子右內率府
副率累遷右武衛大將軍興州團練使勳上柱國爵開國公實封
八百戶崇寧五年正月二十七日卒享年五十有四贈永泉觀察
使追封清源侯娶白氏封壽光縣君先公二十年卒子十一人益
之西頭供奉官和之右侍禁進之左班殿直信之三三班奉職德之
舉進士岳之教之勝之高之感之餘未名女六人長適三班奉職
郭滌次適曹激二在室餘早卒公事親孝居喪以毀聞天資剛正
守禮不越治家訓子肅如也以大觀元年三月二十九日葬汝州

梁縣銘曰孝以事其親禮以視其身守貴若茲直惟善人哀榮終始泐於幽珉

宗室東頭供奉官夫人王氏墓志銘

宗室東頭供奉官叔腆之夫人王氏曾祖潛定武軍節度觀察留後祖中庸左衛上將軍父承昭皇城副使母曰長安縣君李氏夫人性柔慧事父母孝既嫁上承下撫無不得其懽心崇寧三年九月五日卒享年三十有一大觀元年三月二十九日葬汝州梁縣子七人元之遠之未仕達之遷之迪之述之通之皆卒女七人長適進士胡琳三班奉職李伯總餘尚幼銘曰慈祥柔順婦德維嘉宜壽而天命耶非耶

故仁和縣君王氏墓志銘

宗室右金吾衛大將軍秀州防禦使惠之夫人王氏世開封人曾祖審琦贈中書令追封秦王祖承佑贈左武衛大將軍父世彥朝散郎夫人在家以孝聞既嫁事姑如事其親防禦君少有譽于宮

邸夫人能相以恭順撫諸子均一人不知嫡庶之異崇寧四年四月二十一日卒享年五十有九子十人詠之右內率府副率進之益之皆左侍禁說之餘未及仕者六人皆早卒女九人左班殿直武立西頭供奉官王琪左班殿直衛元之三班奉職李棠佐左侍禁羅遠左殿直白粹中右班殿直王公倬其壻也餘早卒孫男九人公泰三班借職餘未仕孫女三人夫人之歿術者以陰陽拘忌爲言再浹日乃殮方暑肌色如生人以爲積善之報云大觀元年三月二十九日葬汝州梁縣銘曰善必有報天理之常乃如夫人終以吉祥云誰不信監此銘章

宗室左侍禁夫人龔氏墓志銘

左侍禁訢之夫人龔氏幼聰慧既嫁能相其夫以義疾雖革亦以忠孝爲言崇寧五年正月一日卒於處州之官舍享年二十有七以大觀元年三月二十九日葬汝州梁縣女二人尚幼夫人蓋金紫光祿大夫世昌之曾孫左藏庫副使意之孫西頭供奉官咸之

女也銘曰歲時協吉宅兆允臧吁其葬矣刻志同藏

故德安縣君彭氏墓志銘

宗室濮州防禦使叔干之夫人彭氏左藏庫使崇正之女左千牛衛將軍再問之孫武昌軍節度使贈中書令睿之曾孫年二十一歸防禦封德安縣君夫人治家訓子有法奉己雖約至賙人之急弗吝焉歲時薦享如見所祭喜誦釋氏書朝夕靡懈崇寧二年二月二十日終享年五十有八以大觀元年三月二十九日葬汝州梁縣子十人勳之右武衛大將軍達州刺史贈滄州觀察使景城侯劼之前右侍禁助之左班殿直欣之勣之皆右班殿直餘早卒女已嫁者二人壻內殿崇班許彭年右班殿直任仲述三人尚幼八人早卒孫十有一人公侃右班殿直公偉公佐公僅公義公順一未名餘早卒孫女十人曾孫二人銘曰生宜厥家歿安此室刻志同藏惟德之述

華陰侯妻杜氏墓志銘

宗室故贈華州觀察使追封華陰侯克告之夫人杜氏世家鎮陽自昭憲皇后貴始爲開封人曾祖審進靜江軍節度使贈太師中書令兼尚書令追封京兆郡王祖彥彬禮賓副使父贊仁閣下通事舍人贈左屯衛大將軍夫人幼端莊不喜嬉戲年十七歸華陰侯事舅姑以孝率媵妾以正訓子孫以義自奉清約頗通內典持五戒行終身不廢崇寧元年十二月二十三日卒年六十有六封安定縣君子十有一人叔陶贈建州觀察使追封建安侯叔瑚故率府率叔靄內殿崇班叔肇故左侍禁叔璫故西頭供奉官叔□叔鍵皆西頭供奉官叔躬左侍禁叔庶左班殿直餘不及名卒女十有二人長七人早卒次故金華縣君適右侍禁呂哲次長壽縣君適左侍禁李侑次永壽縣君適前右班殿直馬宇次適左班殿直杜琬次適右班殿直王宗文孫三十有四人保之伋之皆左侍禁傳之故三班奉職修之靖之相之誼之訓之傑之价之樞之禮之說之澤之潤之俊之皆習進士而靖之相之端之肄業宮

學以行誼稱愈之翊之口之樽之早卒餘不及名孫女二十有六
人長故適右侍禁段希顏次適右侍禁華鎮次適通仕郎周士堯
次適將仕郎宋亶次適三班借職郭授次適進士劉公輔次適三
班借職鄭公案次適三班奉職高公柔次適三班借職王公總在
室者十有二人餘早卒以大觀元年三月二十九日葬夫人於汝
州梁縣銘曰宜佚宜豐不怠不侈宗婦若茲允也賢只說說子孫
報施在此

故和義郡君胡氏墓志銘

夫人姓胡氏開封人衛尉少師令儀之曾孫耀州三原縣主簿規
之孫渭州軍事判官潛之女也治平元年歸於宗室成州防禦使
叔象初封金華縣君進和義郡君崇寧二年四月三日卒享年五
十有五子三人但之右侍禁次昇之景之女適右班殿直王仲端
其三早卒夫人事舅姑以孝相夫以義訓子以學撫媵妾以慈晚
喜釋氏書持誦不懈以大觀元年某月某日葬汝州梁縣銘曰維

歲丁亥日吉辰良卜茲新竊萬歲之藏

故仙源縣君鄭氏墓志銘

宗室前千牛衛將軍田之夫人鄭氏贈太師開府儀同三司兼尚
書令守忠之曾孫左驍衛上將軍惟懿之孫左藏庫使价之女也
母曰華源郡君趙氏夫人幼聰慧事父母盡孝既嫁事舅姑盡禮
喜誦書能爲詩章崇寧三年九月一日卒享年三十有五以大觀
元年三月二十九日葬汝州梁縣子公式三班奉職女在室銘曰
歲月惟吉宅兆惟寧歸從其夫考德有銘

宗室右侍禁夫人李氏墓志銘

宗室右侍禁叔旄之夫人姓李氏世開封人曾祖昭德昭亮軍節
度使贈太師尚書令兼中書令追封崇國公祖惟賢榮州團練使
贈右金吾衛上將軍父宗述供備庫副使夫人幼敏慧年二十歸
於叔旄性謹約不喜華侈崇寧三年七月十四日卒享年二十有
八以大觀元年三月二十九日葬汝州梁縣子一人未名卒女二

人尚幼銘曰有粹其質有淑其聲考茲幽石歿有餘榮
趙叔慈妻賈氏墓志銘

縣君宗室故懷州防禦使河內侯叔慈之夫人賈氏世開封人曾
祖常左羽林衛將軍祖德滋右金吾衛將軍父世奕右屯衛大將
軍夫人性端靜平居寡言笑治家有法宗姻稱之封永壽縣君崇
寧四年十月二十四日卒享年五十大觀元年三月二十九日葬
汝州梁縣子二人得之待之皆左班殿直早卒孫女二人長適進
士郝俵次在室銘曰猗嗟夫人柔德靜專宜壽宜貴誰其嗇遷視
銘考德宗婦之賢

宗室東頭供奉官夫人方氏墓志銘

宗室東頭供奉官叔驍之配方氏世開封人曾祖景贈左金吾衛
將軍祖琬右班殿直父佃夫人性柔淑在家勤女工既嫁事舅姑
盡禮順承其夫睦若賓友善誦佛經能行其所戒崇寧二年十一
月三日卒享年三十有五以大觀元年三月二十九日葬汝州梁

縣子四人貫之翼之拱之充之女五人銘曰歸儷其淑既相諧熙
曷不偕老吁其可悲

宗室東頭供奉官夫人張氏墓志銘

夫人張氏蓋文定公齊賢之後曾祖宗禮工部尚書祖子奕中散
大夫父仲昌內殿承制年十九歸於宗室東頭供奉官叔寄上承
下撫無不得宜疾革謂其夫曰無以傷情理其送終從儉嗚呼可
哀也已崇寧二年八月二日卒享年二十有八以大觀元年三月
二十九日葬汝州梁縣子三人女二人皆幼銘曰泠泠緒言不愆
於理刻諸幽珉襲芬圖史

宗室內殿崇班第三女石志

殤女元符元年十月十九日生崇寧三年九月十二日卒享年七
歲大觀元年三月二十九日葬汝州梁縣曾祖承操故涇州觀察
使崇安侯祖克勅故建寧軍節度使開府儀同三司建國公父叔
蓬見任內殿崇班謹志

宗室舒州防禦使第四女石志

殤女崇寧三年九月十日生明年四月二十八日卒大觀元年三月二十九日葬汝州梁縣曾祖承睦故虔州觀察使南康侯祖克戒故保平軍節度使成國公父叔陟見任舒州防禦使謹志

宗室西頭供奉官第四女石志

殤女崇寧元年三月二十七日生三年正月二十三日卒大觀元年三月二十九日葬汝州梁縣曾祖承操故涇州觀察使安定侯祖克勅故建寧軍節度使開府儀同三司建國公父叔蹊見任西頭供奉官謹志

摘文堂集卷十四

摘文堂集卷十五

墓志

朝奉大夫致仕驍騎尉賜緋魚袋石公墓志銘

越之新昌石氏考諸譜錄蓋萬石君之後也石氏初徙新昌煥然一身而子孫蕃衍自咸平以來繼以文辭行誼起家於今官學愈盛歲時歸謁章綬相耀宗屬數十百人絃誦洋洋貢於鄉選於學射策於庭曾靡虛籍以故爲東南望族公諱景衡字叔平新昌人也曾祖渥隱居不仕祖仕舉祕書丞累贈朝散大夫父衍之大理寺丞累贈中大夫公幼有俊譽長益邃於學儀狀端穆進趨翼如也神宗皇帝初以經術造士公試太學數中優等嘗詣丞相王文公特見器重謂中大夫曰石氏名家信不乏人中熙寧六年進士第調台州天台尉海濱多剽攘民以爲病公設方略以制之亡敢竊發方歲大饑流寓屬於境賴公振卹以全者不可勝計移和州烏江令公材力精健奮勵自強察蠹弊根穴必去之吏雖猾亡以

爲也士族有倚勢凌民旣奪之旣以構訟有司觀望不決使者諉公公不爲勢撓歸產於民兩造成服時詔諸路議免役法公於淮西多所裁定入見改宣德郎知福州長溪縣長溪廣袤千里民事劇甚令率以罪去公至若無足治者部使者以積欠繩下輸限峻迫追究煩擾公詣郡白狀請俟中覆乃行使者聞之怒將中公以法會察訪使至以閤欠不當治他縣悉被劾使者始媿謝境有強寇公親捕獲之賞中優格公曰爲民除害吏職也殺人以幸遷予誠何心哉卒平反之寇以減死論公之所存蓋如此居官五年民繪像以祠之當路交章以治最聞衆冀拔擢公曰吾母老矣豈貪仕進時必求所以便親養者遂監楚州糧料院公雖處閒局而郡有疑難事輒藉公參決他郡守下吏獄久不具本路以詣旨選公覆按公原情定罪得輕重之中被訊者自以不冤也秋滿丁外艱服除通判秀州未幾轉運司表充管勾文字此官久廢文牘猥積公爲條目區別之十路財賦出納迺至牒訴纖悉如視諸掌使者

不勞以治就遷通判常州丁內艱不赴服除通判歙州下車奠謁廟學顧牆宇庠陋慨然以身董役闢而新之識者謂公爲政知所先矣嘗攝郡事獄有淹繫百餘過暑多斃公旣閱實歎曰論罪皆當笞耳何至是耶立辨出之頃之以疾得謝杜門里居一室蕭然宴坐終日見者咸悚伏焉公晚聞內典益進此道視窮達生死不以置欣戚畏慕於心故於進也恬於退也勇縣歷三紀位不過佐郡而年未六十遽乞身以歸自屬疾卻醫不問預治斂具爲書戒諸子一夕命盥沐旣畢而逝實崇寧三年九月九日享年五十有八以四年九月庚申葬於新昌蘭峴山之原公官至朝奉大夫勳至驍騎尉以元符元年郊恩賜五品服娶虞氏故集賢校理諸王府侍講太熙之女封永安縣君子二人公弼以蔭補太廟齋郎公望舉進士女二人長適承務郎簽書池州判官章壽卿次適進士張垂有文十卷詩二十卷曰南明集公葬之明年予初免喪未親筆硯而公弼來速銘予弟叔畸公之從女夫也數夢公具衣冠請

命於予語極諄切予聞愴然爲敘而銘之嗚呼公雖亡有不亡者存若公孝於親友於兄弟施於有政蓋所謂躬行君子者公弼公望爽邁不羣人知公之有後以爲積善之報云銘曰顯矣石氏初自衛卿衛卿維磻國之純臣駘仲繼出時亦衛族得嗣以龜喪不佩玉族遠而徙散處四方奢奮苞鑿聲烈相望新昌之別實維近世譜系縣延萬石之裔儀儀大夫色莊以溫孝悌忠信有學有文施於爲政恭寬敏惠談笑指麾民嬉吏畏飛不盡翰孰使之然秩祿豈多謝不待年曰維小臣匪私于佚負薪之憂義辭以疾疾不訊醫亡不怛化迺如之人奚往不暇維慶之詒既克有子天之報施故將在此

朝奉郎致仕武騎尉賜緋魚袋葛公墓志銘

崇寧三年十有一月己亥朝奉郎致仕賜緋魚袋葛公終於京師諸孤護喪歸常之江陰將以五年十月某甲子葬於青陽鄉郭望之原卜既吉迺敘公世次行治泣來請銘某公之子壻也知公本

末該盡宜無愧於辭謹拜手泣爲之序曰葛之先嬴姓夏后分封以國爲氏唐天祐中公之六世祖濤自廣陵南徙始有籍於江陰濤再世生詳詳生惟甫累贈吏部尚書尚書生密中慶曆進士第有高行卒官承議郎累贈朝請大夫爲公之皇考大夫娶胡氏贈建德縣太君繼室陳氏懷仁縣太君公胡出也諱書思字進叔學識恩性在孺有聞既長博考羣經旁搜百家之說世父兵部尚書宮語大夫曰是子名第不足言後將以文義顯嘉祐中試開封府王文公爲考官得公事道論稱之再試爲陳公襄所知擢第三一時羣進士歆慕誦公之文自以得所矜式諸公要人交口贊譽聲問籍籍傳四方中熙寧六年進士調睦州建德縣主簿時大夫旣得謝里居公不忍違去投劾侍養十有餘年晨暮在側意有所鄉輒逆得之夜暴雨亟起問安退不敢寐凡食飲藥劑迺至服用纖悉必躬省之大臣有嘉公志節者表學官弗就居久之大夫勉公仕且樂從之始以吉州司戶參軍監湖州新市務公喜祿釜逮親

理色自得不知關市之卑期年大夫卒孺慕以泣哀動行路尋得臂疾或告有疾食肉五十不致毀禮也宜稍進肴味弗聽終制如始喪者服闋累年迺調開封府封邱縣主簿移知州防禦推官知楚州連山縣丞公悃愾無華事必遠慮不以便文自幸歷佐兩邑令荷以治歲菑按田蠲貸以實無所顧望數令他邑及決旁郡滯訟皆以能稱淮南議穿支家渠沮洳相半計司諉公公條上便宜與所當經畫者渠成人以公爲有賜也入見改宣德郎故事當任親民公委資考求閒局里中遂監常州酒務遷奉議郎上卽位遷承議郎加武騎尉賜五品服差知婺州永康縣不赴改監秀州鹽稅務課羨中賞格匿不自列會序遷朝奉郎歎曰吾在事之日淺褒贈及親賞延於子君恩厚矣尚何求遂致仕公守量與廣恥自表襮仕不遇合回旋筦庫晏如也所至以安遇名軒自號虛遊子居官無秋毫墨染其所用舉者常沛然溢格性謙畏惟恐忤物至持法守正雖大吏欲干以私辭氣不奪馭下寡譴罰冀以至誠格

物然人自不能欺也公田歲入輒推予民在家無聲色玩好齋莊慎獨不愧屋漏遇人無疏戚惟謹尺牘必楷片言必信卹孤振乏怒如己私大夫沒追慕白首不替常以所告戒者自警語及之必嗚咽流涕新未薦不敢嘗歲時怵惕如見所祭昆弟若從子孫內外千指公處尊卑間友愛純篤無不順適諸妹擇命士之賢者歸之問撫饋餉戀戀靡懈善教子言諭而身率之以故諸子秀拔有立俱爲清議所重而次勝仲遂爲同年進士鄉閭歸美焉自居大夫喪日課內典默契於心晚益喜持誦旣屬疾神檢不亂時勝仲以太學官迎養能致國醫公不問顧告以死生常理遺書戒毋侈葬疾七日而逝享年七十三娶侍其氏右正議大夫泳之女克有閨範是儷是相先公十四年卒贈北海縣君子次仲通仕郎吉州州學教授儀仲早卒和仲將仕郎勝仲試太學正長女適某次適侍其鏐次適張滢孫男九人立隆立方立悌立中立立大立師立器立象立授孫女五人有文十卷號安遇集覽者以是服公之所養

也銘曰葆醇履坦晬然慈良有如葛公南方之強公初筮仕舒華
焯煌友生愕眙疇敢比望事違願始以退爲常王韞亦潤蘭幽自
芳循陔之感白首不忘奉盈之戒燕居益莊維此卓行千古有光
行成名立位卑奚傷晚通朝著寵有身章引年歸老旣壽而康儀
儀子性命服在傍天之報施於焉孔彰謂公云歿不朽者長納銘
幽竈萬世之藏

孫氏墓志銘

奉議郎知貴州軍州事贈朝請郎邵公潛之夫人孫氏父曰秉陽
蓋常州宜與人夫人恩性純至幼讀書至父母之年以喜以懼輒
俛首揮涕或問之對曰言中吾心是以感而泣也親有疾夙夜侍
左右寢食俱廢居喪水不濡脣者累日歲時致享泣薦所嗜旣歸
邵氏舅姑猶在長幼千指夫人上承下拊罔不歎踴臨財辭豐取
薄不爲苟得姻戚有患難衆所畏忌弗顧夫人必往振急振匱若
己有之善教子幼課以讀書長誨以行己自熙寧以經述造士夫

人之四子相繼擢進士第長曰材薦開封第一爲元豐御史歷銓
部學省出長大邦入位少列崇寧四年上追懷之贈典優異次曰
棣試有司亦中選首曰棣曰搏皆有聲於太學而搏廷試高等鄉
閨言教子者以邵氏爲能夫人自中年不事脂澤與朝請公同受
籙於龍虎山道服誦經事觀音像甚勤嘗苦臂疾夢白衣女人按
穴刺之出白氣丈餘翌日遂瘳將終神鑒不亂召諸孫至前遺以
匱中物從容飲歎而逝時居襄之官舍實崇寧五年十月二十五
日享年七十有六以大觀二年十二月二十有七日祔於邑西大
蘆山朝請公之墓夫人初封仁壽縣君改封壽昌又改仁壽縣太
君材官至朝奉大夫贈右諫議大夫棣承議郎魏王宮大小學教
授挺瀛州防禦推官知河南府潁陽縣事搏從事郎襄州錄事參
軍一女適登仕郎桂州荔浦縣令曾繹材棣及女皆先夫人卒
孫十有四人曰勳曰然曰熊曰燾曰蘆曰譙曰黠曰羔曰緯曰緝
曰紳曰緝曰絳曰緝勳熊皆將仕郎餘未仕孫女七人曾孫六人

曾孫女四人銘曰君山之下兮荆溪之濱山秀溪深兮卜耐惟靈
體魄雖瘞兮魂氣則升降祉於家兮蘭玉在庭疏封未艾兮歿有
餘榮謂予不信兮來監茲銘

陳君墓志銘

君諱思齊字景賢饒之鄱陽人曾祖某祖某皆不仕父某三班奉
職君幼聰警誦書一再過不忘三班君異之既長以家難廢學慨
然投筆歎曰藝文致身夫豈不願晦迹方劑亦仁術也乃以醫技
翱翔江湖間說常之宜興山水清麗遂家焉君診治按古雖疾沈
痼他醫弗能治至君指日決愈遇求療者心惴惴焉如己苦之有
貧不自給復振以薪菽賴是全活者甚眾宜興士族從君遊者罔
不奉爲模範性喜酒選勝引滿笑談自得見者欲傾家釀也自以
學不遂力教諸子夜坐燭下身率之不三鼓不寢聞四方賢君子
俾從之學故阜成少有士譽未壯中第邑人善教子者以君爲能
元祐八年八月辛酉終享年六十有二以紹聖元年十有二月某

日葬邑西某之原娶高氏生四子曰存曰阜成授廬州舒城縣尉
曰敏成曰彥成皆應進士舉一女適唐原本孫男三人季長季升
季友孫女四人阜成予友也泣以銘請義不可辭銘曰善必有慶
孰云嗇之命邪非邪我儀圖之弗贏於躬必昌厥嗣丹桂一枝本
根有自惟影惟響報施如之誰疑弗信監此銘詞

單君墓志銘

君諱照字擇之婺州金華縣人喜誦習衆謂明悟凡陰陽卜筮方
術之學無所不曉事寡嫂如事母至老不懈家貧無兼日之儲有
子皆使就學紹聖初知微貢於鄉爲第一中進士科崇寧三年擢
温州州學教授鄉里教子者以君爲能四年某月某日以疾終於
溫之官舍享年五十有九以大觀元年十月某日葬於邑東某原
娶某氏子四人知微通仕郎知彰知柔知剛皆舉進士女適姓某
孫四人曾祖某祖某父某知柔有賢行予女弟歸焉將葬請予爲
銘義不可辭銘曰性純謹行純良善積在躬宜吉祥受祉未豐今

也七天之報施皆難量說說子孫來者長有如何不信考銘章
單季隱墓志銘

君諱鏐字季隱其先金陵人曾祖誼初有籍於常之宜興祖熙考
應俱以德善稱其交游多名卿賢士君少有志操從胡翼之先生
肄業頗見推重長益邃於學著詩易春秋義解博覽諸家之說斷
以胸臆它經及子史皆手自鈔纂篇帙盈皮筆札細楷幾若摹印
其爲文務辭達事舉不喜浮靡論議袞袞可聽尤能言吳中水利
以爲荆溪當宣歙廣德下流東注震澤而震澤自吳江入於海今
江堤連互水勢壅閼古人濬治遺跡堙塞殆盡誠能通海浦溝港
以道吳江增江隄橋梁以決震澤又復故百瀆以疏荆溪則積水
皆下譬如人身去鯁於咽口腹通矣有獻其說於朝者事下部使
者使者誘君按行君察其屬忌之弗往也性樂易遇人傾蓋如故
聽言置虛實一切傾信久知其玩詐弗愠也客至無疏戚留飲醉
輒假寐頃刻已醒未嘗爲酒困間有所感賦詩見意可錄傳者積

數百篇年既高氣體益健請謝不避寒暑它人當疲劇而君處之
自若崇寧中余憂居里閭君過予日三數雖大雨雪聞外有屐聲
曰此必季隱也既而果然時君年七十有餘矣相見慰勉已必自
敘所得經傳新意大編長卷常以自隨據案風誦援筆改竄其心
思目力非少年可及大觀四年正月十有三日壬子以疾終於家
享年八十娶同郡余氏先君十有二日卒享年八十有四子三人
曰源先卒曰子發曰端子發余友也有文行兩薦於有司又預崇
寧貢籍鄉人舉遺佚又舉八行嘗爲宗子學長女四人進士余安
節蘇掖劉迪周邁其壻也孫三人曰世南曰世英曰澤孫女二人
冬十月二十有七日壬戌其孤遵治命以季隱及余夫人之喪葬
於邑南羅漢峰之原予幼聞縣鄉尊長言君之考好振施平日倘
徉閭巷遇貧民不能自給密置鏹于門凡賓旅干旬親友急難隨
多寡各厭其意資以全濟者甚衆咸謂單氏家資雖匱慶在厥後
而君之兄錫中進士第儒術吏方有過人者乃卒於州縣君與弟

鎮又皆老於場屋論者疑之然予觀自昔陰德之報遲速雖不同而未嘗不效觀子發士望及諸孫秀拔異日必有華顯者銘曰嗟嗟季隱初激昂事與願違心永傷如彼榷梓材之良宜備雕刻塗青黃匠石弗顧委道傍百年孤榦摧風霜物有用舍維其常命邪非邪宵難量優游閭里壽且康以彼易此奚否藏維天報施久乃彰有子有孫來者長

單氏夫人墓志銘

深州文學余充甫之室曰單氏常州宜興儒家女也充甫學行夙成甫弱冠以經術傳授迨今逾五十年門弟子發策決科踵登華顯而充甫蹭蹬以老其安於義命不以得失介意休休然樂道忘倦曾不知老之至者夫人有以相之也夫人少孤事其母田夫人盡子道既嫁事其姑裴夫人盡婦道而所以相夫者又如此故里之人施衿結帨以訓其女必以夫人爲法余氏素貧凡晨昏伏臘乃至吉凶婚娶凡資以供億者皆出於夫人處畫故其夫及子唯

知專精於藝文而弗知家之有無至於問遺親戚拊養貧族嫁遣孤女沛然若有餘力而實無旬月之積蓋其天資好德遇所當爲力行之□□□禮弗憚也平居與人言孜孜以和孝爲本於事迎機立解分別是非利害如指白黑其居田夫人喪孺慕摧毀躬修佛事於潤之金山卽夕夢田夫人乘舟而至笑語如平生識者以爲孝誠所感政和二年五月十九日以疾終於家享年七十有二明年某月日葬於邑之某鄉某之原曾祖某祖某考某生六子亡者四人曰拭曰京曰大享曰大受而京元符三年賜進士出身存者二人曰授再薦於鄉又預大觀優供曰擢爲州學內舍生女三人壻海州沐陽縣主簿李端方進士孫堦焦翊孫五人曰似曰侑曰飲曰仍皆從學曰謙尚幼孫女五人某之先妣太淑人蔣氏裴夫人之甥也與夫人厚善相視如母子某以是知夫人之詳謹泣爲之銘曰士有貴賤取之自躬嗟彼女子祇繫所從乃如夫人老於衡泌惟其爲善在約彌厲宗姻尊仰匪服匪車天爵之貴豈

繫其夫善積慶貽理不終晦追賁九京余知未艾

慕容叔孚墓志

吾弟叔孚名彥喜以元豐七年七月壬寅生於常之宜興以崇寧二年十有二月庚午終於京師以明年十有一月甲申葬於宜興篠嶺之原叔孚俊爽夙悟恩性天至五歲居先考喪哀毀如成人平居奉事母兄怡聲柔色禮無違者初就外傅默識強記閱書一再過不忘稍長益嗜經術紬繹經旨剖析疑滯出人意表善談論袞袞不休聽者忘倦於文無所不能自進士舉業乃至應用詞藝落筆數千字若不經意衍裕宏博不疵於理年甫弱冠進此方未艾也而不幸以死嗚呼哀哉天既賦叔孚以才矣胡嗇厥施而至斯極也維我先考養志閭里非義弗爲非道弗取潛德卓行輝映今昔捐館之日以六弟付託俾某撫育訓成之諸弟嶷嶷自立講習琢磨芝蘭並秀當崇寧造士之盛太學選試更占殊等月書歲考曾靡虛籍祭酒博士相與嘉歎聞譽翕然歸之今叔孚捨我去

矣念叔孚之不壽與夫名宦猶未遂也某與有罪焉而理歸於無可奈何至於未克授室嗣息不立則某曷敢逃責言而及此摧裂肝膽嗚呼痛哉嗚呼痛哉謹志

碑

故朝奉郎尚書職方員外通判德順軍兼管內勸農事輕車都尉

賜緋魚袋累遷太子太師梁公神道碑

并序

大觀元年正月今中書侍郎梁公初拜尚書右丞有司遵故事擬三世贈典以聞二月辛酉降制其略曰朕惟執政大臣望實顯隆致位近彌義方之訓自其前人追加表揚用錫休命尚書右丞子美故父某可特贈太子少師九月宗祀禮成又降制其略曰朕饗帝合宮翕臻純嘏均神之惠普逮庶工眷予近臣宜推異數追崇親廟實國彝章中書侍郎子美故父某可特贈太子太師既告第又賜子美以副焚於墓中書公拜賜泣請某曰子美幸承先人遺訓備位政府賴天子慶施贈官一品而墓隧之碑未立夙夜怵惕

不敢怠遑惟先人出處終始之大節可考不誣敢請銘於子某義
不得辭謹論次太師之官階政治而爲之序曰公諱某字得之漢
凌鄉侯統之後五世祖夏國公惟忠嘗任天平軍節度判官因家
焉故今爲鄆之須城人曾祖文度贈太師中書令兼尚書令封魏
國公祖顥翰林學士右諫議大夫贈太師中書令兼尚書令開府
儀同三司封魏國公考適皇祐中位宰相終太子太傅致仕贈太
師中書令兼尚書令開府儀同三司封徐國公諡莊肅曾祖妣鄒
氏韓國太夫人祖妣閻氏魏國太夫人妣任氏徐國太夫人公辭
采學問在孺有聞稍長就試有司名擢高等初補將作監主簿累
官光祿寺丞至和初仁宗皇帝嘉公故相子嘗舉進士召賜學士
院賜進士出身未幾復廷試五品服遷祕書省著作佐郎自著作
五遷至尚書職方員外郎累階朝奉郎勳輕車都尉歷監在京鑄
瀉務管句專句司監布庫知汝州梁縣簽書天平軍節度判官事
通判德順軍凡六任公篤實以是守身亦以是施於政在梁縣時

郡守將闢聽事風屬邑以材木獻公曰是必取於民吾寧被譴豈
希合以擾吾民哉卒拒之守坐法罷郡諸令皆得罪公獨免焉鄆
視他郡爲劇公裁處精確下無隱情民有辨訟懷牒宿留公至當
職而後出蓋信服之若此嘗有禁卒之妻背夫以逃雖遇赦自首
法猶不原帥吳文肅公矜之將貸以輕刑公不從立議詳盡切於
事宜文肅竦然以爲正論獄旣決卽薦公于朝倉米數百萬紅腐
不可給軍食安撫轉運使夏惲欲亟以元價貸民公曰倉吏失職
宜正厥罪而後減直貸之不然民將有辭卒用公策民輸稅於官
吏不時遣因緣爲姦部使者諉公公度弊所從起制之日入萬斛
民至鼓舞相慶乞公在任東平監馬政廢弛朝廷遣使馳視公條
十利以奏諸使者美之德順並邊素號難治公居歲餘寬猛交濟
俗以綏靖創立治平城寨經始有度下不告勞嗚呼公之爲政雖
古循吏何以加此昔左氏謂臧孫達宜有後於魯而漢史亦稱于
公多陰德子孫踵爲公卿公任不踰佐貳而奉法守公愛民澤物

常不替於志宜流慶於今也性清謹無他嗜好獨喜爲詩有集十卷曰汝陽雜藁研練精切真深於詩者平居陶喜情性風調清遠遇有所感詞氣激昂銳然有志於進爲蓋稟之也全積之也厚守之也固而不克大顯於時今有子以儒學事業受知明天子擢爲柄臣制書褒揚以謂義方之訓自其前人是豈終不顯哉公以熙寧元年十一月二十日終於德順軍之官舍享年四十有八四年九月三日葬須城登庸鄉執政里從莊肅公之兆娶張氏開封人樞密副使宏之孫少府監可道之女有賢行事舅姑以孝聞元豐元年八月六日終享年五十有六以三年二月二十六日祔於公之兆初封壽安縣君累贈嘉國太夫人子五人子駿故奉議郎子美今爲太中大夫守中書侍郎子建故太常太祝子履今爲通直郎簽書開德府判官事子博今爲通直郎通判興元府女二人長嫁朝奉大夫劉裴次嫁從事郎田宜孫十三人希祖宣義郎修祖太學上舍生承祖昭祖皆將仕郎求祖未仕揚祖承務郎恭祖師

祖皆太學齋郎早卒餘尚幼孫女十三人銘曰蔚蔚梁宗源自柏翳統侯陵鄉晉臣之裔維莊肅公公之皇考相我仁宗爲時元老公生相家考翼是嗣學則通儒政則循吏帝嘉莊肅子以材聞給札詞禁明試以文擢踐世科揚芬桂籍佩服之華寵有申錫公懋承之以忠以孝位雖不充志克允蹈德善之積慶祉之詒及子而顯報施在茲制書若曰惟予大臣義方之訓自其前人東宮之師膺此追賚源深流長疏榮未艾里曰執政鄉曰登庸刻銘隧道過者改容

露布

擬試宏詞露布

聖人爲度以天下恩靡間於華夷王者居一於域中法尤嚴於誅賞惟彼無知之小敵自干有赫之明威爰興問罪之師五道並進克殄反常之黨隻輪不還猶乾坤覆載之無私而春秋生殺之有序彼孽自作茲無赦於邦刑我伐有名蓋冀行於天討恭惟皇帝

卷之五
陛下掌觀萬國子惠庶民令出等風雷恩施同雨露接武堯舜比
肩禹湯凡諸含血而有生孰不推心於弗忍獨拓拔之遺種擅呼
韓之故區蟻穴至微不當國家之一縣狼心相繼敢肆蜂蠆者百
年啖以金帛而益貪錫以土疆而愈恣聞出剽掠恬爲凶殘忘涵
貸之至恩逞陸梁之大憝人神同憤華裔弗容梟首藁街未正不
庭之戮游魂蔥嶺尚安匪茹之居臣等材力弗強智能無取繆當
分閩豈縱敵以求全弗共戴天誓與彼而俱斃擁鋒號令仗鉞馳
驅初屯橫山進薄靈武景星燭王旅天狗墮賊營以仁侮亡奚孤
虛之足考自上伐下顧主客以何施士氣鼓熊羆兵威摧嵩岱或
東衝以張我左翼或西擊以斷賊右肩月羽翳空霜鋒耀野魚甲
燦爛獸旗獲孳伐鼓震天揮戈迴日腹背合擊首尾分攜我師益
張彼衆大潰僵尸滿原谷棄仗等邱山草木類人而戰士魂驚風
鶴有聲而奔馳足蹶六師乘銳掃翰海之妖氛萬炬俱然焚賀蘭
之聚落邦封盡復民俗咸新臣等躬執干戈名聯士伍憑社稷無

疆之慶遵廟堂必勝之謨時未及瓜已詠勞還之什功無橫草預
聞鼓凱之音不勝慶快之至

摛文堂集卷十五

摛文堂集附錄
慕容彥逢諡議

當部准敕定諡據常州申繳到故通奉大夫守刑部尚書致仕河南縣開國伯食邑九百戶贈銀青光祿大夫慕容某行狀依例送太常寺擬諡今據回申到擬狀諡曰文友奉議郎太常博士胡交修議曰崇寧紀元之初上方躬親聽斷勵精庶政修遵制揚功之治求賢如弗及輔弼大臣蒐簡以副側席之求凡所薦引皆召見便殿天子親訪納焉時公在選中比及對論議有餘喟然動丹扆亟擢儒館上方欲褒顯異才以勸多士於是閱歲未幾不日累遷遂持囊近班要途華貴翺翔殆周公感遇特異思竭底蘊以報眷知益自激昂以赴功名之會所歷咸有可紀儒學彬彬譽望蔚然爲一時聞人嗚呼亦可尚已旣終於官其家狀公行於朝命諡於太常諡法曰德美才修曰文能善兄弟曰友以是易行於名不浮請得而論之公天資穎悟人也自初就傅其默識強記固已過人

閱書一再過輒不忘既仕益自力於學藏書數萬卷退食卽研精其間自六經羣史諸子百家之學靡不洽通故其所蓄雄深閣博放爲詞章窳然根柢理致代言西掖攝直北門凡所草定援筆立成溫厚典雅炳然可觀士大夫稱之號爲近古豈不曰德美才修者乎公天性篤孝事繼母尤極謹順先意承志比終常如一日撫先德之遺澤抱弗洎之深悲常慨然言曰獨可致力友愛於我諸弟庶慰怵惕之思焉於是撫育訓誨誠意篤備世賞不先其息必徧同氣雖法必任子者亦力請於朝以及之吹噓汲引唯恐後用咸被采擢華萼扶疏聯榮一時世之稱友愛者必以公爲言豈唯族婣鄉里慕之縉紳之士莫不推之上至於天子亦聞而嘉獎之蓋其因心力行故久而益篤厥聞顯著如此豈不曰能善兄弟者乎考論公行被之以此諡其誰曰不宜方公居諫垣則持論堅明風望隱然貳銓曹則籍它比後條目以絕吏姦守汝海則能以寬惠得民心長秋官則禁妄繫正敘法頒斷比以恢讞奏之路寬罪

之類者以廣上恩才周於用故所居厖績宜不一而已也若夫官師論諡獨綴取行己之善其尤較著者以垂不朽云謹議奉議郎守考功員外郎吳巖夫伏承太常寺諡議如前謹按上公天資警悟學術過人自其少時已能奮勵力取進士第嶄然見頭角識者固知其遠到矣紹聖閒朝廷設宏詞以待文學之士公於同輩試於有司一舉而得之自此名聲上達聖主銳意圖治網羅英俊用之惟恐不及公於是時首被識拔召對便殿擢寘書林更踐華要皆以才能見稱未幾進直西垣一時誥命多出其手文章典雅士夫傳播以爲深得代言之體出入禁闈謀謨議論爲不少矣而公慎密不泄以故罕有聞者方將進用不幸云亡此朝廷之所深惜也嗚呼公之持橐幾二十年出處進退終始之節皆可夷考至於內行修飾孝友純篤出於天性則又有不可掩者世賞必先同氣而不以私其子撫育教誨迄用有成數年之間諸弟繼踵登朝寢以光顯矣然猶分俸祿以給其不足此又人之所難縉紳之論莫

不以此多之天子亦聞而稱獎焉身歿之後室無私藏聖恩矜恤飾終之典於數尤縉太常參稽衆論請以文友二字謚公之名稱其實不爲虛矣當部准例於都省集合省官同參詳皆協令式請有司准例施行謹詳定訖遂具狀申都省取裁奉太宰判准謹具申都省伏候指揮敕旨仍付所司宣和二年二月二十三日奉敕如右牒到奉行宣和二年二月二十四日尚書吏部故通奉大夫守刑部尚書致仕河南縣開國伯食邑九百戶贈銀青光祿大夫慕容某謚曰文友牒奉敕牒至准敕故牒宣和二年三月日書令史武統給考功員外郎吳巖夫考功員外郎黃叔敖侍郎王鼎侍郎盧法原尚書蔣猷中大夫充徽猷閣待制提舉南京鴻慶宮蔣璿撰

慕容彥逢墓誌銘

政和七年夏五月通議大夫刑部尚書慕容公疾病拜疏上還印綬天子閔以職事勤公詔以通奉大夫刑部尚書致仕是月壬子

薨於寢享年五十有一上聞震悼制贈銀青光祿大夫贈賻加等又以御府錢二百萬賜其家宣和元年二月甲申葬於常州宜興縣篠嶺之原公諱某字某其先曹魏時建國爲率義王歷晉隋唐世有顯人五代時開州刺史贈太保某公於公爲四世祖太保二子長曰某國初以功封河南王季曰某爲磁州刺史生右衛將軍諱某家於滏陽隨子官宜興卒葬焉故今爲宜興人右衛生少師諱某於公爲考少師三娶周氏沈氏蔣氏累贈崇榮嘉國太夫人公沈出也幼卓偉不羣六歲喪母哀毀如成人默識彊記讀書一再過輒不忘常有異人語少師曰是兒手有紋理足有二黑子他日必貴視之信然初未之見也少長銳志於學痛自砥礪窮經綴文不少懈出與諸儒試常爲魁首弱冠登元祐三年進士第調主池州銅陵簿比少師捐館舍公承計號絕哀感行路卒喪調主婺州金華簿改瀛州防禦推官知鄂州崇陽縣會朝廷初設宏詞科以羅天下文學之士公從試中之遷淮南節度推官越州州學教

授推所以教諸生孜孜不倦南方士喟然興於學益繕治黌舍刊印三史讐校精審遂爲善書四方士大夫購求之鬻以養士迨今蒙利焉元符元年改宣德郎擢主國子監簿遷太學博士崇寧初元賜對便殿敷納明辨方秋試進士公建言以爲邇來學者程文往往尚浮靡畔經術願詔有司凡選擇務先理教後文采詭僻不醇者黜之詔從其請除祕書省校書郎未幾擢監察御史兼權殿中侍御史燕見一再上益才之除左正言遷左司諫章數十上大抵以拾遺補闕輔教化慎命令爲先劾按權近無所回撓後言執政臣某事當去上亟爲罷之論議堅正風望隱然除起居舍人踰月召試制誥擢中書舍人預編修哲宗皇帝御集三年春罹嘉國夫人憂初夫人寢疾公憂見顏閒扶承左右殆廢寢食及執喪毀瘠踰制三年不居于內芝草產廬次鄉里歌頌之服闋洊拜中書舍人大觀元年春權翰林學士歲中除尚書兵部侍郎數日改吏部建請編次差擬近比爲書以窒欺謾下諸郡審覈圭田有無多

寡之實簿正之又爲薦舉都簿具注薦士之章毋得隱漏與選凡三年條教張設鉗梏吏奸縉紳大說便之進兼侍讀又兼議禮武選詳議官前所論執政復登用言官希意誣公以他事朝論不以爲然上亦察其無他趣令眎職而公力請補外遂出知汝州布宣德意加以廉平民有犯法必求所以寬之罪疑者從輕故下德其賜至相約不犯公令既去而思之不忘尋加集賢殿修撰政和元年復以吏部侍郎召兼侍講并議禮局二年冬擢拜刑部尚書公平日以文學進法律非所習人或難之公曰三尺安出哉願患不畱意爾凡有參決必本於法令而緣飾以儒雅故平亭論報當於理合人心建請開封府捕盜官與緝事使民敢捕繫無罪人詣吏者並比附政和法縣以杖笞及無罪人爲徒以上罪送州杖一百自是吏知畏憚不敢妄捕繫人又論命官負罪除名爲重追官爲輕而刑部敘法除名人初犯私坐乃除一官敘公坐盡敘舊官而追官者皆除所追官敘輕重不倫願詔有司詳定復請下大理取

熙寧以來四方奏讞情法疑憫決事比例頒之天下庶幾遠方知所遵用詔皆從之每決四方疑獄必從輕比多所未宥故奏牘之上司寇者屢以罄絕稱慶於朝兼詳定高麗人貢法六年復知貢舉公自崇寧以來五司文衡一時俊傑多出其門進兼太子賓客上初建儲貳以重國本東宮寮案極一時之選公以宿德鉅儒與今丞相白公皆被差擇朝野稱得人既職調護五日一見皇太子必力陳父子君臣之道如是而為孝如是而為忠惓惓輔道開益居多歲中頻攝翰林學士自居從官凡翰苑缺員輒被旨兼領所草內制自成一集公久服邇聯譽望隆洽忠誼謀謨上所深知天下士指日以冀柄任而平時盛氣揚休未嘗有疾七年仲夏侍祠方澤適隆暑禮成而退體中覺疲勩猶力於朝謁告纔數日遂不起不登三事遠圖弗究豈命也夫將歸葬詔以季弟開封府刑曹掾彥季通判常州典護終事長弟彥許自開封府刑曹仲弟彥傳自太常寺丞亦皆請外同護喪而歸從官舉故事賦斂賻送合數

十百萬公子攀棺號慟曰義不傷先人名卒辭不受公孝友蓋天性非強勉致然事繼母盡禮既處顯矣致養怡謹如布衣時友愛三弟所以拊育教誨之甚至稍長進之於學講習琢磨以身率之其後羣處太學皆犖犖為名進士延賞不先與子必徧逮同氣吹噓汲引例被除擢當時貴之其論撰集賢也法得任子不許及旁其時仲弟未命公慨然曰吾子可先吾弟官乎乃以至誠祈懇朝廷多公義特許之自貧約時與諸弟飲食衣服必均絕甘分少迨貴猶然每休沐朝直退必相與論文義或把酒燕衍窮日夜無厭數暫不見即惘惘若有所失彥許初除天府刑曹公以職事對因辭謝上存慰勤至問及兄弟之數且曰卿之孝友朕固知之聚族干指調聊輯睦中外無閒言京城無宅以居僦舍卑陋處之裕如也幼女與孤甥女皆擇命士之賢者歸之齋裝周渥不異己子居家不問有無祿賜所得不給於用妻子衣食纔足而已既歿家無餘貲天子亦知之故能賚賜特厚及葬狀公之行治上太常太常

議曰諡法德美才修曰文能善兄弟曰友今其狀應法乃諡曰文友公之節惠可以無愧矣爲人敦大靜重啟處有常不妄笑語雖家人子弟不見其喜愠御下以寬不與物忤人犯之不校也言官誣公者既死其猶子坐殺人州以具獄上刑部人爲危之公平心論決卒無生議論者伏公能捐怨起家單平被遇明主列於侍從十有五年初無左右以助小心兢畏以義命自安無所附麗非公事未嘗請對天子思見公至被命乃敢請問自幼嗜學問晚節益篤藏書數萬卷朝夕繙閱不去手自經史諸子百家之言靡不洽通故其所蓄渾雄深博發爲詞章雅麗簡古無世俗氣尤長於辭令典嚴溫厚褒貶無溢言詔令或叢委操筆立成初若不經意而輕重適當文采粲然每一篇出多士口傳以熟上尤愛公文以爲有古風進見往往摘訓辭之善者稱賞之有文集二十卷外制二十卷內制十卷奏議五卷講解五卷藏於家公官階自宣德郎十四遷至通奉大夫開國自河南縣男至伯食邑自三百戶至九百

戶娶葛氏故贈少保某之女封衛國太夫人賢明淑貞治家有法度二男邦佐承議郎行太府寺丞有美才所居官能舉其職邦用承事郎女三人長歸余之子寧祖季歸余之子及祖仲適朝散郎尚書戶部侍郎賈安宅孫男九人曰綱承事郎曰紹曰絢皆通仕郎曰綸曰約曰繪曰縉曰絳曰純皆將仕郎孫女四人長適文林郎賈巽次適從政郎任仲恕餘尚幼既葬邦佐以門人之狀與太常之議見示泣且言曰先人葬宜有銘願以累公余與公居同鄉進同年仕同寮有游從之好有姻婭之契知公爲詳義不得辭也乃爲之銘曰棘成之裔世雄朔鄙魏征海邦率義始王國初建功亦享王封乃及其胄右衛之崇維祖維考埋光弗耀是生河南盛德之報道隆以廣學博而奧逢時之休橫厲遠趨騫於禁密以職華要筆舌之峻調護之尊豈曰不貴公志未伸胡弗壽考俾秉國均維皇是悼喪我良臣有蘊弗攄亦燾後昆諡以易名萬世是信葆嶺峩峩荆水沅沅既固既安曰公之墳

摛文堂集附錄

右摛文堂集十五卷宋慕容彥逢撰彥逢字叔遇宜興人元祐三年進士復中詞科崇寧元年除祕書省校書郎歷官刑部尚書卒諡文友宋史無傳仕履僅見集後附錄墓志宋藝文志有此書而晁陳書目不載想已久佚案此集宋時亦罕見故宋文鑑不收未必鄙其人而擯之今館臣從大典搜輯編成十五卷幾及全書之半亦足以傳叔遇惟制誥類中有降授奉議郎趙嵩可差知徐州制案宋史元豐五年知淮陽軍奉議郎趙嵩知徐州前於叔遇當制約二十年又有楊愿除中書舍人誥宋史紹興十二年九月始遣楊愿賀金使正旦距彥逢之卒亦二十年大約以他人文孱入此編纂之誤也內端明殿學士朝散大夫曾孝寬可差知鄆州降授奉議郎趙嵩可差知徐州兩制合爲一題又故左藏庫使趙從義可贈皇城使惠州刺史充本州團練使制贈是身沒之榮充是任官之命合爲一題語氣不貫觀制語首云設館以待四方之臣置使董事頗似四方館使制又不相合其爲誤合無疑又回謝貢士樂偲樂傳啟後脫一題宗

室故懷州防禦使河內侯墓志銘中間有脫文此傳錄之誤也彥
逢謚文友謚議曰德美才修曰文能善兄弟曰友其孫綸鏤版時
目以文友公摛文堂集其爲文友無疑廣本提要誤作文定而
宜興新志因之當据此以訂其誤至文辭雅麗讀者當自得之光
緒丁酉日長至武進盛宣懷跋

